



# عيشة نسد النفس

أشعار بالعامية المصرية



د. نهاد إبراهيم



دار العلوم للنشر والتوزيع

شعر عامية

# عيشة نسد النفس؟!!!!

د. نهاد إبراهيم

٢٠١٥



عيشة تسد النفس؟!!!!

المؤلف : د. نهاد إبراهيم

الطبعة الأولى : أغسطس ٢٠١٥

تصميم الغلاف : محمد عبدالسلام

التنسيق الداخلي : رفعت حسن سيد

دار العلوم للنشر والتوزيع

ص . ب : ٢٠٢ محمد فريد ١١٥١٨

هاتف : ٠١١٤٤٧٦٤٠٠٠

الموقع الإلكتروني : [www.dareloloom.com](http://www.dareloloom.com)

البريد الإلكتروني : [daralaloom@hotmail.com](mailto:daralaloom@hotmail.com)

[Facebook.com/dareloloom](https://www.facebook.com/dareloloom)

Twiter : @dareloloom

جميع الحقوق محفوظة

رقم الإيداع : ٢٠١٥ / ١٦٨٨٠

الترقيم الدولي : ٩٧٨-٩٧٧-٣٨٠-٤٥٧-٢



إن الآراء الواردة في هذا الكتاب لا تعبر بالضرورة عن رأي دار العلوم للنشر


يمنع نسخ أو استعمال أي جزء من هذا الكتاب بأية وسيلة تصويرية أو إلكترونية أو ميكانيكية بما فيه التسجيل الفوتوغرافي والتسجيل على أشرطة أو أقراص مقروءة أو بأية وسيلة نشر أخرى بما فيها حفظ المعلومات، واسترجاعها من دون إذن خطي من الناشر

## كلمة

أعترف أنني كائن كسول جدا بشكل وحش..

لكننى صديقة وفية لأصدقائى الأوفياء وكلمات شعري الطيبة، وهى التى تلح علىّ فى الخروج إلى الحياة منذ سنوات طويلة.. تقترب من نصف عمري الطويل القصير. لم تياس أشعاري من طرق الباب داخلى بعنف بكافة الوسائل المهذبة وغير الـ، حتى أوشكت فى النهاية أن تهدم المعبد بأبوابه الأمامية والخلفية بتوحش مخيف فوق رأسى المسالم. وبعد تهديد سافر وأخير بالانفجار والقيام بعملية انتحارية تلوّح بالفراق الأبدى، نجحت مساعيها وحررت نفسها بنفسها من وراء أسوار سطور أوراقى المتراسة بهدوء وتكاسل بالعدوى فى منزلى وحيدة لا يعرفها أحد إلا قلة قليلة للغاية، بمن فيهم مؤلفة هذه الأشعار نفسها.

يوما ما سألتنى أصدقائى.. إلى متى هذا السكون الطويل ولماذا؟! خذلتنى كلماتى فى الإجابة.. لحظتها أدركت أن تهديدات قصائدى فى هجرى إلى الأبد جادة بالفعل؛ فأطلقت سراحها من أجلها وكنوع من الشكر لأصدقائى الحقيقيين الذين تحملوا كسلى الإبداعى القاتل بصبر أيوب الجميل. وإليهم القطرة السابعة!!



## أنا كنت بقوللك إيه...؟؟؟!!

هى: يا سيداتى وأنساتى  
هو: يا مداماتى وستاتى  
هى: عايزة احكيلكم حكاية  
هو: دايما تحصل ويايا  
هى: خنقانى ممررة عيشتى  
هو: وانا كاتم مش عايز اشكى  
هى: جوايا نار بدورين  
هو: أهرب من قسمتى فين  
معاً: أنا دويت خلاص يا اخواتى  
هو: يا مراتى يا كل حياتى  
يا كل عذاب أزماتى  
هى: صباح الخير يا حبيبى  
يا بختى يا ناس بنصيبى  
هو: صحصحى فوقى أرجوكى  
بسلامته المدعو أبوكى  
هى: ماله بابى عملك إيه  
دا يحبك زى عنيه  
هو: يا ستى انا مش بتكلم  
من حقى يا ناس اتظلم  
هى: آه يانى منك آه يانى  
خلاص مش هنطق تانى  
هو: أنا كنت بقوللك إيه...؟؟؟

بسلامته المدعو حمايا  
دايماً قاعد فى قفايا  
حريّف سهير كبير  
بيجى آخر الليل متأتك  
بسيجار وروب حرير  
ويصمم إنى ألاعبه  
دور شايب.. دور مجنونة  
وليلاتى لوش الفجر  
يحكىلى عن أمونة  
ومصهل زى الجن  
وانا وحدى يا خلق بون  
هى: جرى إيه مزربن ليه  
بقى دادى الحق عليه  
عايز أيامه يفوتوا  
دا اللى اسمه الحب يا توتو  
هو: ما بحبش كلمة توتو  
إلهى يا رب تموتوا  
يا ستى هو انا عاطل؟!  
هى: لأ  
هو: يا حبيبتى هو انا ضايع؟!  
هى: No  
هو: يا عالم عندى شغل  
وابوكى خلاص معاش  
بينام لحد الضهر  
وانشالاً غيره ما عاش

هى: أعصابك بس يا كوكو  
هو: مابحبش كلمة كوكو  
هى: طب قولللى هتفطر إيه  
هو: يا ستى انا مش بتكلم  
من حقى يا ناس اتظلم  
هى: آه يانى منك آه يانى  
خلاص مش هنطق تانى  
هو: أنا كنت بقوللك إيه...؟!  
يا هانم فهميه  
رئيسى كائن مؤذى  
عاشق للغم غاوى  
لو يوم اتأخر فيه  
بهذلة تحقيق وبلاوى  
هى: يعنى ادّيله فى منوم  
علشان يفطس يتكوم  
هو: يا عالم أنا طقيت  
هى: يا سلام لو تفهم دادى  
دا يحب الفرفشة  
ويموت فى الدندشة  
فرحان دايماً بشبابه  
وأخر نعنشة  
هو: ودا ذنبى يا عيلة مجنونة  
فى البرد اتلوى واتكتك  
محبوس جوة البلكونة  
على فرق إلعب قسم



هى: والنبي ما تزعل نفسك  
 هنقلّ البلكونة  
 هو: أشد ف شعري يا هووه  
 هى: فكرت هتاكل إيه؟؟!  
 هو: يا ستى انا مش بتكلم  
 من حقى يا ناس اتظلم  
 هى: آه يانى منك آه يانى  
 خلاص مش هنطق تانى  
 هو: أنا كنت بقوللك إيبيبيبيبية...؟؟!!!  
 هى: أهو بابى قرب يصحى  
 إفتاهم إنت معاه  
 هو: الباشا بيصحى الضهر  
 هى: طب ماحنا بقينا الضهر  
 هو: إيه..؟!  
 بتقولى إيبيبيبيبية؟؟!!!!!!  
 يا واقعة سودا  
 ع اللى كان واللى جرى  
 ضيعتوا عليا الماهية  
 غير التهزيء والنقورة  
 هى: أعصابك بس يا لولو  
 هو: ماحبش كلمة لولو  
 كان بدرى عليا التشرذ  
 والتسول والبلطجة  
 هى: مزربن ليه يا حبيبي  
 يا بختى يا ناس بنصيبى

هو: يا خسارة كل دراستى  
تعالوا يا ناس شوفوا حوستى  
آخرتى سريح فى جنينة  
ودا كله من الكوتشينة  
هى: آهى دى حكايتى يا ستات  
هو: بقى مين فينا المظلوم  
هى: دا بابى يحبك خالص  
هو: ياما نفسى أشوف فيه يوم  
هى: ما انا بس عايزة أقوللك..  
هو: يا ستى انا مش بتكلم  
من حقى يا ناس اتظلم  
هى: آه يانى منك آه يانى  
خلاص مش هنطق تانى  
هو: أنا كنت بقوللك إيه...؟؟؟  
هى: فكرت هتفطر إيه؟؟؟!!!  
هو: الرحمه يا أهل الجنة  
الرحمه يا أهل النار  
هى: أعصابك بس يا توتو  
هو: ما بحبش كلمة توتو  
إلهى يا رب تموتوا  
معاً: أنا دويت خلاص ياخواتى

## تصبحى على خير يا حبيبتى

هو: تصبحى على خير يا حبيبتى  
يا سعادتى وكل منايا  
وحياتك بعد شوية  
إبقى اطفى النور ورايا  
هى: ذا اللى انت قدرت عليه  
تصبحى على خير يا حبيبتى  
تعالوا يا ناس شوفوا خيبتى  
هو: يا ستى أنا متضايق  
النوم أحسن ما اتخانق  
هى: يا عالم إلحقوه  
أنا خفت يا مامى انا خفت  
والنبى إوعوا تحوشوه  
ذا انا زيك عمرى ما شوفت  
هو: طب أعمل فيكى إيه  
وصوابعى بقت فى الشق؟؟  
مين يرضى بكدة يا اخوانا  
يا عالم قولوا الحق؟؟؟؟  
هى: والنبى لتقول وتعيد  
سمّع كل الجيران  
تقدر تنكر يا حبيبي  
إنك راضى وفرحان؟!!!!!!!  
هو: يا سلام طبعاً فرحان

وانا عايش فى مرستان  
وماهيتى يا عينى مفقودة  
ودا كله بسبب الموضة!!!!!!  
هى: مالك انت بس ومالى  
وحياتك سيبنى ف حالى  
تكونشى يا روحى زعلان  
وانا يعنى مش واخدة بالى؟؟!!  
هو: يا مدام حرام عليكى  
اللى انتى عامله فىا  
ماتبرقليش بعنيكى  
نفسى أفضض شوية  
هى: قال يعنى انت المظلوم  
هو: خلىنى أحسن مكتوم!  
طب مثلاً بصى لشعرك  
هى: ماله شعرى بقى ماله شعرى!!!!!!  
هو: ساعة أحمر ساعة أخضر  
وحالات فوشيا على بنجر  
فى الصبح صغيرة طويلة  
بالليل آلاجرسون  
وشوية كنيش وملوؤ  
فجأة يقلب شنيون  
ساكنة عند الكوافير  
يا تملّى فى الحمام  
يا سلام على كدا يا سلام!!!  
هى: مش ذنبى انك تقليدى

ومممل يا روحى و de Mode  
ما هو كله عشانك يا حبيبي  
طب قوللى غلطت ف إيه  
دا انا اموت فى الابتكار  
والعيشة أحبها نار  
هو: حذارى م الانفجار!!  
هى: والنبي لتقول وتعيد  
سمّع كل الجيران  
تقدر تنكر يا حبيبي  
إنك راضى وفرحان؟!  
هو: يا مدام حرام عليكى  
اللى انتى عاملاه فيّا  
ماتبرقليش بعنيكى  
نفسى أفضض شوية  
واللبس دا بقى كوم تانى..  
هى: ماله لبسى بقى ماله لبسى؟!  
هو: مش راسى معاكى على بر  
تعباه وتاعبة عيشتى  
فرير فى عز الحر؟!  
وخفيف وهى بتشتى?!  
أشكال غريبة عجيبة  
إشى آستك واللى مسيب  
ساعة ريش وكُم مغيث  
وحاجات والله تشيب  
عايشة جوا الفطارين

يا تملّى فى الحمام  
يا سلام على كدا يا سلام!!!!!!  
هى: مش ذنبى انك تقليدى  
وممل يا روحى و de Mode  
ما هو كله عشانك يا حبيبي  
طب قوللى غلطت ف إيه؟!  
أنا غاوية اتمنظر واطهر  
أضحك ألعب وأهزر  
ساعة حشمة.. ساعة باريسى  
وادلّع أوى وأغير  
من عاقلة على مهاويسى  
والعيشة تولّع نار  
دا انا اموت فى الابتكار  
هو: حذارى م الانفجار!  
هى: والنبي لتقول وتعيد  
سمّع كل الجيران  
تقدر تنكر يا حبيبي  
إنك راضى وفرحان؟!  
هو: الله طبعاً فرحان..  
طب أعمل فيكى إيه  
وصوابعى بقت فى الشق؟!!!!  
مين يرضى بكدة يا اخوانا  
يا عالم قولوا الحق!!!!!!!!!!!!!!!!  
هى: تكونشى يا روحى زعلان  
وانا يعنى مش واخدة بالى

هو: يا ستى أنا متضايق  
النوم احسن ما اتخانق  
هى: طب قوللى غلطت ف إيه؟!  
ما كفاية ان انا مبسوطه  
صحيح نستنى اقوللك  
ماعرفتش آخر موضة؟؟؟  
هو: إشبعى بيها وبالأوضة  
مع فساتينك خليكى  
يا مدام حرام عليكى  
اللى انتى عاملاه فيا  
ماتبرقليش بعنيكى  
وسبيني ارتاح شوية!  
وانا عارف هحلم بيكى..  
هى: يا عالم إلحقوه  
أنا خفت يا مامى انا خفت  
والنبي إوعوا تحوشوه  
دا انا زيك عمرى ما شوفت  
قال يعنى انت المظلوم  
وغلبيت خلاص معايا  
هو: بصراحة أنا طرشقت  
زيح عنى يا رب الغمة  
أعصابى تلفانة هطق  
وبخاف منك فى الضلمة!!!!  
هى: يا سلام على كدة يا سلام  
هو: ودا كله عشان الموضة

إشبعى بيها وبالأوضة  
هى: على فين هتروح وفايتنى  
يا حبيبى يا شارى رضايا  
طب سييلى لحاف ومخدة  
هو: خدى فرشى وكل غطايا  
يا حياتى وكل هنايا  
من أول ليلة بقولها  
تصبحى على خير يا حبيبتى  
هى: تعالوا يا ناس شوفوا خيبتى  
هو: أحسن ما اموت فى إيديكى  
ماتبرقليش بعنيكى  
الرحمة يا رب كفاية  
وحياتك بعد شوية  
إبقى اطفى النور ورايا..



## يا بوليس...

هو: طول عمرى أنا من صغرى  
عايش كدة فى الأحلام  
والحلم اذا كان نوع مغرى  
تلاقىه بيعدّى قوام  
أحب اعيش فى حالى  
مروّق مرتاح بالى  
إنشالاً الدنيا تولّع  
ما تولّع طب وانا مالى  
بصراحة أكثر رومانسى  
حنين أوى وخيالى  
فرحان بالدنيا بحالها  
وكإنها خاتم ملكى  
وف يوم من دون ليّام  
الدنيا بقت مش ملكى  
ودا كله عارفين إمتى  
لما اتجوزت خطيبتى!  
هى: م الأول كدا هتلبّخ؟!  
ألفاظك حسن فيها  
وان كترت ف برطمتك  
عنك دى راح اصفيها!!  
إسم الله على إحساسك  
يا رقيق بالأوى ورومانسى

واما انت جرىء ومكتم  
سمّعى كل كلامك  
هو: يا ماما أنا بتكلم  
فى سرى يا ستى انا حرا!  
إعتبرينى حنفية  
مكسورة وقاعدة تخر!!  
هى: كل شوية تقولهالى  
أنا كنت زمان رومانسى  
وحنين أوى وخيالى  
هو: دى حاجات قبل اما اتجوز  
أيام ما كنت مفرفش  
هى: دلوقتى انت بكتيره  
بقجة إزار ومفشفش  
هو: يا مدام اللفظ سعد  
والمكتوب أصله وعد  
على كل ما علينا  
خلينا فى الموضوع  
هى: طب إيه هو الموضوع؟؟  
هو: المُشكل يا حضرات  
إن انا غاوى أحلام  
وخيالى أحبه يشطح  
أسيبه ماقولوش نام  
على قد ما يقدر ينطح  
وبعيد عنكو المدام  
واقعية حبه زيادة

بتموت فى القهوة السادة  
وقوام تصدر فرمان  
ممنوع خالص أحلام  
ممنوع خالص إحساس؟!  
دا كلام عاقلين يا ناس؟!  
هى: برضك هتليخ تانى؟!  
ألفاظك حسن فيها  
وان كترت ف برطمتك  
عنك دى راح اصفيها!!  
هو: من قيمة ييجى كام يوم..  
أنا كنت رايح فى النوم  
عادى زى البشر..  
يظهر خرفت بهلوس  
واتكلمت بصوت عالى  
عن ست تجنن تهوس  
طلعتلى من أحلامى  
وعديكم ع اللى جوالى..  
هزنتى بكل إيديها  
وبراسها وبرجليها  
وقالتلى بصوت حيانى  
هى: آه يا خاين!  
آه يا غدار!!  
يا ابو عين بجحة وقوية!!!  
إنطق يا ابو بوز منقار  
قوللى بسرعة مين هى؟؟؟

هو: فزعتنى حُتّة فزعة  
حدفتنى بفردة جزمة  
ولقيتنى منطور طائر  
ولا أجدع من ميت وزّة!  
هى: ماتغيّرش الموضوع  
قوللى بسرعة مين هى؟؟؟؟?  
هو: يا ستى أنا شقيان  
طول النهار تعبان  
مرّه اتبجح من نفسى  
إكمنى مشاعرى رقيقة  
حلّمت بست جميلة  
يعنى انا مكتوب عليّ  
أعيش على طول مكبوس  
من حقى احلم شوية  
هى الأحلام بفلوس؟!!!  
هى: إسم الله على إحساسك  
يا رقيق بالأوى يا رومانسى  
واما انت جرى ومكّتم  
إحكيلى على أحلامك  
هو: يا ماما أنا عايز احلم  
فى سرى يا ستى انا حر  
إعتبرينى حنفية  
مكسورة وقاعدة تخر!  
أنا أصلى كنت زمان.....  
هى: كل شوية تقولهاالى

أنا كنت زمان رومانسى  
وحنين أوى وخیالى  
هو: يا كل بوليس الدنيا  
يا عساكر الدورية  
حد يا عالم يلحقنى  
م الست المفترية  
هى: برضك هتلبخ تانى؟!  
هو: يا حبيبتى أنا بحكيلهم  
أيام ما كنت مفرفش  
هى: دلوقتى انت بكتيره  
قفة إزاز ومدشدش  
هو: يا مداد اللفظ سعد  
والمكتوب أصله وعد  
على كل ما علينا  
خلينا فى الموضوع  
هى: شكلك ناويها الليلة  
إسمعها منى نصيحة  
خلّى الطابق مستور  
هو: من قيمة بييجى كام ليلة..  
كنا ماشيين كعابى  
عدت جنبى عربية  
تلوح بموديل سبور  
من غير ما اقصد قتلها  
ياما نفسى اركب عربية  
بجناح زى الملايكة

ألفُ العالم كله  
أقطف ياسمينه وُقْلَه  
وازوَّق العربية  
الصبح اتمشى ف لندن  
بالليل اسافر ع الصين  
وف روما أسوق وأدندن  
واموّن من برلين  
إنشالاً الدنيا تولّع  
ماتولّع طب وانا مالى!  
وعديكم ع اللى جوالى..  
رجتنى بكل إيديها  
وبراسها وبرجليها  
وقالتلى بصوت حيّانى  
هى: إتنيل فوق من حلمك  
بتبرطم ليك ميت ساعة  
إيش حال لو كنتش جنبك  
كنت هتدّن فى إذاعة؟!  
قال إيه برلين والصين؟!  
والنبي لو تنك تحلم  
لأخلّى الليلة طين  
قوم فز هات السباك  
بيجى يشوف البلاعة  
هو: فزعتنى حتّة فزعة  
زغدتنى بفردة جزمة  
ولقيتتنى منطور طاير

ولا أجدع من ميت وزّة!  
دا كلام عاقلين يا ناس؟!!!  
هى: ماتغيرش الموضوع  
لحسن وحياة أسلافى  
ألم عليك الناس!  
هو: يعنى انا مكتوب عليّ  
أعيش على طول مكبوس  
من حقى احلم شوية  
هى الأحلام بفلوس؟؟؟  
هى: إسم الله على إحساسك  
يا رقيق بالأوى ورومانسى  
واما انت جرىء ومكتم  
بتخبى ليه أحلامك؟؟  
سمّعى كمان شوية  
هو: يا ستى أنا غلطان  
نسيت انك واقعية  
أصل انا راجع تعبان  
قلت احلم بدرى شوية  
هى: يا جوزى خدها نصيحة  
خلّيك ويا با ع الأرض  
مهما هربت فى أحلامك  
بايديّ هجيبك الأرض  
هو: يا ماما أنا عايز احلم  
فى سرى يا ستى انا حرا!  
إعتبرينى حنفيه

مجنونه وقاعدة تخر!!  
هى: برضه مُصِر وبتلَبَّخ!!  
ألفاظك حَسَن فيها  
هو: يا مراتى أنا بحكيلهم  
أيام ما كنت مفرفش  
هى: وان كُتِّرت ف برطمتك  
عنيك دى راح اصغِيها  
هو: يا كل بوليس الدنيا  
يا عساكر الدورية  
حد يا عالم ينجدنى  
م الست الواقعية!!



## بصحيح اللي اختشوا ماتوا..

هو: فى مراتى يا حضرات  
حاجات كتير عاجبانى  
أوصافها كلها كوم  
والضحكة يا ناس كوم تانى  
دى عليها حِتَّة ضحكة..  
بتجلجل جوا ودانى  
ترقص بصوت حيانى  
بس يا دويك أسمعها  
يتبعتر كل كلامى  
هى: يعنى انت سعيد ويايا؟  
هو: طبعاً سعيد يا حياتى  
هى: لكن ماسألتش نفسك  
أنا بضحك أوى على إيه؟  
فرحانة صحيح من قلبى  
ولّا بضحك من غلبى؟؟  
هو: آيوه يا عنياً مالك؟  
دايماً على طول سرحانه  
ويقالى مدة ملاحظ  
إنك كدة مش فرحانة  
هى: مين قال ان انا زعلانة؟!  
مين قاللك عقلى شاط؟؟!!  
ما انا قدامك بتنطط  
هطق م الانبساط!

هو: يا حبيبتى يا كل كيانى  
يا زهرة ف توب بستانى  
لو جنبى الدنيا بحالها  
من غيرك أنا وحدانى  
هى: آهو ذا اللى باخده منك  
كلام وفعل مفيش  
نفسى يا عالم لو مرة  
ترحمنى ماتفضحنيش  
هو: أنا برضه وش فصايح؟!  
دا انا صوتى ف حبك رايح  
هى: بالعربى أنا زهقانة  
م الآخر بقى قرفانة  
كل ما نخرج فى خروجة  
فى الشارع ولاّ جنينة  
تبقى يا ليلة بيضا  
وتلم الناس علينا  
هو: والناس تتلم ليه؟  
مالهم ومال حياتى؟؟  
والليلة تهمل ف إيه  
كحلى ولاّ كاروهاتى؟؟  
مادام احنا مع بعضينا  
بنوتس قلب جنينة  
هى: خلينا فى الجنينة..  
هو: خلينا فى الجنينة..  
هى: نبقى قاعدين تمام  
زى اتنين محترمين

بنحكي في أي كلام  
لابسين متشيكين  
وبفضفض باللي في نفسي  
إلا في وسط الكلام  
واسمعلك صوت غريب  
عجيب يا ناس مريب  
خلتني أشك في نفسي  
هو: والصوت دا شكله إيه؟  
هي: اللهم اجعله خير  
يا سيدى زى إيه..؟؟  
بمبة انضريت في الحارة  
أو عيل عامل غارة  
وكان الدنيا اتهدت  
وانحشرت في الزمارة  
هو: يا حبيبتي ماترعليش  
غلطان والحق عليا  
هي: بتلفت كدا حواليا  
أنا ريني يا عيني عليا  
عماله بكلم نفسي!  
هو: يا منايا ما أنا هشرحلك..  
هي: دا أنا كان هيغمي عليا!  
البيه قيس الجبار  
نام منى يا ألف ماشالله  
وشخيره رق وطار  
ولا مزيكه حسب الله!  
هو: يا حبيبتي دا بس اكمنى

أنا طول اليوم بِلِفْ  
 داير على رجلى كَانِي  
 شريط عمّال بيسِفْ  
 نتفسح.. قلت ماشى  
 نتكلم.. قلت ماشى  
 نزلت تانى معاكى  
 والشمس ف مخرى تسيح  
 لكن يعنى مايجراشى  
 لو بس شويه أريح  
 هى: بتريح وسط الخلق  
 والناس بتروح وتيجى  
 أنا عايزة بودرة تالك  
 تلحم شرح برستيچى  
 هو: محفوظ ع الراس وبيا  
 طول ما انتى يا روحى معايا  
 هى: الله يسامحك يا حمايا  
 الله يسامحك يا حماى  
 دى عاملة تعملوها  
 دى كارثة تخلّفوها  
 هو: والله أنا مستغرب!  
 هى: وكمان ليك عين تستغرب؟  
 بصحيح اللى اختشوا ماتوا!  
 هو: ودى حاجه تزعل ديا؟؟  
 دى حكاية وصغونة  
 هى: والناس اللى حواليا  
 بيشاورا ع المجنونة

هو: ملعون أبو خاش الناس  
دا انا من غيرك أحتاس  
هى: قعدت اضحك كإنى  
بنهزر مع بعضينا  
حبوبى بينام منى  
ريح وسط الجنينة!  
هو: مالك يا روحى مالك؟  
ليه شكلك مش فى المود؟!  
هى: على رأى حليم بيقولها  
طريقك بقى مسدود  
هو: يا حبيبتى يا كل كيانى  
يا زهرة ف توب بستانى  
لو جنبى الدنيا بحالها  
من غيرك أنا وحدانى  
هى: آهو دا اللى انا باخده منك  
كلام وفعل مغيث  
نفسى يا عالم لو مرة  
تستر وما تفضحنيش  
هو: أنا برضه وش فضايح؟!  
دا انا صوتى ف حبك رايح  
هى: قُصّر الكلام سامحتك  
ما انا برضه لسة بحبك  
وتفوت أيام وتمر  
وحببى زى ما هو  
مع غيرى صاحى زنهار  
ومعايا بس يريح

ويقوللى يا شمس الدار..  
 هو: معاكى بسترّيح  
 وشكّ جميل عاجبنى  
 وكمان صوتك يطربنى  
 بشوفك غصبٍ عنى  
 الخوف يتسحب منى  
 بنام ويندلق  
 هى: الله على أحلى عيشة  
 يعنى انا مكتوب عليّا  
 تنام وانا انفلّىء  
 ما كفاية يوم السيمّا  
 هو: مالناش دعوة بالسيمّا  
 هى: خلّينا ف يوم السيمّا..  
 يا حبيبى بلاش اليوم دا  
 تتغدى حاجة ثقيلة  
 هو: يا حبيبتى دى سمكة قرش  
 محترمة ومنت عيلة  
 هى: ودخلنا فيلم رومانسى  
 كله حب وغرام  
 نسّانى السمكة القرش  
 وسنين السمكة القرش  
 يا روحى ع الكلام  
 يا سيدى ع الهيام  
 وبادوبك لسه الواد  
 هيعدى بيوس البطلة  
 إلا وف عز الهُس

أسمعك حَتَّةً طَلقة  
وصوت فطيع مخيف  
مرعب يا ناس عنيف  
هو: والصوت دا شكله إيه؟؟  
هى: اللهم اجعله خير  
يا سيدى زى إيه..؟؟  
فرقيعه جوة ماسورة  
أو قطة يا باى مسعورة  
وكان الدنيا طقت  
وانتحرت م البلكونة  
هى: يا مراتى ماتزعليش  
غلطان والحق عليا  
هى: بتلفت كدا حواليا  
أتارينى يا عينى عليا  
بستنى البوسة لوحدى  
هو: يا عمرى ما انا هشرحك  
هى: دا انا كان هيغمى عليا!  
شمشون بيه الجبار  
نام منى يا ألف ماشالله  
وشخيره رق وطار  
ولا مزينة حسب الله  
هو: يا حبيبتي دا بس اكمنى  
أنا طول اليوم بلف  
داير على رجلى كانى  
شريط عمال بيسيف  
نتفسح.. قلت ماشى

نتفرج.. قلت ماشى  
ونزلت معاكى تانى  
والشمس ف مخرى تسبيح  
لكن يعنى ما يجراشى  
لو بس شويه اريح  
هى: أنا قلت بلاش القرش  
بتريح وسط الخلق؟!  
والناس بتروح وتيجى؟؟!!  
ياما نفسى ف جبلين تلج  
يلحموا كسر برستيچى  
هو: محفوظ ع الراس ويايا  
طول ما انتى يا روحى معايا  
هى: وهوب الدنيا هاصت  
والناس ضحكت وزاطت  
يعنى بالاختصار  
الحفلة كلها باظت  
هو: والله أنا مستغرب!  
هى: وكمان ليك عين تستغرب؟؟!!!  
هو: ودى حاجة تزعل ديا؟  
دى حكاية وصغونة  
هى: وبتوع الأمن طبعاً  
من إيدنا جرجرونا  
ختمت عادى بخناقة  
والناس كلها طردونا  
هو: ملعون أبو خاش الناس  
دا انا من غيرك أحتاس



هى: قعدت اضحك كإنى  
بنهزّر مع بعضينا  
حبّوبى بينام منى  
ريّح فى قلب السيما!!  
هو: مالِك يا حبيبتى مالِك؟  
ليه شكّلك مش فى المود؟!  
هى: على رأى حلیم بيقولها  
طريقك بقى مسدود  
عرفت ليه الضحكة  
ترقص بصوت حيّانى  
فرحانة صحيح من قلبى..  
ولّا انا بضحك من غلبى؟؟  
هو: يا سلام يا ناس ع الضحكة  
دى عليها حتّة ضحكة  
بتجلجل جوا ودانى  
بس يادوبك أسمعها  
يتكعبل كل كلامى  
هى: آهو ذا اللى باخده منك  
كلام وفعل مغيّش  
نفسى يا عالم لو مرّة  
تهمد وما تفضحنيش  
أيام بتفوت وتمر  
وجنابك زى ما انت  
مع غيرى صاحى زنهار  
ومعايا بس تريّح  
وتقوللى يا شمس الدار..

هو: معاكى بستريح  
وشك جميل عاجبنى  
وكمان صوتك يطربنى  
بشوفك غصب عنى  
الخوف يتسحب منى  
بنام وبندلق  
هى: يعنى انا مكتوب عليا  
تنام وانا انفلىء؟!  
هو: يا حبيبتى يا كل كيانى  
يا زهره ف توب بستانى  
هى: الله يسامحك يا حمايا  
الله يسامحك يا حماتى  
هو: لو جنبى الدنيا بحالها  
من غيرك أنا وحدانى  
هى: دى عاملة تعملوها  
دى نكية تخلفوها  
هو: والله أنا مستغرب!  
ودى حاجة تزعل ديا؟؟  
دى حكاية وصغونة  
هى: قُصر الكلام سامحتك  
ما انا برضه لسه بحبك  
مش عارفة اعملك إيه؟؟  
إنت ما بتردّش ليه!!  
الله على أحلى عيشة  
جوزى القاسى الجبار  
نام منى يا ألف ماشالله

وشخيره رق وطار  
ولا مزبكة حسب الله!  
أنزل على راسه بالحلة  
وزى ما تيجى تيجى؟!  
لا نافع بودرة تالك  
ولا كل جبال الثلج  
يا خسارتك يا برستيچى!  
يا ريتنى ما اتكلمت  
يا ريتنى ما كنت ضحكت  
نايم فرحان بشبابه  
وانا أصلى وضلى شابوا  
مظلومة يا عينى عليا  
أنا فعلاً أغمى عليا  
بعد الحبة اللى فاتوا  
حبوبى يا واقعة قوية  
ريح وسط الأغنية!  
يا حلاولولو يا حلاوة  
بصحيح اللى اختشوا ماتوا..

## وحياة ربنا دا حرام

هى: صباح الخير يا حمادة  
يا جوز سكر زيادة  
هو: آهو كله صباح وخلاص  
جيتيللى القهوة السادة؟  
هى: لا إله إلا الله!  
يا حبيبى إحنا الصبح  
والناس بتقول يا صبح  
لزمته إيه السادة؟!  
دى حتى عتمة وغامقة  
وسيرتها تجيب الخنقة  
وقال ضد السعادة  
هو: هاتيللى الجزمة السوده  
والكرافنة المقلوبة  
والبدلة الكشره اياها  
أظنك دى عارفاها..  
هى: عارفاها يا سيدى عارفاها  
ودا كله ليه جرى إيه؟  
صاحى منكّدا كدا ليه؟  
فيه زلزال فى اليابان؟  
فيه فيضان فى اليونان؟  
هيعطّوا اللحمه كمان؟!  
هو: أنا صاحى مش مبسوط  
قرفان وماليش نفس

قلبي يا ساتر مقبوض  
دى حاجة تسد النفس  
هى: ما انت على طول مقبوض  
شايل سلاطين أسلافك  
خايف تضحك لتموت  
زهقان دايماً من ناسك  
هو: بالذمه اضحك على إيه؟  
والبس واتشيك ليه؟؟  
طب مين فى الدنيا سعيد؟؟؟  
فيه إيه فى الدنيا جديد؟؟؟؟  
كله بقى زى بعضه  
والخلق مقطّع بعضه  
والمعدولة معوجة  
والعيشة كلها سوده  
هى: لا إله إلا الله!  
يا جوزى إحنا الصبح  
والناس بتقول يا صبح  
هو: آهو كله صباح وخلاص  
هى: يعنى يا ربى دا كلام!  
من دون الدنيا بحالها  
تبلىنى بجنس عجيب؟  
بقى اسيب كل الرجاله  
واتجوز شخص كئيب؟؟  
وحياة ربنا دا حرام!  
هو: مالك كدا هو زعلانة؟

مقموصة أوى وغضبانة؟؟  
ما هي دى الحقيقة  
هى: خلىنى ساكتة يا حمادة  
وبلاش خناقات عبيطة  
هو: عموماً أنا ماكدبتش  
فيه حاجة تفرّح حد؟  
فيه سعادة وقلت انا لأ؟  
بصراحة انا مش مبسوط  
قلبى يا حفيظ مقبوض  
هى: ما انت على طول مقبوض  
شايلى سلاطين أسلافك  
خايف تضحك لتموت  
زهقان دايماً من ناسك  
هو: والله انك ظالمانى  
فاكرة اليوم الفلانى  
لما قعدنا العصرية  
على كيلو فول سودانى  
بنشوف المسرحية  
هى: فاكر إسمها يا حمادة؟؟  
هو: علشان بس تعترفى  
أنا مش حَارِمِك من حاجة  
هى: فاكر إسمها يا حمادة؟؟  
هو: كانت كوميدى وتجنن  
م الهمزة حتى الياء  
هى: يا حلاوة ع اللى شوفته

كوميدي يا ناس فى البؤساء؟!!!!!!!!!!!!!!  
دا الواد من أول بخته  
نازل صريخ وبكاء  
ويا عيني فى برج نحسه  
من يومها بيقول واء  
هو: بس ضحكنا فى الآخر  
هى: يعنى يا إما البؤساء  
يا نشوف السقامات؟؟؟  
هو: مش عاجباكى البؤساء!!  
هى: كلها أحزان ومصايب  
ومشاكل هم ف هم  
دا انا لون شعرى بقى شايب  
ما كفاية عيشتك غم!  
هو: مالك كدا هو زعلانه؟  
مكبوسة أوى وغضبانة؟؟  
ما هى دى الحقيقة  
هى: خلىنى ساكتة يا حمادة  
أنا عيشتى معاك عجيبة!  
هو: أنا صاحى مش مبسوط  
طهقان وماليش نفس  
قلبي يا مغيث مقبوض  
دى حاجة تسد النفس  
هى: لا إله إلا الله!  
يا سيدى إحنا الصبح  
والناس بتقول يا صبح

يعنى يا ربى دا كلام؟  
من دون الدنيا بحالها  
تبلىنى بجنس مريب  
بقى اسيب كل الرجاله  
واتجوز تحفة كئيب؟!  
هو: آهو أى صباح وخلص  
هى: وحياة ربنا دا حرام!  
هو: جيتلى القهوة السادة؟  
هى: طب تيجى نقول م الأول؟؟؟  
هو: يا رب علينا تهوّن  
هى: صباح الخير يا حمادة  
يا جوز سكر زيادة  
يا حبيبى عيشها راضى  
الدنيا زى القلّة  
يوم مرة وبومين قلّة  
وادينا بنشرب فيها  
وان حكمت بنعديها  
وان زادت بنداديه  
يا سلام عليك يا حمادة  
طول ما انا جنبك مبسوطه  
متفاءله مش مقبوضة  
وعشان خاطرى يا حبيبى  
إفكر الكلمة دى هى  
الدنيا زى القلّة  
يوم مرة وبومين قلّة



هو: أدیکی قلتیها یا هانم  
یا متفائلة یا سعیده  
والضحكة یا عینی عریضة  
الدنيا رى القلة  
يوم مرة ویومین قلة  
قال یعنی جیبتی التایهة!  
ما القلایة بتتکسر  
وبتنزل ستین حة  
والغلایة بتتقطف  
آخرتها یا دوب جاکتة  
هى: مش یمکن مرة القلة  
على بختی ما تنکسرشى  
هو: وان عوزت جناب القلة  
أفضل عطشان ماشریشی؟!!!!  
هى: هتشرب منها حبة  
بعدين یفضلک حبة  
هو: حکمت یا سیدنا القاضی  
إنت تشرب وتکرکر  
وانا اشیل النص القاضی  
هى: یعنی أنت سیبت الدنیا  
وشوفت النص القاضی!!  
هو: النص القاضی یا هانم  
هو حیاتى الکئیبة  
مش برضه هتفضی القلة  
وتبقى ع الحدیة

هى: ما احنا هنملاها تانى..

هو: وهتفضى يا دوب فى ثوانى..

هى: لا إله إلا الله!

هو: أظن خلاص خلّصتى

قولتيلى إسمع وسمعنا

قولتيلى إفهم وفهمنا

هى: وعرفت دا كله لوحدا

هو: وحدى وما حدش قاللى

إوعى تكونى فرحانة

أو متفاءله وعشمانه

يا امر المخ التراالى

يا ماما إفهميها

الدنيا زى الأوضة

كنزه وحق ومزنوقة

كله بقى زى بعضه

والخلق مقطّع بعضه

والمفرودة معوجة

والعيشة كلها سوده

هى: تؤمن بالله يا حمادة..

هو: جيتيلى القهوة السادة؟

هى: كركبت الدنيا عليّا

دلوقتى أنا مش عارفة

فين راسى من رجليّا

هو: كنتى بتقولى صباح

هى: لزمته إيه الصباح؟!!

والعمر عدّى وراح  
هو: آهو إسمه صباح وخلص  
هى: يعنى يا ربى دا كلام؟؟  
من دون الدنيا بحالها  
تبلىنى بصنف عجيب  
بقى اسيب كل الرجاله  
واتجوز جوز كئيب؟!  
هو: مش عارف ليه مقبوض؟!  
دى حاجة تغم النفس  
هى: آدى آخرة البؤساء  
وسنين السقامات  
هو: علشان لازم تعترفى  
أنا مش حَارْمِك من حاجة  
هى: لا إله إلا الله!  
أنا غلطانة يا حمادة  
يا زعيم زمن الكآبة  
هو: مالِك كداهو.....  
هى: خلىنى مكتومة كفاية  
كفاية زامته جوايا  
واسكت خالص من فضلك  
لحسن أعملها جناية!  
حياتى معاك يا حبيبى  
كلها سودة وإظلام  
يا كل حد سامعنى  
مرارى طافح وفاض

يخرب بيت الكآبة  
يخرب بيت الشيطان  
صحصح واسمعها منى  
تؤمن بالله يا حمادة  
يا كائن ضنك سادة  
أنا كل ما اسمع حسك  
يبرطم أنا طهقان  
من جوة جوة قلبى  
من تلافيف روحى بقولها  
تغور بيوم معرفتك  
وحياة ربنا دا حرام!!!!!!!

## وعلياً من دا بايه؟!!

هى: بالذمة انت المكبوس؟!  
بالذمة انت المنحوس?!  
طب إحلف كدا ورينى  
ونشوف مين المرووش؟  
هو: بلا مرووش بلا مهرووش!  
بقى يا ام مخ شاكوش  
بقى يا ام عقل فشوش  
دى عمايل ترضى حد؟  
أنا حيلى خلاص اتهد  
دا بدال ما تقولى يا جوزى  
يا حيلتى وماليش غيرك  
بصى كداهو حواليكى  
روحى شوفى جوازات غيرك  
دا بدال ما تقولى يا جوزى  
يا حبيبى كتر خيرك  
هى: إن جينا للعدالة  
عقلى قرب يتكهّن  
قدم منى استقالة  
زقزق مابقاش يتحمل  
صنف غتانة ورزالة  
هو: وكمان بتقولى رزالة?!  
هى: إحترت اقولك إيه؟  
وعلياً من دا بايه!

خَلِّينِي سَاكِتَةً وَبِلَاش..  
هو: وَلِيَه يَا مَدَام بَرِنَط؟!  
دَا لِسَانَك بَس لَوَحْدَه  
أَسْرِع مِن مَيِت قَشَّاش!  
أَنَا نَفْسِي يِيْجُوا يَشُوفُوا  
إِنْتَا جِ أُونَكْل وَطَنَط  
هَي: طَب نَسْأَل الْجِيرَان  
وَلَّا جَنِينَةُ الْحَيَوَان  
مَيِن اللَّي كُل يَوْم  
يَتَخَانَق فِي حَاجَات فَارِغَة  
وَيَزْجَر لِيَه مَش فَاهْمَة  
وَمَشَاكْل رَايْحَة جَايَة  
مَنْذ جَوَازَنَا الْمَيْمُون  
هو: أَنَا فَاهِم تَلْمِيحَاتِكَ  
وَدَارَس كُل لُغَاتِكَ  
حَاسِبِي فِي كَلَامِكَ خَالِص  
وَبِلَاش سِيرَة مَيْمُون  
هَي: آهُوَ دَا اللَّي يَقُول عَلِيَه  
وَمَضِيْعَة عَمْرِي فِيَه  
كَلَامِي بِقَدْرَة قَادِر  
تَاخْذَه عَلَي مَعْنَى تَانِي  
مَهْمَا اَعْمَل وَلَا أَسْوَى  
تَقُولَلِّي.....  
هو: مَش عَاجِبَانِي  
هَي: لَمَّا اسْكُت وَانْتَ بَتَحْكِي

تفتكر ان انا سرحانة  
أتاوب وانت بتحكى  
يبقى انا منك زهقانة  
وامّا اطلب منك حاجة  
تسمى طلبى زن  
وان قلت مش محتاجة  
الليلة تقلب غم!  
هو: ما انتى يا هانم غلطانة  
كلامك مش محدد  
دماغك مش مرتب  
تسكتى أثناء ما اتكلم  
يبقى انا إنسان ممل  
تتاوبى وانا مسترسل  
معناها دى عيشة تعيل  
طب ليه تطلبى فستان  
على إيه يختى الزواق  
وكمان بتحطى سمنة  
فى صينية الرقاق!!  
هى: تصدق كان لازم ارمى  
السمنة من الشباك  
يا إما أخلص نفسى  
وأعتزل الرقاق  
هو: عنيكى مكتوب فيهم  
إن انا كتلة غياب!  
مخلوق يغيظ ويفرس!!

بيضة ومش راضيه تفقس!!!  
مُفرف وعقلى فسفس!!!!  
و بموت أوى فى الخناق!!!!  
هى: إنت كمان هتقولنى!!  
إعمل معروف بقى سيبنى  
أنا هحكى كل حكايتى  
بعدين فى مذكراتى  
قدام فى المستقبل  
هو: ودا مين بسلامته قالك  
إنى هوافق ولا أقبل؟؟  
وانا مالى بالمستقبل!  
إنتى دلوقتى مراتى  
ودى مش محتاجة قوالة  
هى: إن جينا للعدالة؟؟  
هو: أنا عايز العدالة..  
أموت انا فى العدالة..  
هى: عقلى قَرَّب يتكهن  
طالب منى استقالة  
زقزق مابقاش يتحمل  
صنف سخافة وسماجة  
هو: وكمان بتقولى سماجة!!  
هى: سماجة وميت سماجة  
هو: واهون عليكى يا ملاكى  
يا دموعى وابتساماتى  
دا انا رقة وقلبى حنين



وجوزك الملاكى  
على كل أنا مقموص  
على كل أنا مفروس  
ويقولها لك من قلبى  
الله يسامحك يا حياتى  
هى: وكمان انت المقموص؟!  
وكمان انت المفروس؟!!!  
دا انا أحلف على ميت مصحف  
إن ضميرك مهزوز  
هو: بلا مهزوز بلا مغروز..  
دى عمايل ترضى حد؟!  
أنا حيلى خلاص اتهد  
دا بدال ما تقولى يا جوزى  
يا بختى وماليش غيرك  
دا بدال ما تهتفى جامد  
يا حياتى كتر خيرك  
هى: محتارة أقولك إيه  
وعلياً من دا بيايه!  
قلبي أصله موجوع  
الأحسن أريح روجي  
وعشان خاطر عديها  
ونغير الموضوع  
هو: مالِك سكتى ليه؟؟  
هى: أحسن أسكت وبلاش..  
هو: وليه يا مدام برينط؟!

دا لسانك بس لوحده  
أجدع من ميت منكاش!  
هى: يا حبيبى قلنا بلاش..  
هو: أنا نفسى ييجوا يشوفوا  
إنتاج أونكل وطنط  
هى: بمناسبة سيرة طنط..  
مش برضه حرام عليك  
اللى انت عملته هناك  
هو: عملت إيه هناك؟!  
دى حماتى كمان بالذات  
من بين كل الستات  
فيضان شهد مكرّر  
منقوع مسك وعنبر  
وقدوة للستات  
عملت إيه هناك?!  
هى: يا سلام شوف البراءة  
يا شيخ حرام عليك  
فاكر يوم العزومة؟؟  
دا انت يوم العزومة  
خلّتنى ف نص هدومى  
خلّتنى ف تلت هدومى  
بالعافية حُشت دموعى  
وكرامتى مابقالهاش قومة  
هو: مش فاكر جنس حاجة!  
هى: مش فاكر التراييزة؟؟

الترابيزة الشقيانة  
شايلة أشكال واللوان  
إششى ضُلْمَة بفلغل رومى  
إششى كفتة وجوز فيومى  
ولّا الرز المعمر  
والمحشى والمتشمّر  
دا غير الحلو يا حلو  
المانجة جنب الموز  
ومعاهم طوابير لوز  
كان ناقص علشان ترضى  
نعمل روحنا آراجوز  
هو: أنا فاهم تلميحانك  
ودارس كل لغاتك  
حاسبى فى كلامك خالص  
وبلاش سيرة الآراجوز  
هى: أهو دا اللى بقول عليه  
ومضيعة عمرى فيه  
كلامى بقدرة قادر  
تاخده على معنى تانى  
مهما اعمل ولا اسوى  
تقوللى.....  
هو: مش عاجبانى  
هى: قاعد أليط متنتك  
زى البطة المغرورة  
باصص للأكل ساعة

ناقص تاخذله صورة  
وعشان تزود همى  
قلت جنابك لأمى..  
هو: الأكل دا دمه ثقيل  
وملحه كتير وقليل  
يا حماتى يا أم مراتى  
ألاقيش عندك بتاو  
ومعاه قُرصُ القرافة  
ويا ريت فنجان كاكاو  
بس اوعى من الشوكولاتة!  
هى: مش برضه حرام عليك  
اللى انت عملته هناك؟!!!  
هو: عملت إيه هناك؟!!!!!!  
ما حماتى كمان غلطانة  
طبيخها مش محدد  
سرفيسها مش مرتب  
لا الضلّمة مستويّة  
والفلفل عينه قوية  
حتى الكفتة مكسوفة  
والفرخة مش منتوفة  
والرز اسود غطيس  
والمحشى مات فطيس  
دا غير الحلو يا حلو  
المانجة صفرا وعايقة  
والموزة رخرة متضايقة

حتى اللوز فى الطوابير  
مخنوق من كتر الزنقة  
مش قادر افهم سؤالك  
عملت إيه هناك؟!  
هى: دا انا كان قلبى بيتقطّع  
شايطة وانت بتتمطّع  
ونبضى بقى فريرة  
زى الحصان ببيرطع  
مش عايز تاكل قول  
واتكلم بالمعقول  
دى ماما عشائًا بتطبخ  
بقالها ست ساعات  
هو: طبعاً الناس مقامات!  
وحماتى كمان بالذات  
من بين كل الستات  
فيضان شهد مكرّر  
منقوع مسك وعنبر  
ومفخرة للستات  
لكن أكلها مزكوم  
بيزروط الهدوم  
هى: يا شيخ حرام عليك  
خلّيتنى دلقت المحشى  
على تنية الفستان  
هو: طب ليه تلبسى فستان  
على إيه يختى الزواق

مين قاللّك حُطّي السمّنة  
فى صينية الرقاق؟؟  
هى: تصدق كان لازم ارمى  
السمّنة من الشباك!  
يا إما أعذّب نفسى  
واتعالج م الرقاق!!  
هو: عنيكى باين فيهم  
إن انا كتلة غباء!  
مخلوق يغيظ ويفرس!!  
بيضة وحالفة ما تفقس!!!  
زرنخ وعقلى فسفس!!!  
وبموت أوى فى الخناق  
هى: إنت كمان هتقوللى؟!  
إرحم أعصابى وسينى..  
بعدين هبقى احكى حكايتى  
واكتب فى مذكراتى  
قدام فى المستقبل  
هو: ودا مين متفلس قاللّك  
إنى هوافق ولاّ اقبل؟!  
مالنا ومال المستقبل؟؟!!  
ومش عايز سقالة  
إننى دلوقتى مراتى  
ودى مش محتاجه قوالة  
هى: إن جينا للعدالة..  
هو: أموت انا فى العدالة..

بتقول إيه العدالة؟؟  
هى: عقلى قَرَّب يتكهن  
قدم منى استقالة  
فوت مابقاش يتحمل  
صنف غتاته وتلامة  
هو: وكمان بتقولى تلامة!!  
هى: تلامة وميت تلامة  
هو: أهون عليكى يا ملاكى؟  
يا دموعى وابتساماتى؟؟  
دا انا رقة وقلبي حنين  
وجوزك الملاكى  
على كل أنا غضبان  
على كل أنا حرنان  
ويقولها لك من قلبى  
الله يسامحك يا حياتى  
هى: يا ضلالى يا ابن القرداتى!  
ما تسيبنى أروح لحالى!!  
هو: مالِك سكتى ليه؟؟؟  
هى: أحسن أسكت وبلاش..  
هو: وليه يا مدام برينط؟!  
دا لسانك بس لوحده  
أجدع من ميت قشّاش!  
هى: قلبى أصله مفقوع  
الأحسن اريح روحى  
ونغير الموضوع!!

حتى القطر القشّاش  
مابقاش خلاص قشّاش  
بقى يائس ومايسواش  
والبركة فيك وف عقلك  
طلّعتَه بدرى معاش!!  
محتارة أقولّلك إيه  
وعليّا من دا بإيه!  
يا جوزى كتر خيرك  
هو: يا ربى إنت شايف..  
يا ربى إنت عارف..  
هى: طب روح منك لله..  
الله فى علو سماه  
أنا صبرى جاب مداه  
يا ربى إنت شاهد  
يا ربى إنت عارف  
خلّصلى تارى منه  
واتصرّف إنت معاه!



# حسبى الله ونعم الوكيل

هو: يا رب يا كريم  
يا حنين يا عظيم  
يا مُطلع على حالى  
من فضلك.. لو سمحت  
إسمع دعوة غلبان  
ساكن فى الدور العالى  
خايف فى لحظة يأس  
أحذف نفسى من فوق  
وافقد بيتى وعيالى  
لو زعلان منى ف حاجة  
إفتحلى باب رحمتك  
وقصّر الليالى  
معلش صوتى مبجوح  
علشان قلبى مجروح  
حتى اسأل عمى وخالى  
بدعى من كل قلبى  
يا رب اغفرلى ذنبى  
وزيح عنى اللى ف بالى!  
هى: يا رب اقبل دعاه  
لكن لحد نصه  
إلا الحنة الأخيرة  
وتممّله شفاه  
أصله تعبان بمخه

مسكين أعصابه خفيفة!  
بُصلى يا ابو صوت مبوح..  
يزيحلك مين م البيت؟؟  
إنت أكيد اتجنيت!!  
وهو البيت من غيرى  
يقاله أى طعم؟!  
والعيشة تبقى عيشة  
من غير ست البيت؟؟!!  
هو: يزيحك بس شوية  
يا ربى نفسى ف هدنة  
أنا خلاص استويت  
هى: إنت من غيرى فى البيت  
هتلاقى حياتك باردة  
كثيية مية فاترة  
مفيهاش أحداث مثيرة  
إنت من غيرى فى البيت  
هتعيش تيش لوحدك  
زى خيال المآة  
الوحدانى فى الغيط!  
هو: ماتنكشيش فى الجرح  
وعديها على خير  
الليلة بالذات رطوبة  
وانا بصراحة مخنوق  
متغاط منك مفلوق  
وانتى عايشة ف غيبوبة  
هى: شكلك يا حرام مكتوم

شايِل منى ومشحون  
مشفوط زى قلم جاف  
من غير سين وأنبوبة  
هو: هنلخبط بقى ع الصبح  
اصطبحتى وقولى يا صبح..  
هى: معلش سماح النوبة  
توبة يا رب توبة  
مالك كداهو يا حبيبي؟؟!!  
قلقان م الفجر مزنهر  
راكبك تمانين عفريت  
أنا خايفة عليك تتهور  
هو: واحد صاحى متعوّر  
مخبوط وخدى مورم  
وطول الليل بتألم  
مذهول مش قادر اتصور..  
واحد نايم متززرر  
متشلفط حاله أغبر  
ومش عارف أتقلب  
طهقان ومزاجى متعكر  
هى: تكونشى زعلان لسة  
م الحادثة بتاعة امبارح؟؟  
يا حبيبي كبر مخك  
خليك بحبوح ومسامح  
فداك ألفين لآب توب  
محلّى أو مستورد  
حمد الله ع السلامة

يا ابو أجمل ابتسامة  
ووش حلو مورّد  
فداك مصنع لاب توب  
بكرة تروّق وتفكّ  
هو: يا منجّى من المهالك  
يا ستى كفاية مقالب  
هتجيني سكتة واطّب  
وايه المستوى دا؟!  
فيه حد يقول لجوزه  
بكره تروّق وتفكّ؟!  
هو انا حنطور عطلان  
والناس نازلة بتزق!  
هو انا آستك جربان  
مزنوق مش راضى يفكّ!!  
أكونشى فريسة يتيمة  
وقعت وسط التعالب  
محبوسة مش عارفه تغطّ!!!  
يا حفيظ من المهالك  
يا ستى كفاية مقالب  
هى: بقى يعنى ده جزاتى  
عاملة لحياتك طعم؟!  
بدلّج فيك شوية  
بديك طقمين حنية  
بساييسك فى زمن صعب؟!  
دى الدنيا معايا طبخة  
سبايسى ومش عادية

تستقبل أحلى طريحة  
بتفحّح منها ريحة  
نقاذه تقتل مية  
وانا احب المفاجآت  
غاوية مفاجآت  
بعمل فيك كل واحدة  
كل واحدة عن الثانية  
أنقح م المعجزات  
هو: تستقبل أحلى طريحة؟!  
حقيقى أفاطك بيئة  
هنلخبط بقى ع الصبح؟؟  
اصطبحى وقولى يا صبح..  
هى: معلش سماح النوبة  
وتوبة من غير عودة  
هو: دى تسميها مفاجأة!!  
ماتخلّيكى صريحة  
وانتى عارفانى كويس  
ماحبّش المآوحة  
وكفاية عليّا جداً  
أحداث ليلة امبارح  
هى: شكلك يا حرام مكبوت  
شايل منى هتموت  
إيه اللى حصل امبارح!!  
هو: إيه اللى حصل امبارح؟؟؟؟!!!!  
هى: قبل امّا ننام بشوية  
لما شوفتك معدّى

رايح أوضة الصالون  
وقفت مدارية  
واندسيت تحت الكنبه  
وقفلت التليفزيون  
وانت يا عيني ماشى  
بكل حسن نية  
قمت انا مديت رجلياً  
شوطتك وصرخت بخ!  
لقيتك اتبعترت  
بقللت وعملت تش!  
أنا كنت عايزة اتسلّى..  
نلعب مع بعض شوية..  
ماعرفش انك هتطير  
تدحرج فوق الأرض  
وتشد معاك السلك  
اللى مفروود بالعرض  
وتجرحر ورد الفازة  
تغرفطه يبقى قَرط  
بعدين يندلق البيض  
اللى مولّع فى الطاسة  
يمشى الصفار لوحده  
ويسيب بياضه مَلط  
وكل دا كله يحط  
فوق شاشة الكمبيوتر  
اللى شغال عليه  
تنشفط الصورة شفط

وف لحظة هوب هوب  
فرقع بارود البُنب  
ملامحه اتمسحت كشط  
وكمان راح لابس الطاسة  
واستسلم لمس كتاف  
فحفح منه الدخان  
وقلبه فط ونط  
خرس ماحطّش منطق  
ورفع الراية البيضاء  
سلّم من غير ولا شرط!  
هو: أنا مالى ومال البيضة  
ده انا حالتى كانت عيضة  
ما تفكرينيش بالطاسة  
دى جابت الخلاصة  
يا شيخة حرام عليكى  
إتقى ربنا فى عنيكى  
تاخدينى مقلب حرامية  
تشوطينى يا مفترية؟!  
وتدشديننا الفازة  
دا انا لسة شاربيها طازة  
تغتالى الكمبيوتر  
وتقلبيه سكوتر؟؟!!  
يا حبيبى يا كمبيوتر  
هبدّ ع الأرض مفرشح  
مكتوبله يموت مستلوح  
جيبتيه أرض أرض

مايقاش ليه طول من عرض  
هى: أنا كنت قصدى اتسلّى  
نتشاقى مع بعض شوية  
دا انا قلبى قطنة بيضا  
المادة الخام للعب  
الدنيا ساكنة هس  
وانا لازم اضحك شوية  
هو: يعنى الخلاصة إيه؟؟  
يا ست يا متربية  
وبالمناسبة ديا  
كل اللى قلته كوم  
ولسة الكارثة جاية  
دى كات عناوين النشرة  
وإليكم الأخبار..  
أنا الشحط الطويل  
بكل قيمتى وهيبتى  
إتكعورت على الأرض  
والشيشب منى طار!  
أنا الزوج النبيل  
بكل طيبتى وخيبتى  
شربت البيض ملهلب  
بُقَى طَلَع شرار!!  
ولقيتنى بقدرة قادر  
أنا بطل الجزء الثانى  
من أحداث فيلم العار!  
هى: شكلك يا حرام مفلوق



شايلى منى مزووك  
هو: بقالى كام أسبوع  
طالعان عيى فى الشغل  
ضهرى انقطم م القعدة  
عيى اتبرت م الحيسة  
قدام الكمبيوتر!  
أوراق مهمة جداً  
معاد تسليمها بكرة  
والشغل بحاله وماله  
ماكنتش لسة طبعته  
وأسير الكمبيوتر  
طبعاً أنا مش هروح  
ولا اورى وشى لحد  
كفايه أجازة طويلة  
ولاً جواب استقالة  
واقعد شحات بكرامتى  
على كوبرى ستة اكتوبر!!  
يا شيخة حرام عليكى  
إتقى ربنا فى عنيكى  
بقى بعد ما تطلع روحى  
أيام وليالى طويلة  
تيجى حضرتك ببساطة  
بمقالبك السخيفة  
تهدى كل حياتى  
وتطيرى الوظيفة  
بمقلب سخن سوبر؟!!!

يا عينى عليك يا جهازى  
تخلّى الشاشة بطاطا؟؟  
تمحى ذاكرته بلاطة؟؟!!  
آهو دلوقتى جاب جاز  
لا هيرجع كمبيوتر!!!!  
ولا نافع حتى سكوتر!!!!  
هى: إنت من غيرى فى البيت  
هتلاقى الدنيا غيبة  
ملوخية باينة برة  
من غير طشة ثقلية  
هو: وكل دا كله ليه؟؟!!  
علشان جناب الهانم  
عايزه تلعب شوية  
ومفيش حاجة تكيّفها  
غير مقلب الحرامية!  
هى: معلش سماح النوبة  
وتوبة من دى النوبة  
مالك بس يا نور عينى  
مقموص من إيه يا جميل؟  
هو: يا فرحتى بيكى يحتى  
يا فرحة أُمى ببحتى  
حسبنا الله فيكى!  
حسبى ونعم الوكيل!!  
هى: شكلك يا حرام مربوك  
شايِل منى ومحروق  
محطوط زى الغسالة

المليانة على الآخر  
ويا عيني مغيهاش مسحوق  
هو: هنلطش بقى ع الصبح؟؟  
اصطبحى وقولى يا صبح..  
يا شيخة حرام عليكى  
هى: أنا عارفة نفسى كويس  
طول عمرى يا ناس محسودة  
هو: تانى رجعنا لقاموس  
الألفاظ الغربية  
فيه حد يقول لجوزه  
غسالة من غير مسحوق؟؟  
والنبي على إيه محسودة؟؟؟  
على لون الدنيا السوداء!!  
مين دا اللى حرام مربوك؟!  
والع منك محروق؟؟!  
شايفانى قميص مبقّع  
مفيش أمل فى نضافته؟  
شايفانى كائن ضال  
مسحوبة منه بطاقته؟؟  
أكونشى شراب مقطّع  
تاه منه الفردة الثانية  
مش لاقى دليل براءته!!!  
هى: طالبة السماح والتوبة  
وحياتك آخر نوبة  
يا حبيبي كبر مخك  
خليك large ومتساهل

إعتبر ان انت أجازة  
وبتبلط فى الساحل  
فداك مليون وظيفة  
حمد الله ع السلامة  
يا ابو أجمل ابتسامة  
ووش اصفر مورم  
لكن العيون كواحل  
يحصل على قد ما يحصل  
لكن برضه فى الآخر  
حبنى ف قلبك بيدق  
يا ابو الرجال يا جاحد  
هو: ماتنكشيش الجرح  
وتقلّبي المواجه  
عدّى اليوم دا على خير  
أنا مش قاعد على بعضى  
أنا مش واقف على بعضى  
مخى سايح حرّان  
جسمى مكلبش سقعان  
مش عارف إحنا ف يوليو  
ولّا فى عز طوبة  
إمشى بقى من قدامى  
لا الطوبة تيجى فى المعطوبة  
وتباتى الليلة مخبوطة!  
هى: والله ما قصدى أضايقك  
أنا نفسى بس أساعدك  
أفتح نفسك ع الدنيا

طيب اقوللك على حاجة..  
لو مش عاجباك اللعبة..  
بلاش مقلب حرامية  
إيه رأيك نلعب صلح؟؟  
إنت هتدينى ضهرك  
وانا كل دورى أضرب  
وانت اللى عليك تختار  
مين اللى ضرب الضربة؟؟  
يا إما أنا يا مش انا..  
حزر فزر يا جميل..  
ونفضل كدا للصبح  
الليل أصله طويل!!  
هو: يا فرحتى بيكى يختى  
يا فرحة ابويا وأهلى  
تفتحي نفسى ع الدنيا؟!  
يا هانم احب اقوللك  
كلمة محشورة ف حلقى..  
أنا حاسس إن انا لايص  
نفسى اتسدت ع الآخر  
مش عايز حاجة م الدنيا!  
مش عايز اعيش فى الدنيا!!  
بعد اللى بيحصل فيّا  
ومقالب الحرامية  
عايزك تطمنى خالص  
أنا يا اللى اسمى جوزك  
إتعودت العبودية!!!!!!

شوفى عايزة نلعب إيه  
ما بقتش تفرق خالص  
أنا أصلى بكل صراحة  
زهدت فى الحرية  
هى: معلىش يا رب توبة  
خليها تعدى النوبة  
إوعى ف قلبك تشيل  
كبر مخك يا روحى  
هو: أنا ضعت وطلعت روحى  
دى عيشة مستحيل  
هى: ما تهدى آمال يا جميل  
هو: يا فرحتى بالمدام  
قضيتى عليا تمام  
يا رب يا كريم  
يا سامع يا عليم  
مش لاقى غيرها أقولها  
حسبنا الله فيكى  
حسبى أنت الوكيل!

## مايصحش كدة!!

هى: ساعات بقعد مع نفسى  
واخدها هناك على جنب  
نتمطع ونستريح  
ع السجادة المفروشة..  
أسأل روحى سؤال  
مش لاقياه إجابة  
خلانى بشد فى شعري  
خلانى ست مرووشة!  
أنا عايزه اعرف وحياتى  
إيه اللي خبطنى ف مخى  
خلانى انطس ف نظرى  
واتحدى كل أهلى  
وارضى بالراجل ده  
عنتر مصر المحروسة؟!  
ما انا كنت ف بيت ابويا  
مالية مركزى فى الحى  
أمل شبان الحارة  
أنشى ليها اعتبارها  
بتمختر ع السطوح  
زى البطة المنقوشة..  
طب نفرض قلّيت عقلى  
واتسرعت من جهلى  
وجاريت المتعوس قلبى

خَبَّيْتُ عَيْنِي لَتْنَيْنِ  
سَدَّيْتُ وَدْنِي لَتْنَيْنِ  
عَزَمْتُ وَاتْمَطَعْتُ  
بِقَرَارَاتِ مَشْ مَدْرُوسَةٍ..  
يَقَى لَمَّا أَجَى اتْنِيلِ  
وَاتْنِيلِ يَعْنَى اتْجُوزِ  
أَسِيبِ الْعَالَمِ كُلِّهِ  
وَاخْتَارِ مِنَ الْكُنَالُوجِ  
الرَّاجِلِ السَّادِجِ دَهْ!  
أَهَى جِتْ فَوْقَ أَمِّ رَاسِي  
قُرْعَتِي طَلَعَتْ مَغْشُوشَةٌ!!  
فِي الْوَاقِعِ أَنَا وَلَا فَخْرِ  
نَدْمَانَةٍ عَلَى اخْتِيَارِي  
بِقَالِي ثَلَاثَ سَنِينِ  
بِالْلَيْلِ أَوْ عِ الرِّيقِ  
بِشَوْفِ الرَّاجِلِ دَهْ  
وَاضْرِبْ نَفْسِي بِبِرْطُوشَةٍ!!!  
وَقَبْلَ مَا حَدِّ يَسْأَلِ  
بِسَلَامَتِهِ الْمَحْرُوسِ فِينِ؟  
أَجَابُ أَنَا بِالنِّيَابَةِ..  
الْبِيهِ الْحِيلَةُ هُنَاكَ  
بِيرْغَى فِي التَّلِيفُونِ  
دَلُوقْتِي يَجِينِي يَثْبَتْلِي  
إِنِ أَنَا نَابِيتِي تَشْكِيلَةُ  
سَادَةِ بِالْوَانِ مَنُفُوشَةٍ!!!!



هو: ما يصحش كدة يا حبيبتى!

معقولة واحدة زيك

لسه مش عارفة قيمتك؟

جالك قلب تقوليها؟!

أحلف بإيه يا روحى

جوازتنا دى بريفكس

ده انا جوزك مستر إكس

الدنيا تنام وتقوم

ولسه بتحلف بيها..

الناس فى يوم فرحنا

كانوا واقفين طوابير

حبّه ماسكين الشمعة

والباقى اتلسوع بيها

بيوسوكى وبياركولى

يدعولك ويوصونى

لستة وصايا عشرة

حقيقى استفدت بيها..

فاكرة يوميه يا حبيبتى

حصل حاجات وحاجات..

المعازيم البهوات

أكلوا لحد ما شبعوا

وبعد ما شبعوا أكلوا

وحلّوا ثم أكلوا

ولمّا أكلوا حلّوا

بعدين فى الآخر خالص

خدوا بعض وراحوا اتعشوا..  
دا يوميهـا حصل حاجات  
تحكيها مجلدات!  
هى: تسعين مرة تحكىلى  
نفس الحواديت اياها  
فلان عمل وسوى  
والثانى اتغاظ واتقلّى  
هو: خلّى بالك يا حبيبتي  
حصلت تفاصيل كتيرة  
إنتى ماتعرفيهاش  
أنا شوفتها م الشباك  
أنا حالاً هجيب كراسى  
واحكيلك بالتفصيل  
بالتفصيل الممل  
كل اللي الأحداث هناك  
هى: بالتفصيل الممل؟!  
يا معز يا مُذِل..  
هو: أحلف بإيه يا روحى  
يوميهـا حصل حاجات  
ترويهـا مجلدات  
هى: إرحم ودانى شوية  
وكفاية رعى حرام  
وحياة كل الأموات  
مش عايزة أسمع حاجة  
أنا عندى صداع لوحدى

أبوس إيدك إرحمنى  
م الرغى والحكايات  
هو: أحكيك الحكاية..  
هى: يا ريتنى كنت هربت  
أو رجعتك الشبكة  
وعلى نفسى كتبت شيكات!  
أو اتسجنت ظلم  
وبقيت من الغارمات  
ياريت المأذون يومها  
كان جاله جفاف مُرْكز  
وهَّقه لورى ومات  
هو: نبدأ أول حكاية  
هى: قصدك حكاية اللورى؟  
هو: أنا مالى ومال اللورى  
أنا بتكلم عن يومها  
ليلة ذكرى فرحنا  
دا اللى حصل يا حبيبتى  
يمللنا مجلدات!  
نبدأ م الصفحة الأولى..  
هى: إتكلم بقى على راحتك  
إرغى على قد ما ترغى  
بقوللك إيه يا حبيبى  
إسمع منى اقتراح  
يمكن يلحقلى الباقي  
من عمر عدّى وراح

هو: ما يصحش كدا يا حبيبتى!  
جالك قلب تقوليها؟  
دا انا كلى تحت أمرك  
وهى يا دوب حكاية  
حتماً ولا بد احكيها..  
هى: أحسن تحكيلى حكاية  
مدام مامتنا الغولة  
أقله ليها بداية  
وانشالاً نلاقى نهاية..  
لكن حواديت فرحنا  
مقطوعة يا عيني من شجرة  
ولا عارفالها بداية  
ولا باين ليها نهاية  
هو: ماهى دى حلاوتها يا ستى  
أحلى حاجة فى الدنيا  
إننا نفضل نتكلم  
ونقصى كل العيشة  
كلام فى كلام فى كلام  
أحلف بياه يا حبيبتى  
كيفى الوحيد فى الدنيا  
التفاصيل المملة  
دا ف دمي يا ناس إدمان  
ويعنى المشكل إيه  
همّا شوية صدا ع  
يا ستى سيبك وارمى

يتعالج بالبرشام  
هى: المُشكل المستعصى  
فى عمرى اللى معاك  
إتزحلق منى وضاع  
هو: مايصحش كدا يا مراتى!  
جالك قلب تقوليها؟  
هى: بقالك ثلاث سنين  
بتحكى بلا انقطاع  
بقالك مليون يوم  
مابتفصلشى التيار  
إعملك قفلة شوية  
هتجن من الصداع!  
هو: نبدأ م الصفحة الأولى  
هى: وكرانى مش بتكلم!  
إديها بقى على كيفك..  
إرغى على قد ما ترغى  
هو: بالتفصيل الممل  
هى: يا مُعز يا مُذل  
هو: نبدأ م الصفحة الأولى..  
يا ستى لما إنتى  
بصيلي امال يا حبيبتى  
قبل امّا نقول ونحكى  
نسمى بسم الله  
يا رحمن يا رحيم  
هى: وكمان بتسمى عليّا

تكونشى ناوى تدبحنى  
على العيد اللى جاى  
يا عديم الإنسانية؟؟  
هو: جالك قلب تقوليها؟  
مايصحش كدا يا حبيبتى!  
دى مامتى تعزك جداً  
هى: وانا أمدى داعية علياً  
عبيط مين اللى قال  
إن الستات رغبة  
مايتطلشى كلام؟!  
تبدأ أول حدوة  
تلتضمها ف تانى حدوة  
مايهمش لو كات حلوة  
ولاً بايخة وملتوتة  
هو: آيوه الستات رغبة  
حتى اسألى ست سعاد..  
والست سعاد يا جماعة  
بطلة حدوتى الأولى  
هى: حمار مين اللى أفتى  
وقال الستات ماركة  
عليها لسان ممطوط  
تتلفع بيه م الجيزة  
يوصل حدود أسبوط  
هو: أنا جيت اكياس اللب  
وشوالين السودانى

القعدة هتحدى جداً  
وان خلصنا السودانى  
أنا عندى جوا تانى  
هى: وِكانى مش بتكلم  
سمّعنى يا سيدى اشجبنى  
إرغى على قد ما تقدر  
الله يرحم ودانى  
هو: بالتفصيل الممل  
هى: يا مُعِز يا مُذِل  
هو: نبدأ م الصفحة الأولى  
فى مجلد الحكايات  
شوفناها يوم فرحنا  
ما بين الست سعاد  
والواد ابن ام زينات  
نبدأ منين يا ستى؟!  
من طلعتهم ع السلم  
لحد ما دخلوا علينا  
وايديهم آنجاچيه  
الواد ابو مناخير نمم  
رگز ع البدلة بتاعتى  
المكوية المغسولة  
وف ذاك نفس الوقت  
كان بيعد الأطباق  
ع التراييزة المفروشة  
أما الليدى سعاد

دى جاتلك م اليمين  
عملت نفسها بتشمشم  
الورد والرياحين  
وهى يا ستى إيه..  
جايه تنقر فستانك  
وتوضيات الكوشة!  
شكلك مش فاكرة خالص  
وعايزة تفاصيل أكثر..  
قبل امّا تيجى سعاد  
والواد ابن ام زينات  
كانت المدام عدلات  
هى وبنتها عدلات  
ماهم لتنين عدلات!  
جولى يدوقوا الشربات  
ومعاه حتّة فرقوشة  
خبطونى من عشمهم  
وانا ماسك الكباية  
وانتى يا روحى اتخصّيتى  
لما الكباية اندلقت  
اتلطشت خصلة شعرك  
والقصة راحت منكوشة  
إوعى تكونى مش فاكرة؟؟!  
هى: إعتقنى لوجه الله  
إفرج عنى مش قادرة  
هطق يا ناس مفروسة



أخلف بآيه يا حبيبي..  
ليلي كان عندها حق  
لما قلبت سى قيس  
مش علشان سمعتها  
ولا إنه جاب فى سيرتها  
ولا حاجة من دى يا سيدى!  
أصل الحقيقه المَره  
إن الأفندى قيس  
كان شاعر خيخه رعاى  
طول النهار أشعار  
وطول الليل أشعار  
دى حاجة تجيب الضغط  
وتجيب لليله العار  
بس صراحه الواد قيس  
لما لع واكل منشار  
إيش جاب قيس للمنشار؟!  
أصل المسأله مسمار  
دخل رجله فى الخيمه  
قوم ليلي افكرته جاي  
من كتر حبه فيها  
وانه بيصرخ أأأأأأأأأأأأ  
من كتر شوقه ليها  
ماتعرفشى الحكايه  
ماتعرفشى ان قيس  
ماكانش عنده حمار

ما هو لو كان راكبه يا ليلي  
ماكانش قيس اتعور  
وداس على المسمار!!  
هى: وكمان خيالك واسع؟  
مش عايزة اسمع حكايات  
هو: يا حبيبتى دى مش نزوات  
دى حاجات تُحكى وتُروى  
فى طِن مُعلقات  
هى: من فضلك إسكت حبة  
ويا ريت تتهد شوية  
أنا عندى يا ناس صدا ع  
أبوس إيدك إعتقنى  
أبوس رجلك طلقنى!  
هو: مايصحش كدة يا حبيبتى!  
جالك قلب تقوليها؟  
هى: إتكلم بقى على راحتك  
إرغى فى رغاوى إرغى  
هو: يا مراتى يا حبيبتى  
دلوقتى حان الدور  
ع القصة اللى تليها  
بصى يا ستى اما إنتى  
الست جارتنا الحلوة  
أم البنت السهتانة  
اللى بتاكل لبانة  
ما هو كله جالنا يوميه

يوم الفرح الميمون  
على حرمننا المصون  
قصدي فرحنا يا حبيبتي  
لتكوني اتلخبطتي؟؟  
والله انتي اتلخبطتي  
أقولك طيب أقولك  
إحنا نخزي الشيطان  
ونبدأ م الأول خالص  
وخالص يعنى خالص  
هى: إرغى يا جوزى إرغى  
إرغى على قد ما ترغى  
بقى فيه فى الدنيا كدة؟؟؟؟؟  
هو: سيبيني أحكى واففض  
إدينى فرصة أزقطط  
مش بتردى ليه؟؟  
نمتى ولا موتى ولا إيه؟؟!!  
والله مايصحش كدة!!!!!!!!!!!!!!!!!!!!!!!!!!!!!!

## مطرح ما يسرى..

هى: بدون مقدمات أو كلام كثير

أنا عايشة عيشة ضنك

بائسة وحالتى كرب

بَنَهَجْ كَانِي فِي حَرْب

مش عارفة ابدأ منين

أصل الموضوع كبير..

مخرج جداً خطير..

قد يتصور البعض

إن انا ست دلوعة

بشتكى م العيشة الفقر

وعايزة البس حرير..

قد يفتكر البعض

إن انا بتجنى عليه

قرفاه ضُهر وعصر

بطلباتى الكثير..

واللى حاصل بالعكس

والله ثلاثة بالعكس

على مهلكم علياً

أصل انا نفسى مقطوع

من غير مقدمات

كل ما فى الموضوع

إنى استلمت جوزى

م الآخر كدة مفجوع!  
هو: أيام زمان وانا عازب  
جوزك كان قايم نايم  
عايش بايش فى المطعم  
ماكانش عندى شغلة  
غير أطلب طلبات ياما  
وافضل أكل وألغ  
ومش لازم أستطعم!  
أنا فاكر مرّة الكشرى  
كثّرت فيه الدقّة  
وحزّمتة بالشطة  
عملت فيه دوامة  
وعشان اطفئ النار  
ملت السلطانية  
فنتاس مهلبية  
غرقانه زيب على سكر  
ولبستها عوامة..  
هى: أصحابى قبل الزفة  
إستلموا هدوم اجوازهم  
قبل الدخلة بشهرين..  
واحد لخبطها ف قفة  
والتانى عبّاها ف بقجة  
والتالت جابها ف طرد  
والعايق فى شنطتين..  
إلا حبيبى يا جوزى

يا حرام مشغول ع الآخر  
ماجابش أوضة النوم  
وجّهز مطبخين..  
قبل الزفة بيومين  
داخلين نراجع الشقة  
ونشوف حاجتنا فين  
وأنا فرحانة بغنى  
على زغاريد العيلتين  
قوم ييجى حبيبى جوزى  
قبل اما يبقى جوزى..  
رمى كل هدومه ع الأرض  
وكسفنى كسفتين!!  
دا رمانا كلنا ورا ضهره  
خد ديله ف صف سنانه  
وطيران سنّ سنانه  
وسبقنا هناك ع المطبخ  
قصدى المطبخين..  
رحت وراه م الفضول  
وأنا بالى عليه مشغول  
لقيته فارس فرشة  
كباب وكفتة وطرب  
وجنبها سمكتين..  
من إخراجى اتسمرت  
وعزمت بداله ع العيلة  
وهو ولا على باله

قاعِد بيلُغْ لوحده  
وفارش فرشتين..  
متضرر من وجودنا  
يمكن بَاصين فى اللقمة  
يعنى لولا الملامة  
كنا قبل الجواز  
كان رزع الباب فى وشوشنا  
وقاملنا تف علينا  
وطردنى بالعلتين!  
هو: نعمة ربك يا هانم  
لازمالها حمد وشكر  
لتزول من وشنا خالص  
هى: بالهنا والشفاء يا حبيبى  
مطرح ما يسرى يمرى  
أنا ماتكلمتش خالص  
هو: ديمها يا رب نعمة  
واحفظها من الزوال  
هى: يا ربى لا اعتراض  
دى عيشة عال العال  
بس الكيل بيّا فاض!  
هو: والنعمة تعبّت خالص  
هى: الله يكون فى العون  
وانت قبل ما تتجوز  
كنت بتصرف منين  
على كل الوجبات ديّا؟؟

هو: البركة فى الجرسون  
ضربت معاه صحوية  
بقى يتوصى بالأكل  
والسعر يخفُّه شوية  
بموافقة صاحب المطعم  
وساعات كان من وراه  
كانت حياة صحية  
الصبح قدرة فول  
والليل سمنة بالليّة  
هى: الله يكون فى العون!  
هو: ما انا قايم نايم فيها  
ويكسب كل يوم  
جايزة أحسن زبون  
هى: ماهو طبعاً جايزة يوماتى  
دا انا لو منهم أدّيلك  
أرفع وسام للحاتى  
هو: آهى ذكريات جميلة  
كله اتهمض وساح  
أيام ما كنت باكل  
سبع طقات فى اليوم  
واحبس بشيشة تفاح  
هى: واتغير إيه دلوقتى؟!  
يا دوب غيرت المطعم  
جيتتنى طباح ببلاش  
وانا اللى شربت المغرز



محبوسة حبس انفرادى  
فى قلب حلل المطبخ  
وعايشة مع تمساح!  
واقفة على طول على قدمى  
ما يقتش حاسة برجلى  
ولا عارفة راسى من كتفى  
وكرهت أسامى الأكل  
قاعدة اتحسّر على عمرى  
آه ياللى ولّى وراح  
هو: دى أحلى حاجه يا ستى  
ريحة الفرخة المقلية  
مسنودة بجوزين حمام..  
أمتع تحببشة فى الدنيا  
تتبيلة البفتيك  
بلمون وحبهان..  
والليلة تبقى عيد  
مع طاجن بامية مسبك  
والحلو بلح الشام..  
هى: يا ربى لا اعتراض  
بس الكيل بيا فاض!  
هو: نعمة ربك يا هانم  
لازمها حمد وشكر  
لتزول من وشنا خالص  
هى: بالهنا والشفاء يا حبيبى  
مطرح ما يسرى يسرى

أنا ماتكلمتش خالص  
هو: ديمها يا رب نعمة  
واحفظها من الزوال  
هى: الله يكون فى العون!  
بس انا نفسى من فضلك..  
هو: نفسك فى صحن لوبيا؟  
هى: لأ!  
هو: نفسك فى شفشق سوبيا؟  
هى: لأ!!  
هو: أمال نفسك فى إيه؟!  
يا حبيبتي آهو بالمره  
نزود صنف كمان  
على قايمه العشا  
إنشالاً يكون فشار  
آهى شعله زيت ونار  
لزوم الدندشه..  
هى: كل اللى نفسى فيه  
أسأل واحد سؤال  
تكونشى فاكرنى جارية  
عند هارون الرشيد؟!  
تكونشى فاكرنى مجرى  
وابور سكك حديد؟؟!!  
يا سيدى أنا بنى آدم  
من حقى أناام وارتاح  
أنا واقفه معاك على شعرة

والكبت آخرته مُرّة  
أنا مخى يا عالم ساح!  
هو: بمناسبة سيرة آدم  
فكرتيني بالفاكهة  
وأصناف التفاح..  
إسمعى كلمة خبير  
بیسف الخیر قناطیر  
ومتخصص تفاح..  
فيه تفاح أمريكانى  
دا بریمو سره باتع  
ونوع م الأحمر يانى  
يا طعامته لو كان فاقع  
واللى مستوى ع الآخر  
ممکن نشيله عصير  
ونعلقه فوق فى النجفه  
أو زينة فى الدور التاسع  
وندلّل التفاح  
ودا كله استعدادات  
لأجمل يوم فى الدنيا  
يوم ما يهل علينا  
تاريخ عيد التفاح  
هى: فيه حاجه فى الدنيا يا راجل  
إسمها عيد التفاح!!  
هو: ما هو أنا عملتله عيد  
مش قادر أمنع نفسى

بحبه حب شديد  
هى: ذا التفاح سعره غالى  
بشئىء وشويات  
هو انت معاك فلوس  
تجيب سبع حبات؟!  
هو: علشان التفاح غالى  
مش ممكن اجيبه كثير  
وساعات بقاطعه مجبر..  
وساعات بخاصمه مكره  
استخدمت التفكير  
أى فاكهه تقابلنى  
بسميها تفاح!  
أى مدلدل م النجفة  
يبقى عندى تفاح!!  
هى: يا ربى لا اعتراض  
بس الكيل بيّ فاض!  
هو: والنعمه تعبّت خالص  
هى: الله يكون فى العون!  
هو: عندك أى اعتراض؟  
هى: أنا ماتكلمتش خالص!  
بقى انت جنابك عامل  
يوم عيد للتفاح!!  
يا سلام على التفانين  
يا جمال العبقريّة  
طب إيه رأيك بالمرة

تَدِينِي القشِر عِيدِيَّة!  
هو: واللّهُ برضه فكرة..  
هى: وما دام المسألة سهلة  
ننشن بقى ع المشمش  
نعملُّه سهرة تحفة  
هو المشمش صغن؟!  
واقع من قعر القفة؟!  
بالهنا والشفّا يا حبيبي  
مطرح ما يسرى يجرى  
هو: نعمة ربك يا هانم  
لازمها حمد وشكر  
هى: إحميها من العيون  
يا رب ألف شكر  
هو: ديمها يا رب نعمة  
واحفظها من الزوال  
هى: اللّهُ يكون فى العون!  
ساعات بيتهيألى  
إنك مانتش معايا  
إنك مانتش شايفنى  
هو: طب وانا كان إيه حايشنى؟  
هى: أقولك وماترعلشى؟؟  
من غير إحراج يا حبيبي  
هقوللّك وانت الجانى..  
كرشك كبر وتوحّش!  
طالع مترين وتجحّش!!

زى المقطورة التايهة  
مركونة صف ثانى!  
أجيلك م اليمين..  
أجيلك م الشمال..  
مش عارفاله خريطة  
مفيهوش علامات مضيئة  
ضلمه خالص وكُحل  
ربما والله أعلم  
جواه ييجى ست عيال!  
هو: كل دا كاتماه فى نَفْسِك؟  
بعبعى قولى اللى ف نفسك  
هى: ما هو فيه حاجه تنقال  
وحاجات تانية ماتتقالشى!  
بصراحة كرش جنابك  
كاتم نَفْسى فى الدنيا  
حقيقى يحاول انساه  
يحاول أتجاشاه  
بس اهرب منه فين؟!  
سادد عليا الدنيا  
هو: دا قبل الأكل وبعده؟  
هى: دا عامللى أزمة عظيمة  
الظهر وساعة النوم..  
ماتخلنيش أفسر  
أنا صرّة ف قلبى ويغلى  
ماهو فيه حاجات تنقال

وحاجات تانيه ماتتقالشى!!  
هو: الكرش دا يا حياتى  
شبعان ربايه ع الغالى  
هى: نفسى تقولللى "شبعان"  
إنشالاً ولو بالكذب  
وانا يعنى هصدق عادى  
مش كل ما تشوف وشى  
تصرخ فيّا "جعان"  
إنشالاً ولو بالغش  
إكراماً لعيد ميلادى!  
هو: بمناسبة عيد ميلادك  
لقيت كتير لقيت  
دابت كعوب رجلياً  
لحد ما لقيت أجمل  
هدية لأحلى هدية  
هى: يا رب إنت الهادى  
ورينى جبتلى إيه  
يا أعز حابه ليّا  
هو: أحلى كبشة وإيد هون..  
بقالى كام مرّة ملاحظ  
إن البندق والجوز  
بيعكسوا معاكى فى الصحن  
وبينحشروا فى سنانى  
الله يكون فى العون  
هى: جايبلى فى عيد ميلادى

أحلى كبشة وإيد هون؟!!!!  
هو: وانا ليّا غيرك مين  
يا رب تطبخيلي  
لحد سنة مليون  
هى: الله يكون فى العون!  
هو: والنعمة تعبّت خالص  
هى: أنا مش هتكلم خالص  
هو: نعمة ربك يا ستى  
لازملها حمد وشكر  
لتزول من وشنا خالص  
هى: يا ربى لا اعتراض  
بس الكيل بيّا فاض!  
هو: ديمها يا رب نعمة  
واحفظها من الزوال  
هى: نصيحة لكل شابة..  
وصية لكل فتاة..  
إرضى بجوزك فقير  
إنشالاً يكون حقير  
هيجيله يوم ويكبر  
هيجيله يوم وينصف  
بس اياكى تعيشى  
مع جوز بقة مفتوح  
كرشه ستين فدان  
قايم نايم مسروع  
زى البكابورت الطافح



ومش ممكن هينشف!  
هتلاقى نفسك زى  
ورا كل أكلة تقولى  
بصوت كداب مسموع..  
بالهنا والشفا يا حبيبي  
مطرح ما يسرى يهرى  
أنا نايمة هناك فى المطبخ  
عايشة وقيمة فى المطبخ  
إندهنى لما تجوع!  
ولو نويت تسافر  
من غير ما تقوللى إمشى  
يالاً ف ستين سلامة  
يا جعان يا ابن المفجوع!!

# جوزك وملك إيديكى

هو: طول عمرى بشوف فى الفيلم

راجل يدعك فانوس

يطلع له الواد عفريت

يقول شببك لبيك

عبدك وملك إيديك

تطلب إيه يا ننوس؟!

هى: الله ينور عليك

شفت الواد اللطيف

أبو قلب شجاع مخيف

عارف إنها من بدى

حتة شكة دبوس

لعبة هتجيله فلوس

هو: يا حبيبتى دا شغل سيما

ألاعيب موضة قديمة

بعدين دا فيلم كوميدى

بنضحك بالفلوس

هى: بنضحك والسلام

هو: أنا معاكى يا مدام

ما انا بفضل قاعد اتفرج

لحد الواد ابو فانوس

ما يدعك الفانوس

علشان عايز فلوس

ويقوم فوراً أنام

هى: وانت خايف من إيه؟  
 ماهو كله فى التمام  
 هو: أنا عمرى ماغشتكيش  
 من يوم ما عرفتيني  
 من يوم ما اتجوزتيني  
 وانتى حافظانى كويس  
 موتى وسمى حاجتين  
 بتوتر أوى م الزحمة  
 قلت ماتتريقيش!  
 وبخاف أوى موت م الضلمة  
 بطلع مليون خرابيش!  
 بعدين معاكى يا ماما  
 من فضلك ماتضحكيش!!  
 هى: يا رب انشالاً تعيش  
 بعد الشر يا حبيبي  
 ما انا عارفة وراضية يا سيدى  
 هو انا كنت اعترضت؟  
 ولا انا أصلاً نطقت؟؟  
 دا حتى عيب ماتجيش!!  
 هو: طب عايزة منى إيه؟!  
 مش عايز اشوف الفيلم  
 وسببيني أعيش مع نفسى  
 هى: الله ينور عليك  
 يا جوزى يا روحى وبعلى  
 ما هو إحنا متفقين

وانا عمرى خلفت وعدى؟  
هو: الله ينور عليكى  
هى: ربك لحد الآن  
مرزقناش بالعيال  
ومفيش زحمة فى البيت  
يعنى جوة محلولة  
لكن بقى برة البيت  
إتصرف فى الفوزرة!  
يا رب تهاجر برة  
تَفْنَى العالم بالذرة  
علشان نخلص م الزحمة  
الناس مبقاش فيها رحمة  
هو: أنا همشى معاكى للآخر  
مالناش دعوه بالزحمة  
هى: قُضْنَا من سيرة الزحمة  
هو: خَلِّينا نروح للضلمة  
هى: البيت على طول موَّلَع  
كهريا فيه صبح وليل  
أما من حيث النوم  
ماكانش عندنا غير  
نرضى راحة الطرفين  
بالذات أثناء الليل  
هو: بالذات أثناء الليل..  
هى: بما إنى ضد النور  
هو: بما إنى عدو الضلمه

هى: الحل كان سهرايه  
وبهذا يناموا لتنين  
هو: أنا همشى معاكى للآخر  
مالناش دعوة بالضمة  
هى: قُضنا من سيرة الضمة  
هو: بعدين وياكى يا ماما  
إنتى بتضحكى على إيه؟!  
أنا عارفك ست لثيمة  
هى: طب عايز منى إيه؟  
سيننى مع نفسى أعيش  
أنا راضيه أكون لثيمة!  
هو: هو انا حوشتك يا ستى؟  
يا رب تروحى السيمما!!  
هى: كمّل معايا الفيلم  
والواد أبو الفانوس  
هو وأونكل عفريت  
هيعملوا إيه مع بعض  
علشان خاطرى يا حبيبى  
إياك تخاف يا نصيبى  
اقعد معايا شوية  
لحد آخر الفيلم!  
هو: مش عايز اكمل زفت  
شاريالى أكبر شاشة  
قلبالى بيتنا سيما؟!  
هى: إوعى ماتفتحش الشيش..

هو: وكمان قفلالى الشيش!  
هى: أنا أصلى أموت فى الزبطة  
هو: حاسبى تهدِّلنا الحيطه  
ويلاش سيرة الموت  
كلامى واضح ولاّ  
لسة مافهمتنيش؟  
هى: بعد الشر يا حبيبى  
هو: لو ليّا خاطر عندك  
يا ريت وحياة أبو والدك  
مرّه ماتستعيطنيش!  
هى: يا رب انشالاً تعيش  
أنا يا حبيبى بستعيط!!  
دا انا لو قعدت اتنطط  
على طول دراعى ورجلى  
مش ممكن عمرى ما هقدر  
فيك إنت يا روحى أخبّط  
هو: حاسبى يا ستى القميص  
إوعى لحسن يتبطط  
هى: مالك ومال السيما؟!  
هو: شغلى كل الأفلام  
جديدة ولاّ قديمة  
نكديه ولاّ سعيدة  
كل المكتبة قدامك  
عاطفية وميلودرامية  
واقعية ورومانسية

تسالى أفلام هابطة  
إنشالاً مُسَفَّة ساقطة  
كل القنوات قدامك  
إلا أفلام الرعب  
دا شىء يقص العمر!  
هى: الله ينور عليك  
يا جوزى يا روحى وبَعلى  
ما هو إحنا متفقين  
وانا عمرى خلفت وعدى؟  
هو: طب عايزة منى إيه؟!  
هى: هو انا كنت اعترضت!  
ولاً أصلاً نطقت!!  
ما تخافشى من العفريت  
ما انا قاعدة مزروعة جنبك  
إستنى الله يهديك  
كَمَل معايا الفيلم..  
هو: يا مراتى الله لا يسينك  
مش عارف اقوللك إيه؟!  
لو عايزة تعرفى سرى  
أنا برضه مش هخبى  
أول مرة هحكيلك..  
من صغرى عندى عقدة  
ألفين عقدة وشنيطة  
لحد ما بقيت تحفة  
واتمليت كلاكيع

أخويا الأكبر منى  
كان قاسى أوى شرانى  
شايف روحه شجيع  
غاوى أفلام الرعب  
وماكاتش تحلى الفرجة  
غير نص الليل بالظبط  
وبشغلّ فيلم فظيع  
وكمان كان يطفى النور  
واللى مش عاجبه يغور  
واحنا شرك ف أوضة واحدة  
من خوفى افضل مفنجل  
ويادوب انام ع السريع  
دا انا شوفت معاه ليالى؟!  
وهو واخدها تسالى!!  
كنت بخاف منه موت  
واشتكى لأبويا يقوللى  
كل واحد وشوقه!  
هى: الله ينور عليه  
هو: كل واحد فى الدنيا  
حر يا عالم فى ذوقه  
هى: ما هو إحنا متفقين  
لكن فيلم الفانوس  
والواد صاحب العفريت  
ماسموش فيلم رعب  
دى حاجات كلها تناتيش



دى زغزغة كدة ع الطاير  
مخلوق بجناح وضاير  
من برّة بس يخض  
والآخر كله مغيث  
بيقول شبك ليك  
عبدك وملك إيدك  
يبقى هيئذيه ازاي؟!  
هيدوسه بأنهى وش؟!  
والله عيب ماتجيش  
وحتى لو هيدوسه  
دى يا دوب شگّة دبوس  
عفريت شقى ملحوس  
مايهزّش كلب كنيش  
هو: ما بلاش سيرة الكنيش!  
هى: بعد الشر يا حبيبي  
يا رب انشالاً تعيش  
هو: الله ينور عليكى  
ما هو إحنا متفقين  
هى: يا جوزى وروحى وبعلّى  
أنا عمرى خلفت وعدى؟!  
هو: طب عايزه منى إيه?!  
سببيني أعيش مع نفسى  
أعمل كل اللى ف نفسى  
ولما اموت يا ستى  
هاتى أفلام الدنيا

وابقى شوفيها من بعدى!  
هى: ودا إسمه رعب دا؟؟!!  
تعالى شوف الشغل  
والخضة على حقيقتها..  
آمال لو شفت الواد  
اللى بيلعب دراكولا  
لما فضل وراها  
البنـت الحلوة السمرة  
م القلعة لحد بيتها  
بالليل والدنيا ضلمة  
والعالم هُـس هُـس  
ظهر ورا العامود  
وراح بالعافية شاددها  
أتاريه بقاله ساعتين  
ماشى وراها يراقبها  
وهى يا عينى م الخضة  
ولا حطت أى منطق  
شعرها فأفأ وطأطأ  
مصدومة فى الواد دراكولا  
وهو راح عاضضها  
قرمها حتة قرمه..  
فرتك عروق رقبته!  
هو: بعدين معاكى يا ماما  
من فضلك ماتضحكيش  
أنا عارفك ست لثيمة

للمرة الألف بقولك  
يا ريت وحياة دراكولا  
مره ماتستعطينيش!  
هى: بقى أنا يا حبيبي يستعبط  
دى صوابع إيدى بتطأطأ!!  
هو: حاسبى القميص يا ستى  
قومى لحسن يتبطط!  
هى: يا رب انشالاً تعيش  
هو: فرحانة خلاص دلوقتى؟  
ولاً تكونيش كمان  
بالمره مابتشوفيش؟؟؟  
أجيبك المراية  
تشوفى وشى الأصفر  
المطفى زى الكركم..  
ومفتل زى الفوطة!!  
هتعملى بيّا إيه  
وانا قصادك يا هانم  
مُحبط وسُكتم بُكتم..  
بُصّى ف إيدى ورجليّا  
تلاقِيهم نشفوا طوية  
طُلّي فى بياض عنّيّا  
تلاقِيهم قوطة معطوبة  
أنا تحكىلى دراكولا؟؟!!  
مصاص دم الغلابة؟؟!!  
إنتى فعلاً قوية

وست مش مسئولة  
أدينى هقعد للصبح  
مرعوب ملزوق فى مكانى  
زى العيل لومؤاخذه  
اللى من غير كفولة!  
هى: بالراحة يا حبيبى على نفسك  
يا ربى جراه إيه؟؟!  
هو: بالذمه استفدتى إيه؟  
وعايزة منى إيه؟؟  
يا ستى انا حر ف نفسى  
كل إنسان وشوقه  
هى: أساساً كل واحد  
مؤكد حر فى ذوقه  
هو: الله ينور عليكى  
ماهو إحنا متفقين  
وانا عمرى ما خلفت وعدى  
شوفتينى فى يوم غدرت؟  
يا ستى سبينى لوحدى  
هى: هو انا كنت اعترضت؟!  
ولاً أساساً نطقت؟!!  
أنا دايماً عند وعدى  
هو: يمكن تقولى ف نفسك  
علياً إنى جبان  
حابس نفسى فى النور  
زى قط الجيران

هى: حاشا لله ماتجيش  
يا رب انشالاً تعيش  
هو: يا رب اسمعها منى  
أنا بدعى عليكو ف سرى  
ياللى بتعملوا أفلام  
ترعبوا بيها العيال  
إلهى يبتليكو  
بكلب ويكون ضال  
بيعانى م الهشاشة..  
بيجى ويحط عليكو  
ببيع عمره طال  
هربان من قلب الشاشة..  
هى: وحياتك إنت يا باشا  
دا كله مش حقيقى  
بالعربى كدا تمثيل  
هو: ماهو إحنا متفقين  
موتى وسمى حاجتين  
الرحمة وأم الضلمة  
ودا جد ومش تمثيل  
هى: طب تعرف إيه جديد؟؟  
تصوير مشاهد الرعب  
عز النهار والنور  
هو: والله براؤو عليهم  
عشان تكمل من كله  
يبقى لا ضلمه ولا نور!!

هى: شوفتش فيلم "الأشباح"؟؟  
لما الواد بلغ الشمعة  
وشه بقى عجوة وساح  
وراح مقسوم نصين  
اتنين موجب وسالب  
بقى عامل زى الجزمة  
المرصوفة ف قوالب  
وانا واقعة تحت بكركر  
فطسانة على روحى م الضحك!  
أصل الواد ابو ضيين  
اللى قسموه نصين  
الخالق الناطق خالتى!  
ورغم حالته الكرب  
الواد فضل يجاهد  
وطرانا قام على حيله  
والآخر راح للبطلة  
ركع على ركبة ونص  
قاللها يا حبيبتى يختى  
أنا جيت شيبكى لبيكى  
العجوة ملك إيديكى!  
هو: دا انا المسكين جوزك  
ملك إيديكى ورجليكى!!!!  
هى: يا حبيبى دا كله نَصْ  
ألاعيب وشغل سيما  
هو: دا انا اللى بقيت فى البيت

ولا فردة صرمة قديمة!!  
أنا من دلوقتى بقوللك  
مش عايز منك حاجة  
وأحب اطمئن قلبك  
أنا تقريباً عمومأ  
ما بقتش انفع فى حاجة!!!!!!  
هى: هو انا أصلاً نطقت؟  
ولأ انا كنت اعترضت؟؟  
معأ: والمطلوب منى إيه؟؟؟؟  
طب يعنى الحل إيه؟؟  
هو: كل إنسان وشوقه  
يا رب اللى بيتريق  
يحس الخوف ويدوقه!  
هى: ما هو إحنا مختلفين  
وعمرنا ما اتفقنا  
هو: الله ينور عليكى  
معأ: وعمومأ كل واحد  
حر يا عالم فى ذوقه.....

## يا بتاع العسلية

هو: زمان أوى اتمنيت  
أملك في الدنيا بيت  
عدت سنين واياهم  
أنجرت كل مرادى  
بقى عندى أجدها بيت  
نشكر ربنا على نعمه  
أنا عمرى ما اشتكيت..  
هى: يا رب خلّى وبارك  
إحرسلى راجل البيت  
هو: وانا عيل اتمنيت  
أبقى معلّم كبير  
شقيت وكافحت سنين  
واتحقق اللى ف بالى  
بقيت أتقلها معلّم  
نحمد ربنا على رزقه  
مفيش مرّة اشتكيت..  
هى: إسم الله عليك يا سبعى  
يا مستتنى فى البيت  
هو: لكن مع الحریم  
طلع الزمن بخيل  
ليلة كرت ليالى  
والست مشلفطة عيشتى  
بقيت مش طابق البيت



على رأى الست سومه  
يا ريتنى ما حبيت!  
هى: جرى إيه يا معلّم حاسب  
هو احنا كل ليلة  
هنعيد نفس الموال  
ودينى أسيبك وامشى!!  
أسيبك البيت وامشى؟؟!!  
ما تشيل احسن ربابة  
واسرح بيها فى الشارع  
وتعيد زمن متقال!  
يا راجل مابتزهقشى؟!  
بالذمة مابتشبعشى؟؟!!  
لو عايز الجد بجد  
تعالالى يا ابو الرجالة  
بصوت حيّانى نتحاسب  
واياكش ماتفرفرشى!  
هو: أنا احاسب الدنيا بحالها  
بالمليم والسحتوت  
مفيش زبون فى القهوة  
يستجرى منى يفوت  
مالهوش عندى غير بوسة  
من بوز حرف النبوت  
واقدر بعون الله  
أدق الفيل برغوت!  
هى: معلّم ابن معلّم

إحميه يا رب وسلّم  
هو: متشكرين على أصلك  
ماهو ذا العشم يا مراتى  
لكن اتحاسب وياكى؟  
أحقُّ وألقُ واهاتى؟؟  
بالعقل كما المخاليق؟؟؟  
أهو ذا الجنان على أصله  
وحياة ربى ما يليق!  
هى: ماكانش عشمى ف راجلى  
يفضحنى ويجرسنى..  
مهما اعمللك واسقيك  
تلسعنى وتنقرزنى  
مع ذلك يا معلّم  
أنا برضه ما يخلصنى  
وانا مخى بلُغة قديمة  
بَعِغْ لحسن أنا هزعل  
قلت ماقلتش مش فارقة  
كبرت فى دماغى هزعل!  
هو: دا حساب الملكين أسهل!!  
هى: يا راجل فك صدرك  
ولا تشغل أبداً فكرك  
هو: وانا لم يرضينى زعلك  
هى: معلّم ابن معلّم  
إحميه يا رب وسلّم  
هو: متشكرين على أصلك

بقى انتى بنت عمى  
وأهلك همّا أهلى  
وأهلى همّا أهلك  
قبل الجواز حبيتك  
عجبتنى عزة نفسك  
بعد الجواز هنتك  
جالك كل اللى ف نفسك  
والمركب مشيت بينا  
والبيت عمران بحسك  
هى: ولّفنا على بعضينا  
هو: ولّفنا على بعضينا  
هى: يا رب اسمعها منه  
وخلّينا لبعضينا  
هو: واشهدك إنك كاملة  
سوبر لوكس ومتفاهمة  
بأخلاقك وبأدبك  
رافعة راسى فى الحارة  
من أول أصغر عيل  
لحد أكبر راس  
مفيش لسان يستجرى  
يشاورلك جنس إشارة  
هى: تسلملى يا ننى عىنى  
يا باسطنى ومهينى  
ياما قلت لنفسى يا بت..  
آهو دا اللى صحيح يستاهلك

هو: لكن عليكى طبع  
داء مستعصى بعيد عنك!  
يتفاته بلاد وبلاد  
كرهنى فيكى خلانى  
مش طايقك إنتى وأهلك!  
هى: إربط عندك يا معلّم  
علّم وصلنا لفين..  
لحد مش طايقنى  
شايلى منى وكارفى  
هو: سايبانى ورايحة لفين؟؟؟  
أنا عندى كلمتين  
هى: وحياء سيدى البغدادى  
فاهماك وحياء شبابى  
وحافضة الكلمتين!  
مانتش سامع يا معلّم..  
أبو عسلىة بينادى  
الواد المقروص لىعبى  
مافاتشى بقاله كام يوم  
هو: وتفركشيلنا القعدة  
علشان حبة عسلىة؟!  
بقى دا يجوز دا يا ولية؟؟!!  
لو كان ع الواد يا ستى  
آهو مرمى كل يوم  
هى: الواد لو عدّى وفات  
على مدرسة البنات

فى الحارة الكائنة ورانا  
هيشنوا عليه ميت غارة  
وينهبوا المغارة  
واتسوح أنا يا خسارة!  
هو: أمرى لله يا مراتى  
إستنى وانا هبعته  
صبى القهوة رهوان  
مرزوق حسان ابو شبت  
هى: وحية سيدك البغدادي  
لا ممكن يحصل أبداً  
دا انا بايتة يومين على نار  
لما المقروص يعدى  
عشان ادلله السبت  
هو: آهو دا الطبع المهب  
اللى مخليني مجنون  
لا فيا دماغ لحالى  
ولا عارف الاغى زبون!  
هى: إسم الله عليك يا خويا  
معلم ابن معلم  
إحميه يا رب وسلم  
هو: متشكرين على أصلك  
يا أميرة يا متربة  
هى: أجل حسابنا شوية  
إلا ابو عسلىة هيمشى  
ما انا عايشة معاك يا عنيا!

هو: إلهى بطنك تمشى!  
اتهدى اقعدى يا ولية  
بلا خوتة بلا عسلية  
هى: بعدين يا معلّم بعدين  
لحسن صحن العسلية  
قرب يفضى ويصفصف  
نفسى تدوقها يا ضنايا  
مع كل مَصَّة ومَصَّة  
قلبك هيّطير ويرفرف  
والنبى لتجرب لحسه  
وانت تفوق وتهفّف  
ولحد يوم القيامة  
ما تسلّى دى الحلاوة  
هو: يا حلاوة عليكى يا حلاوة!  
هى: سكر حتّة عسلية  
شهد مكرر نقاوة  
بيجلى العقل تمام  
يشيل منه الغشاوة  
دا مزاج يا سيد الناس  
وكيف تبع الغزالة  
هو: ودينى لو ما قعدتى  
وبطلتى رزالة  
لأكون حالف يمين  
وطاردك بالتلاتة!  
هى: معلّم ابن معلّم

إحميه يا رب وسلّم  
هو: إنتى شايلاها فين؟؟  
هى: فيه شوية فى الصينية  
وحبّه فى النملية  
دا غير جردل عسلية  
عايناه فى المطبقة  
هو: ملعون أبو العسلية!  
يا ستى انا قصدى اقول  
فين راحت المفهومية؟؟!  
هى: موجودة ومستوية  
هو: موضوعنا ليه راسين..  
ونمرتتين بالعدد..  
أول هام العسلية  
اللى مزحمانا فى البيت  
ومعياها زكايب  
بواقى زبالة ونكد..  
تانى هام بيع السيم  
أبو صوت غارة مكهربنا  
وتو ما تسمعيه  
تقومى منطورة ع السبّت  
ع الواد عفريت ابو شبت  
هى: يا راجل فك صدرك  
ولا تشغل أبداً فكرك  
هو: الناس فى كل بيت  
حطّه صورها وعيالها

بدال الواحدة ميّة!  
إلا انتى يا ست يا عاقلة  
عاملالنا بيتنا مشتل  
زرعاه فدان عسلىة!!  
أزاز فى كل أوضة  
قلبتى بيتى روضة  
فرافيت فى كل شبر  
طول ما انا ماشى ترحلقنى!  
وانتى يا ستى ملخومة  
عايمة ف بحور عسلىة  
هى: والنبي لتدوق يا عنيا  
هو: والله انا خايف تيجى موجه  
تأخذنى وتغرّقى!!  
وجنابك عايشة حياتك  
بتقرضى طول الليل  
بتعافرى مع العسلىة  
تقطمى وتقولى الحقنى!!  
جوا المطبخ ملزق..  
فوق السرير ملزق  
عيشه تربى القرف  
زن العسلىة فلقنى!  
ماشى بزقزق مع نفسى  
فى ذات نفسى اتقهرت  
زى ما اكون اتسعرت  
وكلب يتيم هبشنى!



وطول اليوم بنلعب  
مالكيش شغلانة غيره..  
نرفع جبل السَّبْتِ  
ينزل جبل السَّبْتِ  
مدللة م الشباك  
تقريباً ساكنة هناك  
نار الغيرة بتحرقنى!  
الواد المقروص ينده  
ويغنى بصوت مسرّسع  
"يا مين يستفتحنا؟؟؟"  
تَقْطُئِ انتى فريرة  
تلاحقيه بالزُميرة  
والنتن واخذها فرصة  
فى كل حتّه فاضحنى!  
هى: هو احنا كل ليلة  
هنعيد نفس الموال  
هو: أحسن حاجة أعملها  
أدفس روى فى شوال  
واهج قوام م البيت..  
هى: ماكانش عشمى ف راجلى  
ينغزنى ويفتألى  
فى العسلية بيحلقلى  
خلاص زهقان م البيت!!!!  
منك لله يا معلّم  
الواد اهو ساب الحارة

وزمانه خلاص جَبَرُ  
أنا حقى ضرب الجزمة  
اللى قعدت ورغيت!  
هو: أنا قلت كدة م الأول..  
حظى مع الحريم  
عمره قصير قليل  
أنا فاض بيا ومليت  
يا مراتى يا بنت عمى  
على رأى الست سومه  
يا ريتنى عمرى يا ستى  
يا ريتنى ما حبيت!!!

## ويا ريته كان جربان!!

هو: كل الناس فى الدنيا  
الحلوين الهاى  
والواطيين الياى  
يشتكوا م الريحة الوحشة..  
دى علامة آدمية  
فى البيئة المتريبة  
وتبقى واقعة وحشة  
لو الزوج ريحته وحشة  
وتبقى مصيبة شامورت  
لو هى ريحتها إكسترا  
من خيرات البكابورت  
آهو كله ريحة وحشة!  
هى: دا كله عند الناس  
العاقلين السُّلام  
هو: أما انتى حالة خاصة  
ليس عليكى حرج  
ليس عليكى ملام  
هى: ما تعدل خط لسانك  
وتنصّف ذوق كلامك  
شايفنى لسّعه بهوّهوّ؟!  
ولّا مطيورة بصوصو  
أو مثلاً قطة ضالة  
قَارْشَة فى الطرقة بنونوّ؟!!

هو: ولا نَوْنُو ولا بَهَوَّهَو  
ألْعن وأضل سبيل  
دا انا لو جمل كان بَرَكَ  
يعنى اعمل فيكى إيه..؟!  
جايبة لنفسك آرق  
فاهمة العيشة غلط  
هى: أنا برضه بفهم غلط؟؟  
يا ابو مخ حديد زلطا!  
هو: أهم حاجة فى الدنيا  
الزوج يبقى نضيف  
حافظ سكتة ع البانيو  
يزوره بدون تكليف  
يعوم كما الفراشة  
سبَّيح قرموط حريف  
الحمام جزء منه  
يتغدى بالصابونة  
ثم يحلّى بالليف!  
هى: كرهتني فى النضافة!  
قرفتني م الحمام!!  
بتجيني حالة عصبية  
لو شوفت بقاليل صابونة  
لو اتخايلت بليفة  
أو جاتلى فى المنام  
إسمحلى بكلمتين  
أعبرلك عن رأيي  
فى دنيتنا السُخام

هو: يا مدام عيب يا مدام  
هى: إنت عايش فى خرافة!  
ويقولها بكل صراحة  
لو كل الأجواز زيك  
تحيا عدم النضافة!  
هو: ماهو ربنا اللى خالقنى  
فى الصيف والشتا حرّان  
مايطيقش ريحة العرق  
ماقدرش أنام مبلول  
متقلقل أو قرفان  
هى: ويا ريته كان جريان!  
هو: مفروض تتباهى بيّا  
يا ست يا غلاّوية  
هى: هتباهى بيك على إيه؟  
هو انا أصلاً بقابلِك؟؟  
ما انت على طول معسكر  
جوة ف قلب الحمام!  
هو: ما انا سايب صورتى برّة  
لما تشتاقى ليها  
خدى بعضك طلّى عليها  
هى: وانا هعمل إيه بالصورة!  
هزورها كل يوم؟!  
وافرض عايزين نتناقش  
أخذ منها مواعيد  
واجيلك فى الألبوم؟!!  
هو: يا ستى بستحمى

ونضافتى من الإيمان  
هى: يا رب تدوب فى مكانك  
وتتوسخ كمان!  
هو: إدعى عليّ براحتك  
إلا الدعوة دا هى  
أنا جوزك الحلو نصحتك  
ما نضافتى ليكى وليّ!  
هى: مش لما اقابلك أصلاً  
واعرف شكلك يا عنياً؟!  
هو: اتنين فى حياتى بكرههم  
لا اطيّق ريحة التراب  
ولا نواح الغراب  
بموت فى جلدى موت  
من غشقة الضباب  
هى: حياتى معاك بالظبط  
وهم وميّة وسراب!  
أنا عايشة مع الهوا  
وحيدة فى بيت طويل  
وانت رامى المدام  
وماّيس فى الحمام  
هو: مسيرى ف يوم هنضفلك  
مسيرى ف يوم هطلعلك  
ما تقلقش يا مدام!  
هى: دا انا اللى روحى هتطلع!  
هو: أنا جاى مش هتأخر  
هى: لأ إناخر على كيفك!!

أنا عمرى كله اتكعبل  
قرفت م الانتظار  
والله ما بقيت عارفة  
أنا بصغر ولا بكبر  
أقدار مفروضة علينا  
مكتوبة فى المقرر  
تقربيا والله أعلم  
نويت ابْلُغ فرار..  
هو: مغيث فى الدنيا أحلى  
من دُش فى الفجرية  
وايه يساوى العمر  
من غير دُش العصرية؟  
وليه تضيع عليّا  
حمّاية المغربية؟؟؟  
إزاي اتحمّل روحى  
من غير بلبطة فى الميّة؟!!!  
هى: إنت بتلبط جوة  
وانا قاعدة بسقّف برّة!  
هو: وادّلّع بقى واتحنجل  
ويا الشامبو والليفة  
وصابونتى أم ريحة  
واغنى كدة مع نفسى  
تخرج منى درر..  
هى: إنت جوة بتتنجل  
وانا برّة يا جوزى بتقندل  
ومستنية دورى

أنزل أملا القُلل!  
هو: يا روحى اطمئنى خالص  
أنا جاي مش هتأخر  
هى: لا أنا عايزاك تتأخر  
خلّص على مهلك خالص  
وساعتها يا واد يا نضيف  
أنا اللى هسيبك وامشى  
من كل قلبى هقوللك  
سلام يا حبيبى باى باى  
تشاو.. arrivederci  
هو: آدينى طلعت يا ستى  
هاخد الفوطه وراجع  
مالك شكلك متغير  
ميه وشك دبلانة؟  
ريحة قلبك تلفانة؟؟  
نازلة دموعك حنفية  
لازم المواسير عدمانة؟؟  
هى: ماتجيبش تانى قدامى  
إسم المدعوقه الميه  
أنا خدت قرار أوفر  
واعيش حياتى ع الناشف  
هقضيها مع الشمس  
هسيح فى الدنيا لوحدى  
بالشبيب والجلابية!  
هو: طب إيه رأيك نتصالح  
وقبل شروق الشمس



نهرب لاسكندرية؟  
هى: أنا اللى أهرب فين  
منك بريحتك ديا؟!  
هو: ومالها اسكندرية؟؟  
هى: ما بلاش اسكندرية؟؟  
يمين يهز الكون  
لو جبت سيرة بحر  
ورملة وشط ومية..  
لأصورلك قتيل  
ماتنزعشى الفتيل  
ماكاتش جوازة ديا!  
هو: وماله راخر البحر؟  
هى: ما هى كلها مية ف مية!  
ما كفاية السنة اللى فاتت  
وكوارث راس البر  
هو: حصل ايه بعد الشر؟؟!  
هى: مش فاكر لما رحنا  
فى يوليو عز الحر..  
أول يومين ثلاثة  
فضلت رايح جاي  
بين البر والبحر  
ضحكت علينا الناس  
وجيبتلنا الكلام!  
وبعد يومين ثلاثة  
رحت تعوم بالعوامة  
مارجعتش تانى البر

وكان البحر عندك  
بالطبط أخو الحمام  
يعنى المشكلة فى الملح؟؟!!  
ماهم لتنين سيان..  
مدعوقين بسخام  
هو: ماهو ربنا اللى خالقنى  
فى الشتا والصيف حرّان  
أتحمل الغرق  
ولا اتحمل عرق  
لايمكن اموت زهقان  
متبهدل أو قرفان  
هى: ويا ريته كان جريان!  
ستاشر ساعة يا فالح  
وانت منقوع بتبلبط  
أنا رحت وجيت ميت مرّة  
زى المكوك الداخ  
إنت مرگب زعانف؟؟!!  
شجرة عيلتكو إيه؟؟  
أصل جدودك من فوق  
سلالة الزحالف؟؟!!  
هو: هقوللّك إيه يا جميل؟؟؟؟؟؟  
يا سلام ع الذكريات..  
يوميهها فضلت اعوم  
وصلت للبراميل  
خدتنى أوى الجلالة  
لقيتنى لوحدى بميل

رقصت وأنجلت  
حواليًا الميَّة إيه؟؟!!  
تبعثلى نُقطة نُقطة  
جوابات على مراسيل  
تناديني سُقْطَة سُقْطَة  
تنقُشلى ع المنديل  
وتقوللى يا حلو ياللى  
عايم على وش الميَّة  
إتفضل عيش معنا  
إنت ملك القرموط  
طلباتك إيه يا جميل؟؟!!  
قوللى يا ملك القرموط..  
هل ممكن فى المستقبل  
تترقى تبقى حوت؟؟!!  
ولما ترستأ نفسك  
إبعت لمراتك هاتها  
هنشغلها بلطية  
وتأكد مش هتموت  
وان رفضت تيجى البحر  
هنختارلك حورية  
بسارياة لولية  
قايمة نايمة فى الميَّة  
عنيها مرجان وياقوت  
إتنقعوا مع بعضيكو  
دوبوا أملاح البحر  
ما هى رخرة غاوية نضافة

موطنها الأصلى الميَّة!  
برّة تنشف وتموت  
أحكى إيه ولا إيه؟؟  
مش قادر اوصف واقول!  
هى: يا بطة.. يختى عليك!  
بقى الميَّة حواليك  
تبعثلك نُقطة نُقطة؟!  
تندهلك سُقْطَة سُقْطَة؟؟!!  
وكمان مانتش قادر  
إلهى يجيلك نُقطة  
عادل يا رب قادر!  
هو: والشمس حَاضَّة الموجه  
هى: مش عايزة اسمع كفاية  
هو: والموجه تجر موجه  
هى: ما قلنا بس كفاية؟!  
هى الحواديت بالعافية؟؟!!  
دى عيشة تجيب الكافية!  
هو: كان نفسى أجيب معايا  
أسماك بالكهربا  
تنور بالفوسفور  
كان نفسى استنى شوية  
لما اخذ التأشير  
ويدونى الباسبور  
هى: ماهم بعته فى البوستة  
عبر خليج البسفور  
مختوم وريخته فايحة

بعياط واحد مفطور..  
هو: ما هو لما جُم شدُونى  
م البحر ف عز الليل  
وانا بتشحتف مسكين  
كمّلت لتانى يوم  
ستاشر ساعه كمان  
منقوع جوة البسين!  
هى: ويا ريتهم ما طلّعوك  
كان أرحم لينا خلّوك..  
إنت طلعتلنا يا دوب  
وكل الدنيا انقلبت  
ريحة الأوضة كلور  
ريحة الفندق كلور  
ريحة العربية كلور  
ريحة الشارع كلور  
وقعدنا ييجى شهرين  
عاشتنا كلور ف كلور!  
هو: ثلاثة فى حياتى بكرهم..  
لا اطيع ريحة التراب  
ولا نواح الغراب  
ولا آلاطة الزرافة  
أهم حاجة فى الدنيا  
أمتع حاجة فى الدنيا  
الزوج يؤمن بمبدأ  
الإخلاص والنضافة..  
هى: أنا بطنى انقلبت منك

ومن سيرة النضافة  
إسمع منى يا جوزى  
بعلنها بكل صراحة  
يا عاشق النضافة  
لو كل الأجواز زيك  
تحيا عدم النضافة!  
هو: يا حياتى اطمنى خالص  
بلاش اسكندرية  
أنا خلّصت الحمام  
صوتى باين من عندك؟؟  
فاضلّى تسع ساعات  
أنا جاى مش هتأخر  
أنا صاحى مش هنام  
هى: لا أنا عايزاك تتأخر  
إطلع على مهلك خالص  
وساعتها يا جوز يا نضيف  
أنا اللى هسيبك وامشى  
من كل قلبى هقوللك  
خلاص يا نضيف باى باى  
تشاو و arrivederci !!!!!

# مراتى فنانة

هو: موعووووود.. موعووووود

موعود معايا بالعذاب

موعود يا قلبى

محروووووووم.. محروووووووم

محروم يوماتى م الغدا

أنا وكلبى..

هى: هو الهاتف نادالك؟

ولّا الكلب اشتكالك؟؟

ما هو راقد فارد ديله

مبسوط كتر خيريه

هو: ومين يجيله نوم

يا ناس وهو جعان؟!

هى: والنبى تتلهى على عينك

خليك واقف فى حالك!

هو: ومين يجيله قلب

يقول شهادة حق

فى زمن قاسى جبان؟!!

هى: هتروح فين م الرزالة؟

هو: هتروحي فين م الندالة؟

هى: لخص وهات م الآخر..

بطل خصلتك الزفت

واخدلى كل الكنبه؟!

انجر شوية استاخرا!

هو: حاضر هجيب م الآخر  
أما الكنبه اشربيها  
إنشالاً تبني فوقها  
ماهو أنا أصلى اللى استاهل  
هى: وطى صوتك شوية  
مش عارفة اسمع يا ساتر!  
هو: منين هتسمعينى  
ومنين أوطى صوتى؟!  
هى: يا سيدى انسد شوية  
البت هيام هتسافر  
هو: مين دا اللى هيام هتسافر!  
يا ستى انا راجع واقع  
عايز اكل لقمة وانام  
حضرتلى الغدا؟؟  
ولاً نصيبى كالعادة...  
هى: محاشى كرنب ملوكى  
ورغيف م النوع الفاخر  
هو: والكلب؟  
هى: ماله الكلب؟!  
هو: الكلب هياكل إيه؟!!  
هى: إديله م الكرنب  
وبواقى العيش الفاخر  
هو: يعنى انا والكلب واحد؟!!!  
يا منيع الأدب..  
يا برمىل الذهب..



يا رب اسخطني عازب  
بس لمدة يوم واحد!  
هى: وطى صوتك شوية  
يا ترعة الآذية  
الواد لَطَشُ الساعة!  
مش عارفة أسمع حاجة..  
إخرس ونام شوية!  
هو: أدى حرمنّا المصون  
طول النهار والليل  
من أول ما اتجوزنا  
معتزلة مابتطبخشى  
غير صنف واحد بس  
المذكور فى الكنالوج  
إجبارى مايتوهشى  
مفيش غير الكرنب!  
ولا شىء غير الكرنب!!  
ودينى انا لو م الكلب  
كنت اخد بعضى وامشى!  
هى: ما هو انا بتسلّى فيه  
وانا متربعة ع الكنية  
بتصنت ع الجيران  
بعرف أحوال بيوتهم  
من أول عود كبريتهم  
لأكل البغبان  
مراقبة كل عيالهم

كل بلاوى قرايبهم  
وزوارهم كمان  
لو ع الناصحين صاحيالهم  
والفسدانين قعدالهم  
كام مرّة طول الليل  
بيفرقوا كل البمب  
ويرموا ع الغلبان!  
وكل دا كله يجينى  
عارف طريقى يجرى  
م الحيطه ينط ف حجرى  
وانا قاعدة زى الباشا  
بحشى صوابع الكرب  
ع المفرش الستان!  
هو: ما هى النصية يا هانم  
إنك مابتخرجيش..  
ما هى النايبة الثقيلة  
إنك مابتطبخيش..  
حرام عليكى يا شيخة!!!  
زهقت أنا والكلب  
من كل زرع أخضر  
يشبه لون الكرب  
دا شىء ماينتهيش!  
هى: تسالى ساعة العصارى  
والنبي وصانا عليهم  
أخد بالى من جارى

هو: تاخدى بالك تراعيهم  
مش نازله تقطيع فيهم!  
ناخد بالننا نحميمهم  
مش نتجسس عليهم!  
هى: ما انت عارف ودانى  
نَفْدَه على صف سنانى  
عجبة آخر الزمان  
يعملوا ليها تمثال  
هو: وعليكى طقم آرايل  
يجيب كل القنوات  
للبالغين والعيال!  
أوزان كالونات ودانك  
يا ما شاء الله عليهم  
عايزة ولا ميت شيال!  
هى: إحسبها إنت بعقلك  
هتلاقى ان انا مظلومة!  
إتشاور إنت وكلبك  
هصعب عليكو مظلومة!!  
هو: لأ بصراحة معذورة!!!!  
ويا حول الله مظلومة!!!!!!  
طب وانتى هتطبخى إمتى?  
والحكايات مابتخلصشى!  
هى: يرضيك يفتوتنى حلقة?  
هو: لا والله ماينفعشى!!  
دا حتى مايقاش عدل!

طب انا فوضت أمرى  
وياكل دائماً برّة  
كنت وصيتى بدرى  
كاتم فى روحى بقرى  
طيب وحناب الكلب؟  
هى: ماله يا خويا الكلب؟؟  
هو: الكلب هيطفح إيه؟!  
هى: إعمل فى حياتك طيب  
إنشالاً بس مرة  
هو: يعنى الكلب المسكين  
هياكل نفسه يعنى؟!  
هيهج ياكل برّة  
ولأ هيجيب دليقرى؟؟!!  
هى: أصلى بصراحة فضولية  
والحيط جنب الحيط  
ودا طبعاً من زمان  
مش ممكن موقف يحصل  
إلا والضّم ميت خيط  
هو: وتشمعى قتله كمان..  
هى: مش ممكن يحصل حاجة  
كارثه عند الجيران  
إلا ولازم أعرفها  
هو: وتجيبي قرارها تمام..  
هى: بس ساعتها استريح  
ومزاجى يبقى بُمب

واجهزّ نفسى لبكرة  
أحبّش أسوَى الخلطة  
وابرطع بقى ع الكنبه  
وارص لوازم القعدة  
واحشى صوابع الكرنب..  
هو: يادى كورس الكرنب!  
هى: ما انت عارف ودانى  
هو: عارفها يا ستى دارسها..  
هى: ودانى جهاز إرسال  
أمشى ورا قصه قديمه  
عشان اشهد ختمتها!  
أو تبقى ساعة حظ  
لو قصينا الشريط  
وبدينا قصة جديدة  
واحضر ساعة ولادتها!!  
هو: ويا ريتها بتحكى بصدق..  
عن اللى جرى لفلان  
واللى حصل لفلانة  
إلا الخازوق البايخ  
إن المدام حرمتنا  
بتكّب جالون بنزين  
وتهوّل الحكاية  
وانا واقع جنبها داخ  
بتألّف من دماغها  
تنسج تفاصيل بالكذب

تملا الحدوتة إثارة  
والبيعة لو خسرانة  
تطلعها كسبانة!  
وتحلف إنها على حق  
وحياة كل المشايخ  
هى: تصدق إنك بايخ؟!  
هو: ما هو أصل الست مراتى  
كان حلم قديم فى حياتها  
إنها تطلع فنانة!  
هى: فنانة طبعاً فنانة  
أقل منها يعنى؟!  
خيالى واسع جداً..  
بحشى صباغ الكرب  
بسرعه مذهلة جداً..  
أفنى التفانين  
أعمل فلان عظيم  
وهو يادوب كماله!  
أخلّى الغنى فقير  
واجيله قرار إزالة!  
أجوز دى.. واطلق دى  
وادفعلهم كفالة!  
الأرملة عندى بكر  
بايرة عايشة بغزالة!  
هو: وتخلّى العيشة جنة  
كذب ومهزلة ومساحر

هى: لخص وهات م الآخر!  
ماكفاية واخذ الكنبه  
إنزاح حبة إستاخير!!  
هو: خدى الكنبه ابليها  
إنشالاً تتبينها!  
ياسلام ع الصحة البُـمب  
خليكى فى الكرب!  
هى: ماله يا خويا الكرب؟!  
كله فيتامين مُغذّى  
ينفخ بطنك مُسلّى  
هو: من ناحية ينفخ.. ينفخ  
أنا بطنى بقت بالونة!!!!  
ومش حجة إنه مُسلّى!!  
واذا كان صحيح مُغذّى  
يبقى مش كل يوم!  
ومهما كان مُغذّى  
لو هتأكليهمولنا يوماتى  
قريب جداً خالص  
هتجيني أنا والكلب  
فينا لتنين تعزّى!  
هى: وطّى صوتك يا سقىل  
مش عارفة اسمع يا باى  
حكاية الواد نبيل..  
يا خويا اكتم شوية  
الواد خطيب البت

عرفوا انه عواطللى عويل!  
هو: موعووووووود.. موعووووووود  
موعووووووود معايا بالعذاب يا قلبى  
متعوووووووس.. متعوووووووس  
متعوووووس ليلاتى فى الغدا  
أنا وكلبى!  
هى: والنبي تتلهى على عينك!  
شد اللحاف ونام  
هو: ومين يحيله نوم  
يا جيرانى وهو جعان؟!  
ومين قلب الأسد  
ينطق بكلمة حق  
فى زمن دنيا الكرب  
اللى بيغنى الإنسان!!  
هى: شفتش خالتك فلانة..  
أولة امبارح سهرت  
تسلق شوربة خضار  
عشرين فص بسلة  
والباقي جزر وخيار  
سابت الحلة ع النار  
الهيلة سيهت عنها  
غليت غرقت الحى  
لحقوها على آخر لحظة  
قبل الشقة ما تنهار  
والنبي لو كانوا سابوها



كات العمارة تترقّص  
حصل فيها انشطار  
والحي كله بات  
متخلّل في الخيار!  
هو: فنانة يا ناس فنانة..  
هى: وكلب الست يا عيني  
مات من صوبع ممبار!  
هو: عقبال ما يفرجوا عنا  
أنا وحناب الكلب  
ومعانا صواريخ البمب  
ويستخرجوا أشلاءنا  
أنا وبقية الكلب  
من معتقل الكرب!!

# بكام كيلو العواطف؟!

هو: جوزى قبل الجواز  
كان يفضل طول القعدة  
يتكلم فى كلام فارغ  
يزورنا واحنا نفرح  
ينكت واحنا نضحك  
يمسك صرصور ودانا  
مايبطلشنى كلام!  
يجيب أخبار الدنيا  
وساعات آخر الدنيا  
أهم حاجة بُقّه  
يفضل يلعب ع البحرى  
يبغى أى كلام!  
ونتيجة الامتحان  
مضمونة فى أصغر جيبه  
كاتبينها فى الكونترو  
غاششها من زمان  
خلّى اللى يقول يقول!!  
ماهو كله أى كلام  
أهم حاجة عنده  
يطلع أرنوب حُبُوب  
دمه يلطش خفيف  
عِشَرى يحب الناس  
شبعان ينام خفيف

فيضان ذوقه بيخرجنا  
شئء يدهش العقول!!  
ومين مجنون هيسأل  
هى الساعة بقت كام؟؟!!  
واحنا طبعاً فاهمين  
إنه لا بس قناع..  
ولا هو ظريف ولا نيلى  
دا غتيت ابن اللثيمة  
وعامللى فيها بتاع..  
بالذمة ده سمه كلام!  
وزى كل الناس  
اضطربنا نجاريه  
اتحملنا عيوبه  
بما فيهم أصله وفصله  
علشان تمشى الجواز  
إجبارى زى الشرية  
وعليها باكو نعان  
من ابو ماعرفش كام!  
وبعد ليلة الدخلة  
والتديسة الثقيلة  
كله بيان على أصله  
وقع لَرَق القناع..  
ولا حتى كَلَّف نفسه  
إنه يمثّل شوية  
ويعمل فيها بتاع

كله ظهر وبان!!!  
دلوقتى العيشه إيه؟؟  
الشاطر اللى يكسب  
وياخذها بالدرع  
وهى الدنيا إيه  
غير عركة طويلة عريضة  
على مين يترمى فى الترسو  
ومين صاحب اللجام...  
هو: ويتحكّم فى الباقي  
هى: لو كان فى العمر باقى!  
هو: مسلسل كل يوم  
ميعاد الاسطوانة  
هى: الاسطوانة مشروخة  
دايرة تلف ع الفاضى  
سكاتها مسخرة  
ماحدّش سامع حاجة  
أرقامها مشفّرة  
هو: حكاية مكررة  
إتعملت مليون مرّة  
صورة وبالكربون  
مقصوفة مليون قصّة  
حروفها مشرشرة!  
هى: لو أى حد سامعنى  
يفتكر ان انا مجنونة!  
بيتى سراية المجاذيب

مكانى العباسية!  
وف أحسن الاحتمالات  
هتفكرونى قوية  
واحدة فرصته فى الدنيا  
وبتكلم بداله  
وده منتهى الأنانية!  
هو: ما تلمى الدور واتلمى!  
هى: أنا بتكلم من همى  
قبل اما اتجنن رسمى!  
هو: يا هانم قلنا اتلمى!!  
هى: أنا فعلاً لميت هدومى  
وحشيتها بكل همومى  
قدامى خطوة واحدة  
وافارق الدنيا البمبى..  
هو: نقول م الأول تانى..  
ما تلمى الدور واتلمى!  
وانا مش هتكلم تانى..  
هى: آهو دا قاموس حياتنا  
نموذج طبق اليوم!  
يا دوب الكلمتين  
ويحبس بسيجارتين  
ودا حالنا كل يوم!  
اللى اعرفه فى الرجالة  
كلامها يقل شوية  
بعد سنين م الجواز

إلا الأفندى بتاعى  
أخرس من أول يوم  
ع الجنط جايب جاز  
مترم من لغاليغه  
بالظبط آخر كلمة  
سمعتها منه بصوته  
لحظة ما انفتح الباب  
ووصل المأذون  
وقال الله ألف سلامة  
غور من وشى يا مولانا!  
دى كانت لحظة فارقة  
رسمت علامة زرقا  
فى مشوار الندامة؟!  
قلت لأهلى أنا خايقة..  
قالوا صنف الرجالة  
زى ورق الكوتشينة  
الكل زى بعضه  
ما فيه مش حد ساحر  
أصل اللعبة خسرانة  
الواد زى الشايب  
الكل مصيره واحد  
بايدين واثنين رجلين  
يفرحوا بالقصة شوية  
وبيصلعوا فى الآخر  
ويدوبوا فى الدوامة

سيبك م الراية السودا  
ومن العلامات الزرقا  
إصحى لنفسك يا شابة  
إرضى بحالك مش فارقة  
يالاً مع ألف سلامة..  
وقفلوا الباب ورايا..  
وانفتحت الستارة  
وبدأنا حياة السيرك  
ودخلت قفص الإهانة!  
هو: عايزانى اتكلم ليه؟  
هى لُكُكُ وخلاص!  
والنبي تعملى معروف  
مفيش حاجة على نفسى  
أنا طبعى كدا حلوف  
زى الجحش المنتوف  
هى: قول الحقيقه كامله  
ولاً يمكن مكسوف؟!  
هو: وانكسف ازاى وليه؟!  
طبعى وانا حر فيه؟!!  
أنا شُح جلدۀ بخيل  
بروطۀ كسول أصيل  
بصراحه أكثر معفن!!  
إتركُنِي بقى واتمسّى  
فى يومك الطويل!  
هى: كَشَفْتُ راسى بدعى

عليك فى كل أَدان  
م الصبح لحد العصر  
هو: أنا راجل زى القَطْر  
عارف رايح على فين  
وراجع بدرى منين  
أنا فاهم الدنيا كويس  
حافظها سطر سطر  
مش محتاج للنضارة  
بتكلم بالقطارة  
بصطاد قِرْشَى بسنارة  
هى: حكيم سرك باتع  
هو: فلوسى ماتشوفشى الشارع  
هى: يا روحى ع الموانع  
هو: مخى مسوجر مقفل  
هى: قصدك نتن معقن..  
هو: رابط معدتى بدوبارة  
حريص ابن حريص  
هى: قصدك خِلفَة إبليس..  
هو: عمرى ما اقول يا خسارة  
هى: شحيح أوى فى الفلوس  
هو: مثلى الأعلى الجاموس  
منتج فى كل وقت  
م الإبرة للطيارة  
هى: ويا ريت بس الفلوس  
كله إلا العواطف..



نتن أوى فى العواطف!  
هو: وبكام كيلو العواطف؟؟  
هى: الله ع العيشة الحلوة  
حقيقى راجل فييس!  
تفكير رومانسى جداً!..  
بكام كيلو العواطف؟؟!!!!!!  
سؤال قذر عويص..  
هو: أنا قلت كدة م الأول  
هى: شيطان خُلِفة إبليس!  
هو: ما تلمى الدور واصطبحى  
هى: أنا فعلاً خدت حاجاتى  
وحشيتها بلاوى حياتى..  
هو: أنا راجل مَلُو هدومى  
هى: لأ سبع ابن سباع!  
هو: الشاطر اللى يكسب  
ويُقشُ بالدرع  
هى: ويتحكّم فى الباقي  
هو: لو كان فى العمر باقى!  
أنا مُخى سكة واحدة  
سلسلة وتلات ترابيس..  
هى: منك لله يا بعيد!  
من ساعة ما اتجوزتك  
أحلامى صابتها عدوى  
ماقتش شايفة غيرها  
صاحبة نايمة كوابيس..

هو: خليكى فاكراها كويس..  
بكره هنجمعها كتاب  
نبيع فى السوق ونكسب  
إصحى للرزق يا ماما  
أنا عمري ما أحل الكيس  
هى: لما انت بخيل ومآرم..  
والعيشة بتاعتك منظر..  
طب ليه جوازتنا ليه؟!  
هو: قلّبت الحسبة كويس  
ودوّرتها فى دماغى  
لأول مرّة هشرح  
ولآخر مرّة هفسر  
فنجلى ودنك كويس  
ومش هتكلم تانى..  
أنا كنت عايش واحد  
بصرف على قد واحد  
أكلى وشُرّى ونومى  
بيت ملكى ومصاريف يومى  
بدفع كذا لمواصلات  
خط امبابة مظلات  
مشوارى دائماً واحد  
هى: ما فهمتش منك حاجة  
وامّا انت مش محتاجنى  
ما بلاش مصاريف زيادة  
هو: خليكى ست صبرة..

مش أرعونه ومطيورة..  
هى: آهو صنف الصبر ده  
اللى اتعلمته بسببك  
وطلعت معايا كريم  
هو: يا ست يا صغنتوتة..  
يا شائلة دماغ فتفوتة..  
يا ام مخين نمم  
طول عمرى ماشى دوغرى  
طريقى مستقيم  
بصرف على قد القد  
مامدش إيدى لحد  
وماشى فى السليم  
أكلتى راس فجل وسمسم  
وكله ماشى تمام  
والكل مصدق إنى  
فقر والحالة جيم  
ماكانش منعص عيشتى  
إلا فلوس البواب  
وريحة الهباب  
وأجرة كنس السلم  
هى: إشمعننى كنس السلم؟!  
ماهو بواب العمارة  
بيعمل ميت شغلانة  
من واحد لحد مية  
أولها يئيد أنوار

بیر السلم لآخره  
والطرقۃ الجوانیة  
هو: مش عایز انید النور  
حد شریکی یا ستی؟!  
أنا غاوی اوجع عنیا!  
هى: وهو حارس البیت  
هو: مش عایزه یحرس حاجة  
حد شریکی فى بیتى؟  
أنا غاوی أشوف حرامیة!  
هى: وینفع فى الطلبات  
هو: مش عایز اصرف ملیم  
حد شریکی فى جیوبى؟!  
أنا عایش عیشة فقریة!  
هى: ونهایة الأسبوع  
بیمسح السلالم  
م القشر والتقلیة  
هو: آهو ده أس المشاکل..  
فلوس مسح السلالم..  
هى: دول عشرة جنیه فى الشهر؟!  
هو: مش عایز امسح سلالم  
مش عایز اموت بالقهر  
هى: ولا فاهمة منك حاجة!  
هو: ما انا تجوزت عشان  
مصاریف مسح السلالم  
أشیلها لوقت زنقة

وانا أهبل اضيَّ قرشى  
واصرفها فى حاجات فارغة!  
هى: للدرجة دى نانتك؟!!!!  
أتاريك فى آخر الجمعة  
تقف على إيدى بالجردل  
ولو كسّلت ونمت  
تعمل ميت ألف قفلة  
على حاجه مش مستاهلة!!  
هو: يا ستى انا مش محتاج  
بكفاية مصاريف وعذاب  
هى: طب ما احنا اتنين بناكل؟!!  
مابنعزمشى البواب!!!!  
هو: يا ست يا فسفوسة  
أنا مختارك مسفوفة  
وبيقتى مراتى ملاكى!  
أكلك قش العصفورة  
نفسك أصلاً مسدودة  
وانا متكفل بالباقى..  
هى: لو كان فى العمر باقى!  
طب ما انت جبت شبكة؟!  
هو: دا خاتم مرّة لقينه  
واقع فى تراب الشارع!  
هى: طب ما انت دفعت مهرى؟!  
هو: أبوكى كان سالفهم  
خدتك خلّصت حقى!

هى: طب ما احنا سافرنا يومين؟!  
هو: دى جايزة كسبت فيها  
أجرة فندق ليلتين!  
هى: ظهرت كل الحقيقة  
وانخلع القناع  
هو: الشاطر اللى يتكتك  
ويكسب بالذراع  
هى: ويتحكم فى الباقي  
لو كان فى العمر باقى..  
هو: مسلسل كل يوم  
ميعاد الاسطوانة  
هى: الاسطوانة تعبانة  
الاسطوانة جعانة  
الله يسامحهم أهلى  
مكتوبلى اعيش حياتى  
مع برطمان نتانة!!!

# بالشوكة والسكينة

هو: لما جيت اختار  
العفش بتاع جوازى  
خطيبتى قالتلى يوميهـا..  
هى: روح منك للنجار  
على كيفك هات جهازى  
تسلم إيد اللى شاربهـا  
هو: طيب يا رب اهديهـا  
هى: هتفرق إيه يا حبيبى؟!  
كله فى الآخر لينـا..  
هو: فى يوم خدت الكتالوج  
أختار ألوان حيطانى  
حبيبتى قالتلى يوميهـا..  
هى: روح للنقاش مسعود  
على ذوقك هات ألوانى  
يا ريت نتهنى بيها  
هو: طيب يا رب احميهـا  
هى: نتناقر ليه يا حبيبى؟!  
كله فى الآخر لينـا..  
هو: وضّبت كل حاجة  
على ذوقى ماقلتش لأ  
وكله بموافقتها  
بدعاها ومباركتها  
خلّصت كل حاجة

ناقصنا تنور بيتها!  
هى: لسه شوية يا حبيبى  
ناقص أدوات المطبخ  
هو: مع خالص الأسف  
مع منتهى الألم  
أملى فى حبيبتى تسامح  
أنا مافهمشى فى المطبخ  
وعمرى ما اهتميت  
بيحصل إيه فى المطبخ؟!  
ولا شكله إيه المطبخ؟؟!!  
مكان مجهول فى ذاكرتى  
مالوش عندى ملامح  
هى: إنت يادوبك هتاكل  
وتشتغل وتذاكر  
فاضلك شهر واحد  
وتبقى يا روحى دكتور  
هو: نفسى فى لقب دكتور  
أنا خريج طب بيطرى  
من ست سنين وكسور  
وعشان اطور شغلى  
عملت أبحاث جامدة  
هتؤدى لانقلاب  
هتخلينى مشهور  
هتساعد المزارع  
يملا شهادة تسنين



ومن طلّة عنيه  
يحدد عمر التور..  
هى: أنا برضه برج التور  
هو: يا محاسن الصدف  
طلّهُ واحدة فى عنيكى  
سنّنت عمر حبي  
خلّتنى اكتب قسيمتى  
وابقى الزوج الميمون!  
هى: بس انت يا بابا مش فاضى  
خلّيك فى الأبحاث  
باقى شهر على جوازنا  
وانت مشغول محتاس  
هو: أنا هشتغل واذاكر  
لحد معاد فرحنا  
هى: وانا بدالك يا حبيبي  
هجيّب حاجات مطبخنا..  
هو: من شهر ونص تمام  
إتجوزت المدام..  
وأخذت الدكتوراة  
هى: سافرنا مكان بعيد  
قضينا شهر عسلنا  
فى فندق البكالاة  
هو: آهى دى الجنة ونعيمها  
عريس جديد وراور  
وشايل دكتوراة

هى: بدأنا شهر العسل  
هو: الله ع الحب الله!  
هى: لسة يومين عسل  
هو: يعيش سمك البكالاة!!  
هى: خلّصنا شهر العسل  
هو: وياريتنا ما خلّصناه!!!  
هى: ماتكبرشى المسائل  
هو: أنا مابقتشى متفاءل!  
إنتو عالم مايجيش  
منكو غير المشاكل  
هى: وإيه سبب التشاؤم؟!  
هو: مع خالص الأسف  
مع ملتقى الألم  
خنتوا ثقتنا فيكو  
ماكانش العشم بتاتاً!!!!  
هى: إحنا دول يبقوا مين؟!  
هو: إحنا تعود على نفسى  
ودا من باب التعظيم!  
هى: وأنا كنت عملتلك إيه  
يا بتاع بحث التسنين؟!  
هو: إنتو انتهزتوا الفرصة  
أثناء شهر انشغالى  
وطبختوها ورا ضهرى  
وأنا قاعد مَكْفَى بلالى  
هى: آيوه اظهر أكثر بان

عليك ألف أمان  
كل مواطن وبيئته..  
إقلب ع الوش التانى  
خليه يكشف حقيقته  
هو: أول ليلة فى البيت  
صحيت عطشان بالليل  
لابس بيجامة سمنى  
وبكل سماحة نية  
مارضتشى أصحى مراتى  
دى لسة عروسة جديدة  
إتسحبت تخاطيفى  
مشيت على هوا طرايطفى  
وانا لسة مستحمى  
وفتحت باب المطبخ  
الدنيا ضلمة كُحل  
ماكنتش شوفت شكله  
زى التور المغمى!  
هى: أنا برضه برج التور  
وبابا ونينا وعمى  
هو: يا محاسن الصدف..  
أدور ع التلاجة..  
مش لاقى ولا تلاجة!  
هى: ماهو مالحقناش نجيبها  
حطّينا بدالها قُلّه  
هو: إحنا دول يبقوا مين؟!

هى: إحنا تعود على حرمك..  
ودا من باب التفخيم!  
القله بتستناك  
تلاقىها ع الشباك  
تحتيها فى خط عامودى  
زير على راسه قُلة  
مسنود لوحده هناك  
قطّفنا فوقه ورد  
سقىنا قلبه موارد  
والمية حارسها ملاك  
هو: وخلاصة البحث إيه؟!  
هى: مش محتاجين تلاجة!  
هو: وجهة نظر وجيهة  
طيب يا رب اشفيها!  
إنسى حكاية التلاجة  
آهو برضه المطبخ ضيق  
يادوبك عشرة متر  
مايساعشى أى حاجة!  
ولا حتى رمل سفاجة!!  
هى: عندك سؤال كمان  
ولّا اتلقّح وانا؟!  
هو: بضرب بعينى لفوق  
وانا لسة واقف عطشان  
جوا المطبخ بتاعنا  
لقيت الحيطه سادة

والرف راخر سادة  
فيه حد ضحك عليكى  
وباعلك مطبخ فاضى؟  
مين اتجراً وخدعنا؟؟!!  
فين المطبخ بتاعنا؟؟!!  
هى: دا مفيش رف أساساً!  
هو: ماهو دا اللى انا اكتشفته..  
ولّعت النور وعرفته..  
هى: حدّد سؤالك حالاً؟!  
هو: آمال فين الشفّاط؟  
آمال فين الخلّاط؟  
بلاش كل دوله  
يمكن يكونوا عورة!  
طب فين الميكروويف؟؟؟  
وغسالة الأطباق؟؟؟  
فين أطقم الحلل؟؟؟؟  
وممسحة البلاط!!!  
طبقين اتنين يا قادرة  
بلاستيك مش ميلامين  
متعلّقين من راسهم  
بأنبويتين سيكوتين!  
هى: وحياة كل الغاليين  
كل اللى سألت عليه  
ماهو مالحقناش نجيبهم  
طيب ونجيبهم ليه؟!

الشفافات معمولة  
 تسرّب الروايح  
 وماحدش فاضى ياكل  
 ماحدش فاضى يطبخ  
 إنت ملخوم فى الشغل  
 مع الريش والدبايح  
 بترجع وش الصبح  
 وانا مش هاكل لوحدى  
 تبقى فى الروايح؟!  
 هو: وخلاصة الفكرة إيه؟؟  
 هى: مش محتاجين شفاط!  
 هو: ولا لخمّة ميكروويف  
 هى: مطبوط براقو عليك  
 هو: مادام احنا ماطبخناش  
 هى: يبقى هنسخن إيه؟!  
 هو: بالشكل دا استغنيانا  
 عن كل طبق وحلّة!  
 هى: ووفرتلك الغاز  
 هو: وهبيجى منين الغاز  
 إذا كان مفيش بوتاجاز؟!  
 وخلاصة المعنى إيه!!!  
 هى: مش محتاجين الزبطة  
 وكفاية علينا الحيطّة  
 هو: وجهة نظر متينة  
 طيب يا رب اديها

على أفكارها وبلاويها  
هى: عندك سؤال كمان  
ولّا اتَهَبّ وانام؟!  
هو: فيه كائن حارس المطبخ  
عالى لحد السقف  
شامخ كدا زى البئف  
فيه درج وحيد قَرَدانى  
هايج وحده فى المطبخ  
زى التور البرانى  
يا ترى دا لزومه إيه؟  
شكله محسب من عيلة  
لكن الزمن رماه  
مالهوش حد يسأل  
مصيرنا إيه وياه؟!  
كل ميراثه فى الدنيا  
يادوبك ضلفة واحدة  
بيعانى م الأنيميا  
بيرصرص م البرودة  
كإنه مولود حالاً  
زى الجحش الصغير  
والبازة معاه!  
هى: إيه ده الله يقرّك؟!  
دا كلام الله يكسفك?!  
هو: دا مجرد بس سؤال  
مدعوم بالمعلومات

محشى بالتشبهات  
موجه للعقلين!  
سؤال لو فيها رزالة..  
يا ريت بدون بجاجة..  
آمال فلوس المطبخ  
اللى ساييهم باكوات..  
راحوا لاصحاب نصيبهم  
عايشين مبسوطين؟  
ولاً ياذن الله  
لسه معاكى نايمين؟؟!  
هو: سؤال وجيه فى محله..  
أنا لميت الفلوس  
بالرزمة والآساتك  
رحنا أكبر محل  
بيبيع أدوات المطبخ  
عديت كل الأقسام  
ووقفت فى السرقيس!  
لو مرة فتحت الدرج  
ده اللى بتسأل عليه  
هتلاقى صفوف رهية  
من أحجام الشوك  
هتشوف دستات مهية  
ومعالق بالمقاسات  
سكاكين كل الخامات  
ماهى دى هوايتى الوحيدة..



التكويش ع السرقيس  
هو: هوايتك الوحيدة  
تحويش أطقم سرقيس؟!!!!  
هى: ما هو ذا عشقى من صغرى  
اللى مسببلى مشاكل  
هو: أنا ما بقتشى متفاءل!  
هى: ماتكبرشى المسائل!!  
هو: ولما مفيش طبيخ  
هنعمل بيهم إيه؟!!  
هى: نحب ف بعض بيهم!  
هو: عايزانى أعيش احبك  
بالشوكة والسكينة؟!  
هى: طب بس فكر فيها..  
هو: وجهة نظر سليمة  
وكمان نظرية حديثة  
هى: أو ناخذ رأى التور  
هو: ما انا برضه برج التور  
هى: يا محاسن الصدف..  
دى جواز هابله جداً  
إحفظها يا رب احميها!  
هو: مع خالص الأسف  
مع كامل الندم  
إنت سامعننى يا رب  
يا رب إنت سامعننى  
مراتى سدّت نفسى

وخاب رجایا فیها  
من فضلك ممكن یعنى  
تطلبها وتنادیها  
خدها عندك یا رب  
إحجزها ولو شویة  
ولو ضعفْت تانى  
وعايز أستدعیها  
أرجو ماتسمعشى كلامى  
وعشان خاطرى خلیها!!

# تحفة آخر زمن!

هى: زمان كنا بنفوت  
بأتوبيس الحضانة  
على ميدان لاطوغلى!  
ولازم كل يوم  
نقف نبص عليه  
على تمثال لاطوغلى!  
ونفضل نضحك.. نضحك  
واحنا بنسأل ببراءة  
نفس السؤال الصبح  
"لو عمو عنده بيت  
قاعد فى الشارع ليه؟!!"  
نقصد تمثال لاطوغلى!  
ونفضل نلعب.. نلعب  
نسيب كل الأتوبيس  
نتكوم فى كرسي واحد  
ننحشر ورا شباكين  
نرفع راسنا ع الآخر  
ونقيسه قد إيه؟؟  
تمثال أونكل لاطوغلى  
ولما كبرنا ف ثانوى  
كنت افضل اسأل نفسى  
وانا بتمشّي على رجلى  
وبضحك.. نص.. نص

يا ترى بيشاور فين  
صبا عمو لاطوغلى؟!  
وبعد سنين الجامعة  
شغلتنى أسئلة تانية  
وانا مدموزيل عروسة  
منقوعة ورا فى التاكسى  
يا ترى لسة زعلان  
مقموص م الدنيا بحالها  
شايل فى قلبه لاطوغلى!!?  
وأخيراً اتجوزت  
ولسة خيال تمثالى  
دايماً عايش فى بالى  
لكن بطلت أسأل  
دلوقتى بس عرفت  
كان بيشاور على إيه؟؟  
زعلان م الدنيا ليه!!?  
الله يرحم لاطوغلى..  
هو: كان بيشاور علياً  
أنا أصلى كنت زميلها  
من أيام الحضنة  
وكبرنا لحد ثانوى  
وبعد الثانوى الجامعة  
والله كله صدق  
أنا مش كدّاب فشّار  
وعمرى ما كنت ابو لمعة  
درست انا التاريخ

وهى حاجة ثانية  
مش فاكـر هـى إيه!  
أنا عندى كالألو ف مـخى  
إسمه دراسة التاريخ  
حافظ تواريخ الكون  
بالثانية أو باليوم  
مدمن كل الأرقام  
وبقيت مُدرّس جامعة  
هى: وانا مرات المُدرّس  
زميلته زمان فى الجامعة  
كتبونى فى التاريخ  
أحد ضحايا الكألو  
مواليد الأسرة السابعة  
زوجة مسكينة سحيقة  
كُهنه بدرجة عتيقة  
على وش الدرجة السابعة  
هو: تعرفى يا حبيبتى إيه..؟؟!  
أيام الاحتلال  
كانوا عيال المدارس  
وفطاحل الجامعات  
يتحدوا مع بعضهم  
كومبينة ضد الأعداء  
يستلغوا من زملائهم  
آساتيك على كراريس  
يقوموا بمظاهرات  
ويقتلوا الانجليز

غارات وقنابل بوم  
وتحيا مصر الأم  
وعيشة كلها حركات  
هى: مفيش قنبلة من دول  
جت فيك ولو بالصدفة؟!  
مفيش آستيكه من دول  
مسحت إسمك بالبودرة!!  
هو: هو انتى زهقتى منى؟!  
يا حبيبتى دا غصب عنى!!  
ماهو إنتى عارفة الكاللو  
من أيام الحضانة  
هى: أنا كنت فاكره عادى  
كاللو وهيروح لحاله  
يتعالج بالجواز  
تلات حقنات فى العرق  
وهتبقى مش بطال  
والعتبة هتبقى إزاز  
وايه فايده جوازنا  
والكالو بيقزقزنا  
وجوزى تحفة بطل  
مش نافعة معاه حقن  
ولا رش بجالون جاز  
هو: ليكى كل الشرف  
أنا فعلاً حاجه تجنن  
تحفة عصرى وأوانى  
هى: أخيراً اتنصفت

بنفسك اعترفت  
الله يسامحك يا زمانى  
هو: وياريتها أى تحفة  
تحفة مالهاش تمن!  
تحفة آخر زمن  
مابقاش فيه منها تانى!!  
هى: كتب التاريخ حواليا  
مالية الدنيا عليا  
مفروشة فى كل مكان  
حصار تاريخى رهيب  
جيش احتلال عجيب  
خلانى فى مرستان  
حكاياته مالهاش آخر  
وخط العمر ف إيدي  
هريان منى زوغان  
حوش عنى سيول أرقامك!  
إنقذنى من بطولاتك!!  
ومن حصص الكلام!!!  
أنا متجوزة جوز واحد  
بعقل ولسان واحد  
مش موسوعة سانجام؟؟!!  
هو: صحيح فكرتينى...  
هى الساعة كام؟؟  
هى: سؤال مالوش وجود  
فى حياة زوجة الخلود!  
وانا هعرف بس منين

الساعة تطلع كام؟!!!  
هو: يعنى تقريباً كام؟!!!  
هى: وإيه لزمتهـا الساعة؟  
إيه مفهوم العقارب؟!  
فاكره عيد الربيع  
هنجيب البيض ونلون  
ونلبس بقى فرعونى  
وناكل م الفسيخ؟!  
يا حبيبى يا تحفة ملوكى  
الوقت اختل عندى  
أنا عايشة فى تاريخ فات  
زمانى ف قلبى اتقلقل  
اليوم ف عنياً مات  
لما انت ضربته ف مقتل  
واغتلتـه بالصواريخ  
خليتنى زوجة قديمة  
من عهد الحفريات  
مسحت تاريخ ميلادى  
دهست زهرة شبابى  
إزاي أعيش لبكرة  
وانا غارزه فى التاريخ؟!  
وف بدروم التاريخ  
وحياة أسلاف اجدادى؟!!!  
هو: جد جدودنا الفراعنة  
هما أصل اختراع  
شم النسيم ع النيل



يفطروا بعيدان ملانة  
ويدبّوها فسيخ!  
أما الإخوة المماليك  
كانوا يكسحوا الغريب  
ويغدروا بالقرب  
عقابهم طَسْ فورى  
نغزة بطرف السيخ..  
هى: وانت بتحب إيه؟  
ووجهة نظرك إيه؟؟  
حافظ أحداث وخلاص!  
بتلاقى نفسك فين؟  
قوللى اتعلمت إيه؟؟!  
عايش فى الدنيا ليه؟  
هو: أنا بنتمى للفراغة  
هى: كذاب فى أصل وشك..  
كنت اتعلمت الحكمة  
وازاى تعمّر بيتنا!  
هو: عاشق تاريخ إسلامى  
هى: كذاب فى أصل وشك..  
كنت بقالك شخصية  
وفهمت قصد كلامى!  
هو: مبهور بجنس رومانى  
هى: كذاب فى أصل وشك..  
طب كنت عشقت الدنيا  
وسافرت ورا أحلامى!  
هو: صامم تاريخ حديث

هى: كذاب فى أصل وشك..  
كنت اتعلمت تثور  
تبعد عن أرض بور!  
هو: آخرنا تاريخ معاصر  
هى: كذاب فى أصل وشك..  
كنت استخدمت عنيك  
تتعلم من حواليك!  
ودينى يا جوزى يا تحفة  
لو ما استأصلت الكاللو..  
وسيبنتك من الفسيخ..  
وعملت لينا تاريخ..  
لاشرب حالاً قدامك  
عصير الكانتالوب  
متحلّى بالزرنىخ!  
هو: تعرفى يا مراتى صحيح..  
أكيد جواكى فيكى  
حاجة وشىء لله  
إنتى حطيتى إيديكى  
على أخطر أزمة فينا..  
كسفانا يا حول الله  
هى: أخيراً اتنصفت  
بنفسك اعترفت  
يا رب تحس بيّا  
إخلص أنا اتقرفت!!!  
هو: إحنا فعلاً تايهين  
زى المجداف فى المية

مش عارفين احنا فين  
مش راسمينلنا شخصية  
هى: ما هى دى نتيجة أفعالك!  
ماهى دى نتيجة أمثالك!  
ما تسأل نفسك مرة..  
هو احنا كل دول؟  
ولاً ولا حاجة فى دول؟؟  
هو: أنا فهمت اللى مضايقتك  
هى: بالذمة فهمت إيه؟!  
هو: من النهاردة ورايح..  
أنا هعمللى شخصية  
كوكتيل ميكس عجيب  
تمشى فى صنف الحوادث  
وممكن بعد الضهر  
تجيب مهلبية!  
هى: يا بخت الطلبة بيك..  
هو: يا بخت مراتى بيا..  
هى: سيبهم الله يخليك..  
هو: ومين يحكى الحواديت  
م الصبح للفجرية؟!!  
هى: عن نفسى أنا قررت  
مش عايزة أجيب عيال  
مش ناوية أجيب عيال  
طب والباقى اللى عندك؟  
بقى مش حرام عليك  
تخرب دماغ أجيال؟!

ما تستقيل م الجامعة  
ما كفاية خلّيت مراتك  
كُهنه م الدرجة السابعة!  
هو: أنا فهمت اللي مضايك..  
هى: بالذمة فهمت إيه؟؟  
هو: من النهاردة ورايح..  
أنا هعملّى شخصية..  
هروح الشغل بكرة  
لابس بُلغة وكوفية  
وهروح بعد بكرة  
ماسك حربة وسيفين  
ولافح سلطانية  
وفى اليوم اللى بعده  
هفصل كام ققطان  
واركب مركبة حربية  
وف آخر يوم فى الشهر  
هثبت إنى متحصّر  
هحط كحل ف عيني  
واسحب خوفو فى ايديّ  
هى: دا ولا أرقام الدنيا  
تنفع أعد عليها  
أيام حبى ليك!  
يا جوز من غير أمل  
يا تحفة آخر زمن  
حرّمت اتعشّم فيك!!  
هو: إيه رأيك بقى يا مدام..

عرفتى جدى لاطوغلى  
كان ببشاور على إيه؟!  
زعلان م الدنيا ليه؟؟!  
الراجل دا كان تَطْرُهُ  
بعيد شايف قدام  
دا شىء واضح كالشمس  
محتار بين بكرة وأمس  
هى: تعرف يا حبيبى إيه..؟!  
أنا كنت زميلتك برضه  
فى دراسة التاريخ  
منحوته جنب جنابك  
دا لو ماكانش يضايقك  
ويعكننلك مزاجك..  
هو: والله أنا ما انا فاكرا!  
هى: خليك كداهو مش فاكرا!!  
أحسن تكون مش فاكرا!!  
بحق ضحايا الظلم  
واللى وهبوا حياتهم  
ينادوا بالحرية..  
بحق تاريخ العالم  
أنا مراتك زميلتك  
هقود حركة سلمية..  
هطلع بكرة فى الشارع  
أعمل مظاهرة لوحدى  
واشيل يافطة كبيرة  
واكتب عليها بدمى

واصرخ بنبرة قوية..  
"يا مزيلة التاريخ  
يا تحفة آخر زمن  
يا موسوعة سانجام  
يا جاهل يا بدنجان  
صوت الشعب بينادى  
ومفوض المدام  
يا حفيد أونكل لاطوغلى..  
اختار حاجة من اتنين  
يا الاستقلال التام!  
أو الموت الزؤام!"  
وانت بتفكر فيها  
ده إذا فكرت أصلاً  
إوعى تنسى تفتكره  
وتترحم عليه  
يمكن يغفر لحفيده  
يسامحنا جدو لاطوغلى!

# جلّ من لا يسرهو

هو: يا بيه.. يا چنتلمان  
يا هانم.. يا مدام  
مين قال الدنيا ديّا  
ماوردشى عليها ملاك؟!  
أى جاهل يسمعنى  
هيقولك دا كلام ماسخ!  
مغشوش قرش ماسح!  
مغيش إنسان ملاك  
دا خلاص صنف انقرض  
كان عُقْدُ بِحَبَّةٍ وَاحِدَةٍ  
خِلَصِتْ وَانْقَرَطْ..  
بس انا بقى مش كداب  
ولا أهطل ولا مجامل  
اللى بقوله دا واقع  
أنا مابطّيرشى حَمَام  
صاحى من الشباك!  
الدنيا فيها ملاك..  
لو فيه واحد متشكك  
لو مين عايز يتأكد  
ييجى يزورنا فى بيتنا  
وهتفتحله مراتى  
هيلاقى موديل ملاك  
روحه وقلبه ملاك

هى: دى مش مبالغة منه  
 أنا فعلاً زى ما قال  
 إسمى ست الستات  
 ولو عايز إثبات  
 راجع طرق التشغيل  
 هتلاقى زوجة عظيمة  
 بقوة ميت ملاك  
 هو: الوش وش ملاك  
 عنيتها صافية سماوى  
 القلب قلب ملاك  
 الكُره عنده تقاوى  
 والروح روح ملاك  
 ساحرانى زى الحاوى  
 سبحانه يا الله  
 يا مقسّم الأرزاق  
 هى: دى مش مبالغة منك  
 أنا فعلاً أنشى لطيفة  
 نسمة شفاقة خفيفة  
 ناعمة هادية قطيفة  
 بحب جوزى مطيعه  
 ع الجرح اتخط يبرد  
 هو: الخوف فى وجودها يهرب  
 هى: من جوة وبرة جميلة  
 هو: يعنى تقدر تقول  
 هى: ماكيت كل ملاك



هو: سبحانك يا الله  
يا كامل إنت وحدك  
يا محدد الطبايع  
ترفع بشر ملوك  
وغيرهم حقه ضايع  
هى: أنا طبعاً بدون مناقشة  
م الصنف الأولانى  
هو: وانا طبعاً بدون تردد.....  
هى: برضه فى الأولانى  
هو: لا وحياتك يا حياتى  
زعيم الصنف الثانى!!!  
أنا مش إنسان معقد  
وكلامى مش متناقض  
ولا أنا مولود شكاك  
أيوة مراتى ملاك  
ومعايا شهادة خبرة  
لكنى بقالى سنين  
واقع فى بير هلاك!  
هى: منين بتقول هلاك  
وانا مَنَجَم الملاك؟!  
ده تليفون الدكتور  
فاتح ع الناصية هناك  
روحله وان شاء الله  
يعمل بأصله معاك!  
ولو واخذ أجازة

روح الشقة اللى قصاده

عند الأسطى السباك!

هيسلك مواسير عقلك

ويلحم جلدة قلبك

إتوكل وماتسألشى

إطمن خالص خالص

أنا قاعدة بستتناك

هو: مش هتحرك ولا همشى!

هى: وحياتى إهدى ماتقلقشى!!

هو: يا خسارة وألف خسارة

لما الحلو مايكملشى!!

هى: بضحك معاك يا حبيبى

خلّى روحك رياضية

بقى حد يعيب فى ملاك؟!

حد بيشتكى من روحه؟!!

تبقى الأزمة قوية..

هو: ما هى دى الأزمة الكبيرة

هى: أنا عمرى ما حببت غيرك..

هو: وأنا عمرى ما حببت غيرك..

هى: آمال مهموم من إيه؟؟

جاوبنى يا اسمك إيه..؟؟؟

هو: أيوة.. جيتنى التايهة

صحيح أنا إسمى إيه؟!

هى: يا حبيبى إنت حبيبى

هو: ماتاخذنيش فى دوكة

ألاعيبك مش مسبوكة  
إسمى الرباعى إيه؟؟  
هى: ماتدقش بقى يا حبيبي..  
هو: طب إسم أبويا إيه؟  
هى: تشرب سحلب يا حبيبي؟  
هو: ماتاخذنيش فى دوكة  
ألاعيبك مش محبوكة  
طب إسم جوزك إيه؟!!!!  
هى: وعائزهُ ف إيه يا حبيبي؟؟  
هو: مش عايز اسمع حبيبي  
أنا عايز إسمى يا همشى..  
هى: يا خسارة وألف خسارة  
لما الحلو مايكملشى!!  
هو: آهى دى الحقيقة المرة  
مراتى بتقول حبيبي  
علشان مش فاكرة إسمى  
ولا فاكرة إسمها  
ولا إسم أبويا وأمى  
ومن بعده جوز أمى  
ولا حتى أمها  
ولا معارفى وقرابى  
وزميلاتى وزمايلى  
وعيلتى وكل أهلى  
وكل أهلها  
حبيبي دى مش محبة

دى الشماعة البلاستيك  
وراها بتستخبى  
واسم مستعار  
بتخلص نفسها  
ماسحة كل الأسامى  
حتى أسامى العيال  
حتى أسامى الجيران  
من دفتر مخها  
ولا أصحابنا الجُداد  
ولا أصحابنا القُدَامُ  
ولا إسم بنتها  
قلبى هيطلع من صدرى  
قلبى يا عالم بيطب  
دا أنا لو كلب لولو..  
كنت قَلْبْتُ لبولدوج  
وجالى شحار وسعار  
من توهة عقلها  
أنا استحملت كثير  
وشوفت منها كثير  
كل موقف واخوه..  
بشوف بهدلة للصبح  
وبطرشق منها  
دا غير تريقة الناس  
وقلة أدب البعض  
بتمطرّ فوق دماغى

ولا أجدع سيمفونية  
تنزل على أم رأسى  
بكرابيج السخرية  
وبرضه بحبها!  
هى: ما تفوّت بقى يا حبيبي  
خلّى روحك رياضية  
بقى حد يعيب فى ملاك؟!  
حد بيشتكى من روحه!!  
سامح وماتكرهنيش  
هو: لو انا شاكك فى حبك..  
لو تغلطى بس ف إسمى..  
لو تغلطى بس ف إسمك..  
كنت طبّقْت ف زمارتك  
خلّصت تارى منك  
واسلم نفسى بنفسى  
لأقرب إيد شاويش  
إلا انتى مابتغلطيش  
الصفحة عندك ماسحة  
بياناتها صُفّر مفيش!  
إفتكرى مرّة واحدة  
وانا ادّيلك مُرتب  
وفوقه كمان بقشيش!  
هى: برضه تعاير مراتك؟  
تبكّت أم بنتك؟  
على شىء تافه سخيف؟!

ما انت عارفنى من بدرى  
إن انا بنسى الأسماء  
وجلّ من لا يسهو  
اتعود بقى على حالى  
مش كل شوية تزجر  
وتكهرب الأجواء  
مش يمكن اكون مريضة  
وعندى ألزهايمر  
ودا أصل بيت الداء؟!  
هو: زهايمر فى الأسماء؟!  
والباقى كله سليم؟!!!  
هى: وعندى كمان عيب تانى  
لدغه فى حرف التاء!  
هو: مش طالبة كلام عباطة  
عايز تفسير حكيم  
منطقى للبنى آدمين  
هى: بضحك معاك يا حبيبى  
خلّى روحك رياضية  
بقى حد يعيب فى ملاك؟!  
هو: سبحانهك يا الله  
يا محدد الطبايع  
سايب عبدك شرقان  
سنين فى بير هلاك!  
شهدت عليكى الدنيا  
إنتى وكل أهلك

إفتكرى إسمى مرّة  
وانا هسكت من سكات  
يا حبيبتى يا نور عنيّا  
أصل انتى مضيعه نفسك  
بالراحة يا روحى على عقلك  
عقل البنى آدم زينة  
لا يحتمل ارتباك  
هى: كدة بتعامل ملاك!!؟  
هو: ماهو إنتى عقلك ضرب  
كُبْس النور اتقلّب  
سلك الموتور اتسرّق  
ودا كله من جنانك  
ودا كله من هوايتك  
وعشقك للفلك!  
هى: آه يانى من الفلك!  
ماتفكرنيش بالفلك!!  
وأسرار الكواكب  
وأسماء النجوم  
وعمرى اللى اتسرّق!  
هو: إنتى مش فاهمة قصدى!!؟  
هى: عالم مهول ماحصلشى  
هو: يا خسارة وألف خسارة  
لما الحلو مايكملشى!  
آهى دى الورطة الكبيرة..  
لو انا مش عارف طبعك!

لو انا شاكك فى حبك!!  
كنت ارتكبت جريمة  
أو حتى أسيبك وامشى!!!!  
هى: مليون وألف إسم  
فاكراهم إسم إسم  
كوكب يزُق كوكب  
ونجمة تجر جر نجمة  
حافظاهم صَم صَم  
باكلهم هَم هَم  
بالتعريجة وبالإسم  
بالهمزة والتفعيلة  
بكل شجر العيلة  
أسميهم بالحرف  
أطلعهم من ألف  
من أول نجمة ظهرت  
لآخر نجمة فأتت  
بالصورة وشكل الجسم  
هو: يا حبيبتي ذاكرتك دابت  
إستهلكتيها بالجامد  
مفيش محل لينا  
ولا للى جاى بعدينا  
هى: برضه تعابير مراتك؟  
الحلوة الناعمة الراققة؟؟  
هو: أنا مش بتجننى عليكى  
تبقى فين المعايرة؟!



هى: تعرف يا روحى إيه.....؟!  
 السما عندى نوعين  
 يا إما كواكب سايرة  
 يا نجوم على كيفها دايرة  
 هو: والأرض وأهل الأرض؟  
 خلاص جيبتيهم الأرض؟!  
 أساميهم مش عايزاها؟؟  
 أحوالهم مش فاكرهاها!!!  
 ليه يا رب تحكم عليّا  
 أتشردّ طول ما انا عايش  
 أضيع فى بحر الدنيا  
 زى رسالة فى إزاره!  
 يشطبوا إسمى من الكون  
 أشهد على موتى بنفسى  
 علشان حتّة جوازة!!  
 هى: ما تفوتّ بقى يا.....  
 هو: يا إيه.....؟؟؟؟!!!!  
 فوتّ بقى يا إيه.....؟؟!!  
 هى: ما تفوتّ بقى يا حبيبي  
 ربك سوانى ملاك  
 غاوية علم الفلك  
 طايرة فوق فى السما  
 مهووسة بالفلك  
 دا شىء فوق الإدراك  
 سبحانه من خَلَقْ

هو: أنا صبرى بقى ع الزيرو  
وبغرفر كما فرافيرو  
بتغرتك م النكد  
أنا ضعت كلّى معاكى  
تعرفى لو حد ندهنى  
مايقتش ارد عليه!  
مايقتش عارف نفسى!!  
ولا حتى إسمى إيه!!!  
ودا كله من الفلك..  
يا خسارة وألف خسارة  
على رأى رشدى أباطة  
لما اتعدّب فى الفيلم  
فى "الزوجة تلاتاشر"  
كان يقرأ ألف ليلة  
ويهتف كل ليلة  
يا ملك التيوس  
يا عالم الفلك  
شوية دم يا ناس  
مُخ البعير هَلَكُ!!!

# لَمَّا يِيْجِيْ بَكْرَة!

هـى: كل شعوب العالم  
كل مواطن عادى  
كل الماشيين فى الشارع  
كل بتوع المعادى  
كل حبايب الكورنيش  
كل محاسيب القهوة  
كل مقاطيع النادى  
كل جيران العمارة  
كل سكان البيت..

هو: يطلعوا مين كل دول؟؟؟  
ومالهم كل دول؟؟؟؟؟؟؟؟

هـى: كل دول يا حبيبى  
يحبوا كلمة بكرة  
عايشين يستنوا بكرة  
ولمّا الصبر يطوّل  
يستنوا بعد بكرة  
ولمّا الصبر يدوب  
بينوا جبال لفوق  
يحلموا يصحوا على بكرة  
ولمّا الصبر يتوب  
يخترعوا همّا بكرة!

هو: كويس جداً خالص  
ومالهم كل دول؟؟!

إيه الجديد فى كلامك؟!  
مفيش كائن عبيط  
مايحبش كلمة بكرة  
دى كلمة ليها مغزى  
هى: طب هاتلى مغزى واحد؟!  
هو: وليها مليون معنى  
هى: إنت راجل جميل  
إدينى معنى واحد..  
هو: مغزاها كيلو أمل  
مرشوق فى طن يأس  
تهزم كئيب وعويل!  
معناها كَبْشِيَة عمل  
واقعة فى طبق العدس  
ومعدّية البراميل!!  
يا سلام على كلمة بكرة  
فكرة مشهورة جداً  
بتفجر المعانى  
بُمية مالهاش بديل!  
بتدقّى ف عز السقعة  
بيچامة بكم طويل!!  
ربع الأفلام عليها  
نص الأغانى ليها  
مفعولها زى السحر  
ياما ربّت أجيال  
خرزانة جامده جداً  
بتشوط المستحيل!!!

هى: بكرة خرزانة وكَبْشَة؟؟؟؟!!!  
واقعة فى طبق العدس؟؟؟؟!!!!!!  
أكيد بكرة بتاعك  
يخصك إنت لوحذك  
ظابطه على ساعة لوحذك  
معناه فى دماغك إيه؟؟  
دى حاجة فى علم الغيب  
غامضة والله أعلم!  
هو: وانا مالى ومال الناس؟  
هى: مالناش دعوة بالناس  
هو: خَلينا فى بيتنا إحنا..  
هى: خَلينا فى بيتنا إحنا..  
من ساعة ما اتجوزنا  
ماخدناش خطوة واحدة  
وكل شىء متأجل  
كل شىء متكعبل  
مادوسناش خطوة واحدة  
هو: ومستعجلة على إيه؟!  
ما تمشى العيشة على كيفها  
اليوم شايل ميت ساعة  
والساعة ميتين دقيقة  
والثانية بمليون ثانية  
كلها رحلة كفاح  
والدنيا ماشيه تاتا  
وعلى مهلهما بتأتى  
مالهاش موتور وجناح

هى: دا انا اللى عغلى ساح!  
هو: والدنيا سداح مداح  
ومتلهوجة على إيه؟؟!!  
يا متأنى سلامتك..  
يا مستعجل ندامتك..  
ما كل حاجة ف بيتها  
مفيش داعى تتركبها  
الوقت معانا براح!  
هى: والعمر عدى وراح!!  
بكرة هيبجى بكرة  
هى: يالآ يا حبيبى نخرج..  
هو: خلىنا يا حبيبتى بكرة  
هى: ميعاد شغلك هيفوتك..  
هو: هلحق معادى بكرة  
هى: يالآ نسافر يا سيدى..  
هو: حاضر هنرحل بكرة  
هى: لو جعت قوم نتغدى..  
هو: خلىنا لعزومة بكرة  
هى: فرح أختى النهاردة..  
هو: خلىها تدخل بكرة  
هى: كتبتيلنا الميزانية؟  
وحسبت النور والأجرة؟؟  
هو: الميزانية فى دماغى  
ناقصة يا دوح ع الكتابة  
والنور نيون أو عادى  
مممكن يستنى زيادة

والأجرة جاية جاية  
ماهى العمارة قاعدة  
وكل دول لميهم  
بكرة شاوريلى عليهم  
من عيني لتنين يا حياتى..  
هى: يا فليسوف زمانك  
يا بهلوان أوانك  
عمرك ما رفضت طلبى  
لكن مابتعملوش  
عمرك ما قلت لأ  
وعودك كلها تفرح  
لكن بكل صراحة  
بتنزل على فشوش!  
هو: بكرة هيجى بكرة  
هو: وبكرة بتاعك دا..  
مطاط مالوش ميعاد؟  
مش ناوى ييجى أبداً  
من آخر البلاد؟؟  
حتى المثل بيقول  
لا تؤجل عمل اليوم  
لبكرة وتنام أبداً  
لحسن عمرك يفوت  
وتموت م الحسرة كمداً!  
هو: آهى دى الأمثال البلدى  
اللى مضيّعانا  
مغميالنا عنينا

فى حياتنا مآخرانا  
مالناش دعوة بالناس  
خلينا فى اللى ورانا  
دا مبدأ اتعلمته  
أبويا زرعه فيا  
وجدى زرعه فيه  
وجد جد جدى  
غطّس مناخيرنا فيه  
وراثه فى كل العيلة  
ودا سلو الكفر بتاعنا  
ماشية عليه الناس  
هى: وانا مالى ومال الناس؟!  
من وقت ما اتجوزنا  
مفيش حاجة بتتغير  
مفيش حاجة بتيم  
وانا ساكنة وصابرة عليك  
ماقلتش حتى يم  
لكن لحد إمتى؟  
هو: لحد ما ييجى بكرة  
مستعجلة على إيه؟!  
خليكى زى relax  
عايشة سداح مداح  
ماتسيبى الساعة على كيفها  
تدلّج ليه نحبسها؟  
يا رب تقف على راسها  
وتتمشى على إيدها!



متلهوجة على إيه؟!  
ما كل شىء بأوان  
مكتوبلنا من زمان  
والوقت معانا براح  
هى: أنا ادريكت خلاص  
مابقتش عارفة الشمس  
هتطلعنا بالليل  
ولّا فى كل صباح؟!  
هو: آهو كله بكرة بيان  
وبكرة هيبجى بكرة  
هى: يظهر والله أعلم  
بكرة اللى احنا عارفينه  
غير بكرة بتاعك إنت!  
هو: دى حاجة فى علم الغيب  
غامضة والله أعلم!  
بكرة دى كلمة كبيرة  
تداوى زى البلسم  
مالهاش دعوة بالموضة  
تتوارثها الأجيال  
ماشية لوحدها جونا  
بتركب الأفيال  
هى: يا رب تفهم قصدى  
هو: طبعاً طبعاً يا جميل  
مين يجهل كلمة بكرة?!  
دى أحلى برواز شيك  
متعلق فى الصالون

دى كلمة إنترناشونال  
م الهند للجايون  
دى شعار الانتخابات  
مايتخيبيشى أبداً  
ودايماً بتجيب جون!  
هى: آه يا فلحسوس زمانك  
يا واعظ كل أوانك  
لهو انت فاهمها شياكة  
تتمنظر بيها عياقة  
وتتأنتك فى السكة؟!  
لهو انت فاهمها ديكور  
طقم مخدات جديد؟!  
حزام بتوكة حديد؟!  
ورداية فى الجاكتة؟؟!!  
لهو انت فاهمها تناكة  
تنيم بيها الناس؟  
تقفل عليهم باب  
بقفل وميت ترباس  
وتبنج أهل الحتّة؟؟  
هو: وانا مالى ومال الناس؟  
هى: مالناش دعوة بالناس  
هو: تعرفى فكرت ف إيه؟  
أرگب شيش للشنكل  
هى: قصدك شنكل للشيش!  
هو: واجيب حصان مستعمل  
هى: قصدك تركب مراجيح!!

ما بدل الشيش والشنكل  
ما نفكر فى المستقبل..  
هو: المستقبل فى بكرة  
هى: وبكرة هيجى إمتى؟  
هو: بكرة هيجى بكرة!  
هى: رحت لمدرسة الواد؟  
هو: هروح العصر بكرة  
هى: دا امبارح آخر يوم  
تدفع فيه المصاريف  
السنة راحت ع الواد  
يا ابو مخ relax نضيف  
هو: ومستعجلة على إيه؟  
هى: إنت بارد كدة ليه؟؟!  
هو: مالوش نصيب معاها  
هروحله العام القادم  
بس انتى فكّرينى  
بيوم دفع المصاريف  
عشان اقوللك بكرة!  
هى: طيب بلاش الواد  
ليه رب إسم كريم  
خلينا فى حاجتك انت..  
هو: وانا كنت عايز إيه؟؟  
هى: إنت نسيت الحمالة!!  
هو: طيب هجيبها بكرة  
هى: وينطلونك الواسع  
بيلق يطق فيك

هيصبر برضه لبكرة؟؟؟؟  
هو: ومايصبرشى ليه؟  
يعنى وراه الديوان؟؟  
دا قماشه تلج ساقع  
دا بنطلون عدمان  
وحتى لونه فاقع  
هى: ما هو راخر طرشق منك  
ساب وسطك وتته واقع!  
هو: وانا اقول الموجة الباردة  
يا ترى مصدرها إيه؟؟؟؟؟؟؟؟؟؟  
هى: إنت بارد كدة ليه؟!!!!!!!  
وامّا انت مآجل عمرك  
كله لحد بكرة  
إشمعنى حضرت جوازنا  
وماخرتوش لبكرة!!  
هو: دا سؤال ذكى فى محله..  
أنا كنت يوم جوازنا  
قاعد relax فى بيتنا  
مش شايل همّ حاجة..  
مطمئن عشان فرحنا  
قالولى معاده بكرة  
قلنا خلاص يا جماعة  
لما ييجى بكرة..  
أتارى شوية اصحابى  
مقاطعهم من زمان  
عملوا عصابه عليّا

وهما عيال لعيبة  
غيروا ورق النتيجة  
سهوني وغموا عنيا  
وربطولى ايديا  
وساقوني كما الخروف  
الخارج م الزريبة  
فجأه لقيت نفسى هناك  
عريس بحضر فرحى  
وعروسة جنبى غريبة!  
أقنعهم إنه بكرة...  
قالولى ما احنا بكرة!  
يعنى انا جيتلك بالزق  
بالغصب والإكراه  
واصحابى الله يسامحهم  
قطعت علاقتى بيهم  
نهائى ان شاء الله..  
آهى دى كل الحقيقة!!  
هى: بقى انت جيت بالزق؟!  
يا ريتك قلت لأ!  
هو: مش عايزك يوم تقولى  
ما تروح منك لله  
ماتزعلش يا ستى  
أنا مستعد أصالحك  
وأصلح غلطتى..  
وبكرة هطلقك..  
نهائى ان شاء الله!

هى: وانا مين يضملى أصمد  
وياك يومين ثلاثة؟!  
ما تخليها ف حموتها  
وطلقنى دلوقتى  
وانا ابريك بالتلاثة..  
هو: ومستعجلة على إيه؟!  
هى: والعيشة سداح مداح  
هو: والوقت معانا براح  
وانا أوعدك بشرفى  
أول ما ييجى بكرة  
هطلق طلاقة جامدة  
واخلصك من قرفى  
هى: وبكرة هيجى إمتى؟  
هو: بكرة هيجى بكرة  
وابقى قابلىنى يا روحى  
لو طلع عليكى بكرة؟!

# أطول طفل فى العالم!!!

هى: يؤسفنى يا أولادى  
أعطلكم شوية  
عن كل حياتكو الفاترة  
أخذكو واستلفكو  
وخمسة بس انقذكو  
من أوقات المذاكرة  
ماهو إنتو كبرتوا خلاص  
واحد فى أولى حضانة  
والتانى فى تانية حضانة  
ممكّن تحسّوا بيّا  
وتقدّروا مشاعرى  
علشان مامتكو خلاص  
تعيّت خلاص مش قادرة!  
هو: والنبى لو ممكن يعنى  
خليهم عندك حبة  
يتعطلوا ساعتين  
أو لو ممكن يومين  
على بال ما اوضّب نفسى  
واركّب كل القطر  
دى حاجة صعبة جداً  
هتاخذ بيجى شهرين!  
هى: روح يا حبيبى روح  
ولا تشغل بالك ابدأ

دا شىء شرحه يطول  
خَلِّيك فى اللى انت فيه  
أنا قاعدة مع العيال  
ناوية أفضفض وابوح  
روح فتّح علب القطر  
رگّبله العربيات  
خَلِّيه بالمعدول  
هتلاقى عندك سِلْكَه  
على جنب فى آخر العلبه  
نايمه لوحدها مسكينه  
إياك ترميها بقوللك  
دى للريموت كونترول  
من غيرها القطر يروح  
هو: طيب أنا هاخذ بالى  
ومش هنسى الشباك  
بس انتى عطّليهم..  
سنة أو سنتين خَلِّيهم  
أنا عايز العب بمزاج  
هى: ما تجييهالى على بلاطة  
وتوصّينى بصراحة  
وتقوللى إخطفيهم  
أو أحسن سمّميهم!!  
يا أخى ربّلى العَلّة!!!  
روح شوف القطر بتاعك  
وسيينى منى ليهم..



هو: طيب طيب أنا رايح  
بالراحه ع العيال  
وصيتك العيال!  
هى: حوش الحنيه الأصلى!!  
يا خويا ما تروح خلّصنى..  
ما هم عيالى ولادى  
ولّا ولاد الجيران..!  
هو: طيب طيب أنا رايح  
عايزة القطر بدورين؟  
يفتح من البابين؟؟  
يقف فى محطتين؟؟  
ولّا تكونيش عايزاه.....  
هى: ما تعمل أى حاجة  
بدّع إنت مع نفسك  
ولا مصلحة القطورات  
ولا هيئة الباصات  
ولا فرع التليفونات  
هيجيبوا أى مفتش  
يطلّعك غلطات  
روح اعمل أى حاجة  
أنا ريقى نشف كالعادة  
زهقتنى وياك!  
نستنى الكلمتين!!  
سببى اتبحج براحتى  
وافهم العيال.....

هو: طيب طيب أنا رايح  
أنا همشى خلاص ورايح  
هى: بُصولى هنا يا عيال  
إنتو دلوقتى كبرتوا  
لازم تشيلوا معايا  
مصير أبوكو الغادر  
يؤسفنى يا أولادى  
أبعتَر صورة دادى  
أبوكو اللى هو جوزى  
وجوزى اللى اسمه سيد  
بصراحة وكل صراحة  
راجل بجد عيّل!  
هو: أنا سامعك هنا من عندى..  
هى: هكْمَلْ يعنى هكْمَلْ  
هقول كل اللى عندى  
الحق هيظهر حالاً  
أبوكو دا يا عيال  
وبسرعة قبل ما ييجى  
أطول أطفال العالم!!!  
هو: أنا شايفك هنا من عندى..  
وانا بربط خيط السيِّجَة  
إحترمى جوزك حبة  
دا انا لسة شاريلك رنجة!  
هى: ما قصدشى عيّل عيّل..  
لأ يعنى راجل عيّل.....

هو: بعدين وياكى يا ستى؟؟!!  
إحترمى ذاتى حبة  
بقى دى مكافأة جوز  
معبى فى قلبه محبة؟!  
هى: ما قصدشى عيل عيل..  
طبعه مدى على عيل  
روحه مخبى عيل  
قلبه الصغير عيل  
كل ما ادور عليه  
ألاقيه راكن ع الحيط..  
مش عارفة اقولكو إيه!  
هو عيل كبير  
شحط بشورت قصير  
أطول طفل فى العالم  
قلبه بفتاية بيضا  
بيتقمص فى ثانية  
وبيضحك برضه ف ثانية  
عامل دوشة فى البيت..  
قالبلى الحمام مبيضة  
أعصابى تعبت منه  
أنا حاسه إنى أمه  
خليكوا شاهدين يا عيال  
أنا خلاص اتهديت!  
هو: أنا جيتلك اهو يا حبيبتى  
لميت كل العدة

وجييت معايا القطر  
هى: يا حبيبى أنا ما قصدشى  
بس انا برضه ما بكدهشى  
ومعاك بنطح فى الصخر  
ما انت بصراحة صراحة  
مشغول عننا بالقطر.....  
هو: إحنا ف إيه ولا ف إيه؟!  
أنا مش زعلان دلوقتى  
والنبي تيجى تساعدنى  
ألف شريط القطر  
عايزه يمشى يتمخطر  
على سطر ويسيب سطر!  
تفتكرى دا قطر بضاعة...?  
أو قطر للركاب....؟؟  
أصلها تفرق بصراحة  
لو هو قطر بضاعة...  
هطفيه ضلمة كحل  
واكتب عليه من برة  
مصفح إكسبريس  
رمز لفخر الصناعة  
ودخان الهباب  
أما لو للركاب...  
هحتاج عيلتى تساعدنى  
عيل هيعمل ناظر  
والتانى يعمل ركاب

وانتى تاخدى قلم كُـبـيا  
تدُقّى ع الحلل  
وتنادى بأعلى صوتك  
تذاكر يا حضرات..  
تذاكر يا ركاب..  
وانا طبعاً قاعد باشا  
شارى دماغى فى الزحمة  
ما انا متعّين سواق!  
هى: أشق هدومى يا ناس..  
صندوق لعب بحاله  
اللى انت شاريه بإيدك  
نسلّى بيه العيال  
شقطه بحاله وماله؟!  
إستوليت على تلايبه؟؟  
طب سيب حاجة للعيال!!  
هو: وحد قال حاجة تانيه؟؟  
ما هم عيالى برضه  
عايش بيهم مسنود  
لِعَبُّهم هى لعبى!  
أنا بلعب بيهم حبة  
قصدى شوية وحبّة  
ويا ستى متخافيش  
كل الصندوق موجود  
هى: يا خسارة فِضى الصندوق  
إتبخرّ واتنسّف

يتيم مركون لوحده  
قاعد كُبه محطوط  
كل اللعب يا عيني  
اللى سكنت جواه  
كان ياما كان زمان  
كان ليها زمان وجود!  
هو: ودا مين بقى اللى نسفها؟!  
مين اتجرأ ونهبها!!!  
هى: يا حلاوة الاستعباط  
يا طعامه الشربات  
مش عارف مين نهبها؟؟!!  
جوزى زعيم العصاة  
جوزى أبو الطيابة  
القطر اتبخر طار  
ولولا الملامة يعنى  
كان اتقلب حمار  
وكله عمايل مين؟؟  
البيه اللى اشتراه  
اللى مدوخنى معاه!  
يا بابا اتقى الله  
عايز تلعب وماله..  
إلعب مع العيال  
مش بدل العيال!  
يا شيخ حرام عليك  
روح بقى منك لله

هَنَّى العيال على لعبة!  
لعباية واحدة لله!!!  
هو: ماهى اللعب كثير  
ماهى العلب كثير  
هى: أول ما اللعبة تيجى  
تنتشها من علبتها  
وتدخل جوة لوحدة  
تلعب فيها وبها  
يا إما تيجى الصالة  
تعيش مع الكتالوج  
وتلعب برضه لوحدة  
وساعات تكسرّ فيها  
وانا والعيال غلابة  
واقفين مدلدين  
ولا أجدع شحاتين  
بصراحة عنينا فيها  
كل المسموح نتفرج  
وانت قاعد تتنطط  
شايف العيال بتعيّط  
وانت حلو مقضيّها!  
هو: وانا حُشت حد يلعب  
الدنيا واسعة يا عالم  
هى: يا فرحتى بيك يا جوزى  
أطول أطفال العالم!  
هو: أنا فاهمك واخذ بالى

سامعك بتدعى عليا  
لكن معلش مسامحك  
خليها برضه عليا!  
وعلى فكرة يا حياتى  
أول ما القطر يطلع  
ماتنسيش التذاكر  
أول ما ارفع صباعى  
تدقّى ع الحلل  
عينك دايماً عليا!!  
هى: يا حبيبى حقك عليا  
هو: قلنا خليها عليا..  
هى: ما قصدشى عيل عيل!  
هو: بعدين وياكى يا ستى  
ما تحترمينى شوية  
بقى دى مكافأة جوز  
شارب منك قسية؟!  
إبعد يا واد انت عنى  
ماتعكرليش مزاجى  
أنا ف آخر عربية  
والقطر معاده بالثانية  
بقوللك إبه يا حبيبتى..  
قومى حطيله كولونيا  
أنا عايزه عريس يتمخطر  
إنشالاً يدوس عليا!!  
هى: بمناسبة العريس



بكره الذكرى السنوية  
ليوم ما اتجوزنا  
دا قبل ما اعرف إنك  
عقلك سمسمة ترالالى!  
تحب نساfer فسحة  
ناخد كرسى ومايوهات  
ورمل وعوامات  
نقعد على شط ستانلى؟!  
أو لو مشغول فى القطر  
وعمالك دول خانقينك  
أخدهملك واشنقهم  
على بوابة المتولى!!  
هو: بقى عيد جوازنا بكرة؟!!  
هى: وكالعادة هتقول  
والله ماحدثش قاللى..  
هو: والله ما حدثش قاللى..  
هى: وانا اقدر أنسى يوميهها  
وفضيحتى وسط أهلى!  
هو: مش فاكر أى حاجة..  
هى: هو انت اللى اتفضحت  
ع المستوى المحلى؟  
هو انت اللى اندبحت  
على الصعيد الدولى؟!  
هو: ولا فاكر أى حاجة  
أنا مركز فى القطر ..

هى: بقى كل الناس فى فرحها  
بتغنى أغانى شباب  
روشة لمنير ودياب..  
أو أى حاجة ترقص  
نسرب فيها خوفنا  
وساعة البوفيه  
يدوها عبد الوهاب..  
عشان الناس تكش  
ماتكترشى فى الأكل  
رحمة ورأفة بجيوبنا  
وكفاية مصاريف وعذاب..  
هو: حقيقى مش فاكِر حاجة!  
أصلى مركز فى القطر  
هى: مش فاكِر لَمَّا جوزى  
المحروس الطويل  
حبيب أمه الجميل  
قبطان كل الشباب  
والأجيال اللى جاية  
نفض لأغانى الموضة  
وكليات الشباب  
طرد العوالم برة  
وقال بصوت حيانى  
بصُولى هنا يا جماعة  
إليكو مفاجأة فرحى  
إسمعوا تلك الأغنية

ممنوع بوفيه دلوقتى  
 مغيث فراخ وكباب  
 قفلوا كل الأبواب  
 مش عايز الطّش حد  
 يالّا معايا يا جماعة  
 بصوت واحد كورال  
 هغنى وردوا عليّا.....  
 هو: ماما زمانها جاية  
 جاية بعد شوية  
 جاية لعب وحاجات  
 جاية معاها شنطة  
 فيها وزّة وبطة  
 بتقول واك واك واك  
 هى: والمعازيم وراك..  
 هو: واك واك واك واك واك!!!  
 هى: أبوك سمع واك واك  
 وشّه بَقَبَقْ كسوف  
 زى اللى جرّف أرضه  
 عينه انكسرت م الخوف  
 ما هى دى بضاعتكو برضه!  
 واتزربن كالحلوف  
 هو: الله يرحمك يا فوزى  
 هى: الله يرحمك يا فوزى  
 فنان يابن الإيه..  
 هو: أغنيتى وغاويها

الناس زعلانة ليه؟  
هى: لا خالص ولا فيه حاجة!!!!  
الدنيا تضرب تقلب  
وابوك بشويش اتسحب  
وفارقنا من سكات  
وسيادتك عمال ترقص  
متحزم وبتديها  
وتوزع ابتسامات!  
هو: صحيح والله نسيت  
أبويا كات حالته إيه؟  
هى: دورت بعينى عليه  
ييجى يلحقنى من إبنه  
ودا فص ملح وداب!  
لقيته واخدله زاوية  
حاطط مناخيره فى الأرض  
متخشب كالتمثال  
الهربان م النحات!  
بعتناله ابن عمك  
يخف عليه الصدمة  
يهز الرجل هزة  
ليكون عملها ومات!  
هو: ربنا يديله الصحة  
دا بقاله ثلاث شهور  
عيان هييموت م الكحة  
وموصيني على حبوب

وعلبتين حقن  
أو باين كبسولات..  
أول ما اخلّص لِعَب  
واركّب باقى القطر  
هروحله بالمطلوب  
فى أى يوم ثلاث  
هى: ولا تشغل بالك إنت  
لا ثلاث ولا غير ثلاث  
لَمَّا اتأخرت عليه  
الكُحّة اتنكست نَزَلَه  
رمىنا كل الحبوب  
مش نافع كبسولات  
بعتناله الإسعاف  
قاموا بالواجب وزيادة  
ودفعناله المطلوب  
قبل ما ياخدوه رهونات!!  
هو: بس انا فاكر يوميهـا  
يوم الفرّج بتاعنا  
والناس فرحانة بيّا  
إنى اندمجت جدّا  
مع كلمات الأغنية  
هى: بأمانة كدّمة ف إيدى  
لَمَّا شدّتنى أرقص  
وصباعكّ جه ف عنيا  
هو: بس المعازيم فرحانة

كانت عمّالة تصقّف  
بذوق وكل شياكة  
ماحدّش كان متضرر  
من كلمات الأغنية  
هى: الله وحده أعلم  
دى فرحه بجد سعادة..  
ولّا تصقيف شماتة؟!  
ربنا أعلم بضميرهم  
أنا كان هيغمى عليّا  
هو: أنا مالى ومال ضميرهم  
أنا برقص بكل ذمة  
وماما زمانها جاية  
هى: لا وانت كمان بدّعت  
وع الكويليه التالت  
بلّغت top القمة  
وانت بتنهى الأغنية!  
بسببك فرحنا شطّب  
تانى يوم الساعة ستة  
يادوب بعد الفجرية  
وطبعاً إنت إبيبيبيه...  
طفحان بحور عرق  
ولا زيوت العربية!  
هو: خصوصاً فى الكويليه  
بين عادل والدكتور  
لما الواد العيان

لازم يدُوله الحقنة  
هى: قعدت تعيِّط جنبه  
وترتعش وتفرفر  
زعلان ع الواد وأمه  
مش عايِزُه ياخذ الحقنة  
هو: مش برضه حرام يا جماعة..  
واد حلو واسمه عادل  
ياخذ فى سيَّه حقنة؟!  
هى: دى شغلة الدكتور  
هو: دا حرام على الدكتور!  
هى: وانا ماتجوزتش عادل  
ملعون أبو خاش أبو عادل  
وماليش علاقه نهائى  
بمشاكله مع الدكتور!  
هو: طب يالّا جهّزى نفسك  
علشان خلّصت القطر  
بصى والنبي ع الشكل  
رگبت العربيات  
ربطهم بالبكرة  
ورتبت البنزين  
لترين فى كل محطة  
والسينجة واخدة راحتها  
بقت على سنجة عشرة  
هى: يؤسفنى يا أولادى  
إنكو تيجو الدنيا دى

تلاقوا أبوكو عيّل  
وتستعروا منه!  
نفسى تكبروا من بكرة  
تاخذوا اللعب بتاعتكو  
بصراحة وكل صراحة  
مش قادرة احميكو منه!  
هو: إحنا ف إيه ولاّ ف إيه!!  
يالّا لا القطر هيمشى  
وهو مَجَرى أساساً  
الكل يحفظ دوره  
أنا عايز اللعب بمزاج  
ماسمحش بغلطة بتاناً  
قوم فِز منك ليه  
أنا عايز شغل بزمة  
وتذاكركو مجاناً!!  
هى: قوم يابنى منك ليه  
القطر هيطلع حالاً  
ودى نهاية زوجة  
أطول أطفال العالم!!!!!!



# جوزى ملك السرحان

هى: فى مرحلة الخطوبة  
وفترة جس النبض  
وطلائع الاستكشاف  
أمى أكلت ودانى  
واصحابى الخبرة عنى  
عزمنى فى بارتى خشاف  
هو: بمناسبة الخشاف..  
مسلسلات رمضان  
يا ترى جاية السنة دى  
إجتماعية عادية؟؟  
ولاً بوليسية قوية؟؟  
ولاً كوميدية شقية؟؟  
ولاً تاريخية بتحكى  
عن أمجاد الأسلاف؟!  
هى: الله ينور يا حبيبى  
جوزى سرحان افندى..  
ركز معايا شوية  
إنت بتقول فى إيه..؟!  
وانا بحكى واغنى ف إيه!!  
إنت عايش معايا  
ولاً اتكعبلت منى  
ووقعت ولأ إيه؟؟!  
أنا بحكيلك ع البارتى

هناك فى عز البارتي  
ربّنا أنا وصحباتي  
نسأسأ فى الخشاف  
نفتفت سيرة دى  
ونسقّى فى حواديت دى  
واحنا تحت اللحاف..  
هو: بمناسبة اللحاف..  
الشتا فى بلاد الاسكيمو  
يا ترى تلج وكوارث؟  
وهيقفلوا المدارس؟؟  
وازاى اخونا البطريق  
هيسافر كدة فى الضلمة  
من غير شمعة وكشّاف؟؟؟!  
هى: الله ينور يا حبيبى  
سرحان افندى جوزى  
نفسى تركّز معايا  
بتفكر انت فى إيه؟؟  
وانا تاعبة قلبى فى إيه؟؟  
إنت مصحّص ويايا  
ولّا ادلّجت منى  
وضعت ولّا إيه..؟؟؟!  
أنا بحكى يوم السهرة  
وعزومة الخشاف..  
أنا واصحابى اجتمعنا  
عملولى دراسة جدوى  
وأبحاث مستفيضة

فى طبایع الرجاله  
من أول صنف لطیف  
ألیف ممكن یتشاف  
لحد صنف hopeless  
میئوسُن من شفاه  
عقن جوا الفریزر  
عدی تاریخ الصلاحیه  
لازم بیجوا یشیلوه  
فى عربیه الإسعاف..  
هو: بمناسبه الإسعاف..  
دلوقتى اتطوروا جداً!  
كانوا الأول یسیبوا  
حاله المریض ترن  
ردّوا ولاّ مارڈوش..  
كانوا فى العاده ما بیجوش  
وانشالاً عنه ما عاش!  
لكن دلوقتى خلاص  
لكن دلوقتى حرام  
عملولهم خدمه سریعة  
اتصلی بس علیهم  
ترد علیکی الماكنة  
ویطیروا على جناحین  
یشیلوا العیان شیل  
یسقوه المحالیل بزازه  
وكانه ابن ذوات!  
یحتفلوا بعید میلاده

يطلّعه حيل  
يلبسوه طراير  
ويركّبه ديل!  
ياخده بإيد المريض  
لحد ما روحه تطلع  
قبل العربية ما توصل  
ويمضوا إنه مات!  
هى: الله ينور يا حبيبي  
جوزى ملك السرّحان!!!  
أبوس راسك وإيدك  
ومغيش مانع رجلك  
ركّز معايا لحظة  
ركّز دا العمر لحظة  
كلاكيت رابع مرّة..  
أنا بحكى يوم الحفلة  
ونميمة الستات  
ولغوصة الخشاف  
واحنا تحت اللحاف..  
ولسته طويلة عريضة  
من خبرات الزوجات  
يومها مسكونى صحباتى  
هرولى صرصور ودنى.....  
هو: هو مسلسل رمضان.....!!؟  
هى: ونصايح إنما إيه  
جامدة ومستوية  
كسفونى وأحرجونى

بريه منهم برييييييييييييييه!  
هو: هو الشتا فى الاسكيمو.....!!!  
هى: ستات لهلوبه شطة  
خلاصة الخلاصة  
بنات صواريخ سكود  
ورقصنا طول الليل  
على غنوة حطة يا بطة!  
هو: أصل سرينة الإسعاف.....  
هى: ما تخرس بقى واسمعنى  
إنت مخلوق من إيه؟!  
وجنس جبلتك ايه؟؟!!  
طيب وحياة النعمة  
أنا بحكى حكاية مهمة  
فى غاية الخطورة!  
عن ليالينا الخشاف  
وحواديت اللحاف  
وأصناف الرجالة  
العِدلة والمغرورة!  
ومخطط الستات  
فى معاملة الرجالة  
إمتى بيجروا ناعم  
وإمتى يهددوهم  
بالأسلحة المحظورة!  
وذكريات ظريفة  
قبل الحرب الأهلية  
وسقوط اتنين م الأسرى

فى جوازتنا المقهورة!  
هو: مالك بس يا نورا؟؟؟  
هى: وقاعدة اضحك وياك  
وهبوس إيدك ورجلك  
بس تركّز معايا..  
وانت بصراحة جبان!  
أدّلع فيك شوية  
والله ينور يا حبيبي  
وانت عايش فى البرج  
سرحان منى م الصبح  
يا شيخ ريتلى جنان!  
أنا عايّزة افهم دلوقتى..  
إنت جوزى بالإسم؟!!  
عايش معايا بالصدفة؟!  
عبرنى بكلمتين  
يا جناب السوبرمان!  
خد وادّى معايا يا شيخ  
دا انا عندى مرارة واحدة!  
مين بس ضحك عليك  
وقاللك عندى اتنين؟!!  
مرة خلّيك إنسان!  
ويا ريتك برة البيت..  
كنت اشتكيت م الوحدة  
لكن المقلب يا بيه..  
إنك عايش معايا  
لكنك مش معايا

واقف قدامى منظر  
عقلك غايب يا ضنايا  
مسطول فى التوهان!  
أنا كل ما احكى معاك  
تجيب الوش الثانى  
يا إما تخش تنام  
يا تفتح موضوع تانى  
قال يعنى خلاص سرحان!!  
هو: إنتى بتكلمينى؟!!!  
ما أخذتش بالى يا حياتى  
أصل انا شاغلانى حاجات  
واحدة كل اهتماماتى!  
هى: إدينى الصبر يا رب!!!  
يا تاخده يا إما تاخذنى  
إما تخلّيه ينسانى!  
ويستحسن لو تاخده  
تدينى فرصة جديدة  
أجرب حظى تانى!  
كلاكيت خامس مرة..  
يوم حفلة الخشاف  
أصحابى البطالين  
حكولى حاجات كتير  
نصحونى وحذرونى  
قالولى كبرى مخك  
الدنيا مش مستاهلة  
سدى ودانك عديها

لكن ما حدّث قاللى  
أفوت ازاي م الوحلة  
اللى اتكعبلت فيها؟!!!  
هو: بمناسبة اتكعبلت.....  
هى: إنت ما عندكش رحمة؟!  
ما سمعتش عن اختراع  
إسمه حنّية وشفقة؟!!!  
بالراحة على أعصابى  
دا انا لسة فى عز شبابى  
إنت بتهاتى فى إيه..؟!  
وانا بنبح حسّى فى إيه؟!!  
هو: بتتكلّمى على مين؟!  
وقصدك سرحان مين؟!!  
هى: أنا عايشة لوحدى فى وادى  
وانت عايش فى وادى  
ويقولوا الست قوية؟؟!  
وساعات بقى مفترية؟؟؟!!  
هو: يا رب اموت لو قصدى  
أرفع ضغطك واجيبلك  
عشرين أزمة قلبية!  
هى: الله ينور يا حبيبى  
يا إبنى ركّز معايا  
قوللى فىن الحقيقة؟  
مش عارفالك خريطة؟؟  
إنت حقيقى سرحان  
مشغول دايماً بتفكر؟!



ولّا عامل سرحان  
طايح فيها ومستعبط!!  
أمى اللى اسمها أمى  
فشلت حكمتها معانا  
طردتنا من شقتها!  
ولا نافع فيك فيتامين  
ولا نافع فيك أسافين  
شالتنا من دماغها  
وأصدرت قوانين  
منعتنا من زيارتها!  
أصحابى الخبرة عنى  
غُلبوا وغُلب حمارهم  
إستغنوا عن معرفتنا  
والباقى هيجصلوهم  
خُلينا عايشين مقاطيع  
الكل هيرموا طوبتنا!  
هو: الله ينور يا حبيبتى!  
أنا سامع كل كلامك  
مجبور أقعد قدامك  
مش عارف اروح لمين!!  
بقالى ست سنين  
عامل نفسى سرحان  
مش لاقى حل تانى  
بصراحة أنا زهقان  
وتعبت من التمثيل  
ياما سهرت أفكر

والليل عليّ طويل  
قعدت اقول لروحي  
يا واد كفاية تمثيل  
مواضيعكو مش متفقه  
أفكاركو مش متفقه  
لكن دى برضه مراتك  
شالت معاك كتير!  
يا واد اعمل بأصلك  
وارضى معاها بقليل  
بحكاية الخشاف  
واللى جابوا الخشاف  
خلى عندك ضمير!  
كبر مخك عديها  
إحنا عندنا ودين  
علشان نسمع بواحدة  
نملا مخنا ببلاش  
والتانيه نسرب منها  
كل اللى مايعجبناش  
خليك انت الكبير!  
هى: يعنى انت سامعنى فعلاً  
وعامل فيها سرحان؟!..  
هو: طب خطى روحك مكانى..  
أنا مالى بالخشاف  
ونصايح الست أمك  
وخبرة كل اصحابك  
وستات قاعدة فاضية

يحكوا تحت اللحاف؟!  
أنا مالى ومال نميمتهم  
والتجربة العظيمة  
وأفكارهم اللئيمة  
عن أصناف الرجال  
من أول صنف لطيف  
لحد صنف hopeless  
وعربية الإسعاف؟؟؟؟؟؟  
حاولت ألقت نظرك  
لمواضيع ثانية مفيدة  
وانتى سرحانة منى  
وانا محرج اقول الحقيقة  
أنا بكره الخشاف!!  
مابقتش قادر اخبى  
وهو ده اللى قلبى  
من غير لف ودوران  
من غير أى التفاف!  
هى: كاتم دا كله فى قلبك  
بقالك ست سنين!!  
وطول الوقت داهون  
عايش معايا بالغش  
بالكذب والتمثيل!  
هو: مايهونش عليا زَعَلِك  
مش عارف أعمل ايه؟!  
مالقبتشى حل تانى  
ماحبش الخناق!

بعمل روحى سرحان  
دا حقناً للدماء!  
هى: طب ليه من أول يوم  
يا جوزى ماصارحتينيش!!  
هو: مايهونش عليّا زَعَلِك  
أنا من جوايا بحبك  
أخاف اجرح مشاعرك  
تغضبي ماعرفش أصلحك  
وازاى من غيرك اعيش!!  
ويا ستى ماتزعليش..  
يا حبيبتي لو يرضيكى  
تكملى حكاياتك  
من النهاردة ورايح  
أنا مستعد أشاركك  
فى حواديت الخشاف  
وحفلات الخشاف  
ولو عايزانى كمان  
أغير إسمى عشانك..  
إعتبريه م النهاردة  
خشاف ابن ام خشاف!!

# روميو زعيم الآباش!

هى: كان ياما كان زمان  
يا سادة يا كرام  
ولا يحلاش الكلام  
إلا بذكر النبى  
عليه الصلاة والسلام  
هو: عليه الصلاة والسلام  
هى: فى يوم من الأيام  
كان عندى حالة لطيفة  
شخصيتها غريبة  
كان ليها إسم أصلى  
نسبناه بمرور الوقت  
من أفعالها المريبة  
وطبيعتها المخيفة!  
هو: غريبة صحيح عجيبة!  
هى: كانوا بيسمُّوها قُبَّة!  
روحى يا بت يا قُبَّة..  
تعالى يا بت يا قُبَّة..  
هو: والقُبَّة دى من إيه؟!  
لازم ضررها كان مَحْنَى  
وطَّت زيادة حَبَّة  
قام ماتفردشى تانى..  
ولّا تخصصها نادر  
فى هندسة المعمار

و قُبَّة المبانى..  
أو يمكن تحفة هايلة  
من عصر الديناصورات  
جاية من كوكب تانى؟؟؟  
هى: خالتى الله يسامحها  
راحت مطرح ما راحت  
رحلت فى عز شبابها  
بعد جوازها بسنة واحدة  
هو: بعد جوازها بسنة واحدة!!  
هى: دى كانت حتة واحدة!!!!  
ملكة جميلة مسحورة  
أنوثة ع السكين  
حلاوتها حلاوة مطبوعة  
ياما حكيتلى مامتى  
عن شقيقتها الأميرة  
من غيرها تاء التأنيث  
ولا تجرؤ ترفع راسها  
ولا تتمخطر وتقول  
أنا إسمى (ت) مربوطة!  
هو: القعدة احلوت جداً..  
إدينى لحظة يا حبيبتى  
هقوم انشف عرقى  
ثوانى هجيب الفوطة..  
بقى فيه ستات فى الدنيا  
حلاوتها بالشكل ده؟!

دى لازم غنوة جميلة  
عزفتها الدنيا فى ليلة  
أجمل من ألف ليلة  
على أنغام الملايكة  
سماعى أو ع النوتة..  
هى: الله على تشبيهاك!  
مفيش فى الدنيا أحلى  
من رقة تعليقاتك..  
الخالق الناطق خالتى!  
ع الوش الأولانى  
لما تكون رايقة وفايقة  
عايقة ومش متضايقة  
لكن يا ويل العيلة  
من نكد الوش الثانى!  
هو: الحلوة لها وش تانى؟!!!  
هى: خالتى الخالة قُبَّة  
كانت عصبية موت  
أقل حاجة تنكشها  
أتفه حاجة تنطُرُها  
تعمل م الحبة قُبَّة  
كفاءة نادرة جبارة!  
نفائة فى النكد  
تخصص حرب آباش  
قسم انقلابات وغارة!  
مطلوفة مابتقفشى

مالهاش دعوة بالذوق  
ولا بتفرملها إشارة!!  
هو: أقل حاجة تروشها؟  
أتفه كلمة ترعشها؟؟  
وأنشى ع السكين؟؟؟!!  
هى: بكل كراسى الصالة  
تضرب أعظمها كلوب  
تبهدل أجمل لحظة  
وتخلّى الليلة طين..  
هو: الله يرحمها خالتك  
هى: الله يرحمها خالتي  
هو: كانت أيام وراحت  
هى: راحت مطرح ما راحت  
هو: وتوته.. توته.. توته..  
هى: ماخلصتشى الحدوتة!!  
هو: من فضلك ثانية واحدة..  
ماجنننيش معاكى؟!  
يا حبيبتي أنا مش فاهم..  
الله يرحمها قبة  
خالتك منين وازاى؟!!!  
دى خالة واحده ليكى  
ورحلت من زمان  
هى: صحيح يا ابن خالتي!!  
هو: أمى كان اسمها قبة؟!!  
وأنشى على السكين..؟؟!!



روحى وتعالى يا قُبَّة..  
 دى تبقى الست أمى؟!!!  
 طب إمتى ازاي وفين؟؟؟  
 دا انا عمرى ما عشت معاها  
 أصلاً مالحقتهاش  
 أصلاً ماشوفتهاش  
 جابتنى وهوب اتكلت  
 بدال ما اشرب لبنها  
 رضعت سميّط بالدُقَّة  
 وما حدّش من ساعتها  
 حكالى حاجة عنها  
 ما عرفشى انها نكديّة!  
 تعمل م الحبة قُبَّة!!  
 هى: الله يرحمك يا خالتى  
 هو: الله يرحم خالتها  
 راحت مطرح ما راحت  
 وتوته.. توته.. توته  
 هى: ما خلصتشى الحدوتة!!  
 هو: لكن اشمعننى دلوقتى  
 بتحكى عن زمان؟  
 وأمى كات بتعمل  
 وأمى كات بتقول  
 دى حاجات قديمة فاتت  
 أيام كان ياما كان؟؟  
 من عهد ام الخلول؟؟؟

هى: علشان للصبر حدود  
وانا استنفذت معاك  
أظن كل الحلول!  
هو: وانا إيه علاقتى بأمى؟!  
هى: صورة واحد بوشين  
Typical وبالكربون  
فولة مقسومة اثنين  
ملزوقة بالمعجون  
هو: دا انا حتى ماشوفتهاش!  
هى: صدق المثل اللى قال  
اللى خَلَّف ماماتش  
والعِرْق صحيح دَسَّاس  
خالتى المرحومة قُبَّة  
سابتلنا ابن عاهة  
شاددنى معاه فى متاهة  
قُبَّة من نسل قُبَّة!  
هو: طيب وانا مالى ومالها?!  
هى: حياتى معاك خرابة  
عايزة حملة تنضيف  
ماهى خالتى حبيبتى الأصل  
وانت سواد النيجاتيף!  
هو: وانتى حلاوة البوزيتيف!  
يا سلام لو ينطق قلبى  
يا حب عمرى الوحيد?!  
دا انا جوايا كلام

يهد جبال الألب  
ويضح إيسانس الجنة  
فى عروق بيت الوريد!  
هى: يخرّب بيت كلامه  
يخرّب بيت عنيه  
دا غير مواهب تانية  
مدفونة فى ابن الإيه!!!  
هو: يا حبي الأولانى  
يا غرام قلبى الآخرانى  
هى: يا خوفى المركب تقلب  
ويجيب الوش الثانى..  
هو: بتقولى حاجة يا حبيبتى؟؟؟  
هى: كلامك كله جميل  
روميو الحب الأصيل  
لكن اعمل إيه فى طبعك؟!  
حِمَقى وقلبك حامى  
أقل حاجة تشيط  
من أُنْفِه كلمة تغيّر  
تعمل م الحبة قُبّة  
آه يا ابن خالتى قُبّة!  
Hyper فى كل حاجة  
هو: الله يرحمها قُبّة  
هى: يا تاعبنى وشاغل بالى!  
بخاف موت من زعلك  
ماضمنشى رد فعلك

نفسى تصلح أحوالك  
نفسى توزن أفعالك  
حقيقى خايقة منك!  
بحبك وبخاف منك!!  
هو: بحبك حب مخيف  
بغير عليكى منك  
هى: إعقلها واحسبها إنت..  
بقى يرضى مين فى الدنيا؟؟  
عشان افتحكك قلبى  
أحكى حكاية طويلة  
من أول كان ياما كان  
واقعد ألف وادور  
والدنيا فى عينى تدور  
بحاسب ع الكلام!  
خايقة فى لحظة غضب  
تبيع أيام العشرة  
تدمر كل حياتنا  
ومابقاش المدام!!  
هو: يا حب عمرى الوحيد  
القلب له أحكام  
هى: ما هو إنت وخالتى واحد  
أصل وصورة بروحين  
Typical زى الكتاب  
فولة مقسومة اتنين  
عايمة على وش المية

فرع لشجرة لبلاب  
يا خسارة الحنيّة  
لما تخنقى وتضيع  
وكل دا كله ليه؟؟  
كله بسبب العصبية!!  
هو: الليلة يا روحى يوم  
مش زى أى يوم  
الليلة عيد ميلادك  
يا أعز إنسان عندى  
إنسى كل العتاب  
إرمى كل العذاب  
أنا كلى تحت أمرك  
عايزة نسمع مزيكا؟  
نلعب حاورينى يا كيكا؟  
يا أغلى حاجة عندى  
إنت تشاور يا حبيبى  
أؤمر وطلبك عندى..  
هى: يخرّب بيت كلامه  
يخرّب بيت عنيه  
دا غير مواهب تانية  
مدفونة فى ابن الإيه؟!!  
كلامه كله جميل  
هو: روميو الزمن النبيل  
هى: وچولييت بين إيديك..  
هو: يا عُقد فل البيت

هى: طيب وجايللى إيه؟؟  
هو: مش تسألينى الأول  
بحبك قد إيه؟؟!!  
هى: بتحبنى قد إيه؟؟!!  
هو: لو لاغيتى نسيم الهوا  
والندا فى الفجر..  
لو عدّيتى حَبْ المطرة  
فى ليلة برد..  
لو جمعتى نجوم الليل  
فى بوكيه ورد..  
لو كتبتى حروف الشوق  
بريشة القلب..  
لو ترجمتى قصايد الحب  
فى كل عهد..  
لو هختار مليون مرّة  
حبّيتى بجد  
هختارك انتى يا روح الروح  
وأوفى العهد..  
هى: يخرّب بيت كلامه  
يخرّب بيت عنيه  
دا غير مواهب تانية  
مدفونة فى ابن الإيه.....  
بقى بالذمة يا ناس  
فيه جوز زيه كدة؟!  
فيه حد فى زمانّا ده

بيحب بالشكل كدا؟؟  
كلامك كله جميل  
صافى صادق معسول  
هو: طالع من قلب روميو  
علشان العمر يطول  
هى: التليفون بيضرب  
هو: دا جرس الإنترنت  
هى: أرد ولا مارْدش؟؟  
إستر يا رب الليلة  
إلهى وانت جاهى  
إلهى ما تقلب غَمَّ..  
هو: ما تردى يا روحى عليه  
شوفى الحكاية إيه؟؟!!  
هى: آيوه.. آيوه يا مشتاق  
إطلع مستنياك..  
هو: بتقولى إيه يا هانم؟؟!!  
إشجيني وسمّعينى..  
مشتاق دا يبقى مين؟؟؟؟؟؟  
يبقى الحب القديم؟؟!!  
ولا صاحب أنتيم؟؟؟؟!!!  
ويطلع هو لوحده  
ولا انتى عازمالى مين؟؟؟  
أنا عايز الرد حالا  
لحسن هتقلب غَمَّ  
وهتبقى ليلة طين!

هى: آهو جاب ع الوش التانى!!  
لزمته إيه الحَمَقة؟!  
لزمته إيه العصبية؟؟!!  
حاسب عود الكبريت  
اللى نسيته ع الشمعة  
نط وشط فى إيديا!  
هو: إنطقى حالا على طول  
واذا اتأخرتى ثانية  
والله انا مش مسئول!!  
هو: دا البواب الجديد  
لسه واصل النهاردة  
إسمه عمك مشتاق  
بيسأل إمتى يطلع  
التورته والجاتوهات  
وييجى هو لوحده  
ولا يطلع معاه  
الواد ابنه الصغير  
يشيل حبة حاجات  
هو: حاجات ولا جوابات  
هى: آه يا ابن خالتى قُبّة..  
دا واد قصير خالص  
مابيطولش الجرس  
يا دوبك طول الركبة  
لكن انت هتفهم إيه؟؟  
ويتسأل أصلاً ليه؟؟!!



خَلِّيك دايماً نرفوز  
حِمَقِي عصبى مهزوز  
تعمل م الحب قُبّة!!  
هو: أنا عايز افهم يا هانم  
شايفانى راجل أهبل  
داقق قفص عصافير  
هتعمينى الأشواق؟!  
من دون كل الأسماء  
المدعوء اللى تحت  
البواب الجديد  
يطلع إسمه مشتاق؟!  
هى: سألته نفس السؤال  
أهله سموه مشتاق  
عشان يفضل ويعيش  
هو: دا كلام فارغ يا هانم  
مايخشش ذمتى أبداً  
كمان رغييتى معاه؟!  
وماحالكيش بالمرّة  
مرات أبوه فى بلدهم  
كات عاملة إيه وياه!!  
وبيقبض كام بغشيش؟؟?  
هى: إستذوق بقى مايصحش!  
سألته سؤال وخلصنا  
دا كلام وحديث عادى  
أرجو ماتنساش يا حبيبي

الليلة عيد ميلادى..  
هو: وایه یعنى يا قريبتى  
دا يوم بارد وعادى!  
هى: الله يرحمها خالتى..  
هو: الله يرحمها أمى..  
هى: راحت مطرح ما راحت  
هو: كانت أيام وراحت  
هى: صورة واحدة بوشين  
جفاف من غير محلول  
وانا استنفذت معاك  
أظن كل الحلول  
هو: إنطقى حالا على طول  
واذا أناخرتى ثانية  
والله انا مش مسئول!!  
هى: حياتى معاك خرابة  
محتاجة حملة تنضيف  
ماهى خالتى حبيبتى الأصل  
وانت تراب النيجاتيف!  
هو: إنتى زعلتى يا حبيبتى  
يا حياتى أنا ما قصدشى  
زَعَلَه وراحت لحالها  
آهى عَدَّت والسلام  
دى حاجات من حبى فيكى  
والقلب له أحكام  
هى: مش عارفة ليه أنا حاسة

إنى وقرب خالص  
مش هبقى مدام فلان  
هو: مايصحش كدة يا حبيبتى  
أنا عنك ماستغناش  
هى: كفايه كدة يا قريبي  
أصل الدنيا ماتسواش  
هو: يا حبيبتى غصب عنى  
دا من حبى يا جميل  
هى: إرتحت خلاص دلوقتى؟؟  
مسكت أتخن كرسى  
وضربته فى الكلوب  
قَلَبْتُ القعدة ضلمة  
درمغت الليلة طين!  
هو: كله م الإتركم  
هى: يا عيد ميلاد ما تم!  
هو: طيب ماتزعليش  
وبرضه بعد دا كله  
آهو البواب ماجاش  
هى: يخرّب بيت كلامه  
يخرّب بيت جناه  
قالوهاالى اصحابى م الأول  
هى الدنيا ماتسواش  
روميو الحب الجميل  
عقله الصغير تابعه  
من يوم ما اتجوزنا

وإسمه الحركى فى قلبى  
روميو زعيم الآباش  
هو: وكان ياما كان زمان  
يا سادة يا كرام  
هنبداً الحدوتة  
هى: كان ياما كان زمان  
يا سادة يا كرام  
وتوته.. توته.. توته  
خلصت كل الحدوتة!

# يا بخت طرزان بشيتا!!

هو: أنا كل يوم بالليل  
أتلهى وانزوى مع نفسى  
واربع أربع تربع..  
أسحب روحى على جنب  
واركن فى ركن بعيد  
أعصر دماغى عَصْرُ  
م الليل لحد العصر  
بفكر أوى على مهلى  
بتأتى مش متسريع  
يمكن ألاقى حل  
فى العيشة الكحلى دى  
أو أى حاجة تنفع  
وأفضل قاعد مكتوم  
متكور كالبشكير  
المحشور فى الهدوم  
يا مقرقص يا مسترّيع  
ليه يا ربى ترمى نصيبى  
مع واحدة ذوات الأربع؟!  
هى: قوللى يا روحى من فضلك  
بتفكر بس فى إيه؟!  
خدها منى نصيحة  
الفضضة والهلضمة  
أرحم من وخز الإبر

إسأل مجرب قبلك  
يمكن يرشد طريقك  
ويقولك شورة مريحة  
وماتخافشى من حاجة  
ولا حد هيسخر منك  
ولا فيه أسد هياكلك  
دا كلام بينى وبينك  
وأنا عمري ما احنت وعدى  
مش هعمللك فضيحة..

Promise my dear forever

هو: بقى يعنى الدنيا ضاقت  
لما اشكى حالى ليكى  
طب تيجى ازاي وحياتك؟!  
أصارك باللى فيكى؟!  
أشكيلك منك ليكى?!  
هى: وفيها إيه من فضلك?!  
زمان فى عصر اجدادك  
والأيام البدائية  
وحتى فى المدنية  
والعالم الهمجية  
ودورى البوندزليجا  
كان الراحل صريح  
يقول لمراته فوراً  
على كل حاجة فى قلبه  
ينصف مخزن صدره

سواء بكلام مفهوم  
أو لغة الشيك بيكا  
وكما قال الصحافى  
واسمه فلان الفلانى  
أهم حاجة فى الحب  
تبقى الحياة أنتيكا!  
هو: أهو ذا اللى هيجننى!!  
طول النهار تقول..  
وزى ما قال فلان  
زى ما صرّح ترتان  
تاخذى الكلام بعبله  
وتلزيه فى بعضه  
بحلاوته وكل هبله  
وتيجى وقت الزنقة  
تتباهى بكلام غيرك  
وانتى كالبغبان  
هى: My God help me!  
إحفظ أدبك من فضلك  
وبلاش البغبان  
أنا عاملة حساب الجو  
وانك راجع تعبان  
هو: أنا مش تعبان وحياتك  
دا انا اللى بقيت جبان  
مش قادر اقوللك رأيى  
ولا أشكى أسباب غلبى

لا حصّلت الإنسان  
ولا حصّلت الحيوان  
أنا راخر عقلى ساح  
وبقيت كالبغبان  
عائش شغلتي فى الدنيا  
أستدعى كلام ابويا  
من العهد اللى كان  
هى: My God bless his soul  
يا رب يكون فى الجنة  
يسكن فيها على طول  
إنشالاً ع الحركرك  
وبتقدير مقبول  
هو: على رأى حكمة ابويا  
الدنيا من ده على ده  
ساعة رايقة متحنية  
أجمل م البنت هنية  
ماسحة الأحزان آستىكة  
وساعات نكدها مستف  
تبخ علينا تتفتف  
وتقلب ضنك غميقة  
وفى الحاليتين عايزانا  
نتبسّم وندلعها  
نسايسها بالبولوتىكا  
والرزق ده مكتوب  
ولكل وليف وليفته



يا بخت طرزان بشيتا!  
Oh Really shame on you! هى:  
زهقت منه ياهووووه!!  
ولو انها حكمة بيئة  
بلدى جداً عتيقة  
لكنها فى الموضوع  
بتلخص الحقيقة  
It's the whole truth  
for old and the youth  
هو: يا مُنجى من المهالك  
حديثى معاكى مش سالك  
نفسى أفهم كلامك  
انشالاً حرف واحد  
بس اتكلمى بالعربى..  
خلى اللغات لاصحابها  
هموت واعرف من فضلك  
بتجيبى الكلام ده منين؟!  
يا ستى نبينا عربى..  
أنا زهقت وطقيت  
قربت خلاص اطرشق  
وهضيع منك بالعربى!  
هى: ماله كلامى من فضلك؟!  
مش عاجبك بس فى إيه?!  
هو: مجعلص كدة ومكلبظ  
ونُصه مش بتاعك

على رأى فلان ما قال  
على رأى فلان ما عاد  
منشئى أوى متحفلط  
مليان جمل كلاكيغ!  
من اليمين مش ماشى  
من الشمال مش ماشى  
أنا مش فاهم ولا كلمة!  
أنا عايز منك خدمة  
أقوللك حاجه أحسن.....  
قفلى كل المواضيع!!

هى: But which one do you mean??

تقصد أنهى مواضيع؟؟  
هو: قصدى كل المواضيع  
هى: فسّر أكثر من فضلك  
إتكلم بشكل أوضح  
ولاحظ إن تاريخى  
وأصل شجرة عيلتى  
يعود لأسرة خفرع  
هو: ليه يا رب ترمى نصيبى  
مع واحدة ذوات الأربع!!!!  
هى: قصدك أنهى مواضيع  
شاورلى تانى من فضلك  
هو: قصدى كل المواضيع  
يا بتاعة البتاتيع  
هى: أنا غلطانة من الأول

إنى اتجوزت جاهل!!!  
واخذ الدنيا هليهل  
مش عارف أى حاجة  
مش مدرك قيمة أهلى  
لا عمره فتح مجلة  
ولا بيفلّى الجرنان  
أنا اللى جييته لنفسى  
صحيح أنا اللى استاهل  
أنا عايشة أئنب نفسى  
إزاي أحب جاهل!!؟  
هو: لعلمك بقى يا مدام  
أنا عمرى ما كنت جاهل  
أنا زوج فى زمن صعب  
أنا عايش بس منظر  
عايش لكن مش فاهم!  
زمان وانا طفل صغير..  
كنت اقرا كتاب أو خمسة  
وكل طلعة شمس  
أحضن جرنانى فى قلبى  
أبص فى كل صورة  
أفلّى كل صفحة  
مرّة واتنين وخمسة  
واعرف شوية english  
لكن على قد حالى  
الكلب إسمه dog

والضفدع يبقى frog  
واعد لحد خمسة  
واما اتجوزت جنابك  
أوقاتى وقعت منى  
الدنيا صعبه جداً  
وانا مكفى على أكل عيشى  
بحفر بضوافرى الخمسة  
طول النهار بهاتى  
ونازل دق وقّحت  
عشان مانقعش تحت  
وباريت على قد دا كله  
نلحق م الدنيا خمسة  
هى: يعنى ماعندكش وقت  
تقرا انشالاً الجرنان؟!  
دا شىء impossible جداً  
وعيشة تقرف جداً  
هو: أديكى جيبتى المفيد  
العيشة تقرف جداً  
أنا نفسى بقت مسدودة  
زى الديك اليتيم  
قاعد فى مالطة بيدّ  
فعلاً جيبتى المفيد  
ولا فاهم أى حاجة  
مش فاهم أى حاجة  
حيران وكمان متلخبط

قرفان قرف متكهرب  
من غير ماتاخذى بالك  
حطيتى إيدك ع الجرح  
جيتى سيرة الجرنان  
فعلاً على رأى جنابك  
دا شىء impossible جداً!!!  
هى: أنهى جرنان من فضلك؟  
حدّد أكثر لو تسمح  
الأصفر ولا الأحمر  
الهادى المستكين  
ولا الضالين آمين؟  
ولا الجِمَقى المتشعوط  
اللى مش عاجبه العجب  
ولا الصيام فى رجب؟؟  
ولا اللى نُكِّتُه بايخة  
يا ترى يبيع لمين؟؟؟  
ولا اللى يفرقع bomb  
ومش مهم فى مين؟؟؟؟  
هو: كله على بعضه كله  
ماهو كله زى كله  
هى: المشكل فى من فضلك؟؟  
Please catch a problem  
هو: يا ستى حرام عليكى  
دا انا كل حياتى problem  
أنا طفحان برة الكوتة

وانتى تبعزقى فى فلوسى  
على شرا كل الجرايد  
دا غير صف مجلات  
وكمان مواقع النت  
أنا مش عارف أعدى  
بتكعبل بين رجلىكى!  
والنبى وحياء والديكى  
وحياء خالك بسكوتة  
سيبلى لقمة أكلها  
مش لاقى حاجة أقولها!  
بيتى اتخرب خلاص  
جاء ضرفه وأعلن قلسه  
والبركة يا هانم فىكى  
مش نافعة ولا ميزانية  
وانا مش هولع فحم  
ولا هلبس ياقة ع اللحم  
مش هاكل واشرب مية  
الرحمة يا ستى شوية  
هغفر بين إيديكى!!

هى: Please.. Please don't touch

حقيقى it's too much

يا جوزى يا جاهل افندى

العيشة من غير جرايد

العيشة من غير ثقافة.....

هو: زى الكريزة التايهة

من فوق وش الكنافة!  
عارف كل الكلام ده  
فاكرانى راجل جاهل؟!  
دا أول درس أخذته  
مع فرقة الكشافة..  
هى: بقى الثقافة كريزة  
هربانة من الكنافة!!!!  
Please help me God  
Forgive him my God  
أمرى لله يا ربى!  
ولو انه تشبيه بيئة  
بلدى ولغته ركيكة  
لكنه فى الموضوع  
بينشن ع الحقيقة  
It's the clear truth  
for kids and the youth  
هو: يا مُنَجِّى من المهالك  
طريقى معاكى مش سالك  
أفعالك مش بريئة  
أديكى جيتى المفيد  
حطيتى إيدك ع الجرح  
قصداً أنهى حقيقة؟؟؟؟؟؟  
هى: فسر أكثر من فضلك  
هو: أحلف بالله كلامى  
واضح وضوح الشمس

إختارى صفحة جرايد  
صفرا حمرا وخضرا  
هتلاقى نفس الأخبار  
مكتوبة بميت طريقة  
واحد بيدافع جداً  
واحد بيهاجم جداً  
وعلى رأى مراتى حبيبتى  
دى حاجة impossible جداً  
مش عارف فين الحقيقة!!  
مين فيهم الحقيقة؟  
ومين نواياه بريئة؟؟!!  
لو فاهمة فهمينى  
إلهى وانت جاهى  
ما يرمىكى فى ضيقة  
كله بيحلف إيمان  
إنه مش عايز حاجة  
ونادر عمره كله  
علشان اخوه الإنسان  
على رأى فلان الفلانى  
على رأى المرحوم ابويا  
يا بخت طرزان بشيتا!  
هى: كلامك فيه وجاهة  
لكن مش كله صح  
ومش كله غلط..  
فيه ناس فهمانا حمير



وناس بتحبنا فعلاً  
بتبلغ الزلط..  
هو: وحياة أبوكى سيبينى  
أنا قلبى مفلوق خِلقة  
دول عالم مالهاش كلمة  
وشّها مكشوف وبجحة!  
أنا مرّة قرّيت مقال  
قبل الخطوبة بيوم  
لواحد بيه مشهور  
بيكتب كل يوم  
ومتصور بيضحك  
قال يعنى ضميره نضيف  
ومش مخاصمه النوم  
كان فرحان بالسّتات  
اللى بترطن لغات  
شجعنى ع الخطوبة  
علشان اتباهى بيكى  
واهو نفع العيال  
ونثقفهم لغات  
هى: ده أكيد راجل مودرن  
متعلم إما فى لندن  
أو فى سكولات باريس  
هو: وبعد كام يوم جواز  
لقيته ناشر مقال  
أيام ما كنت بقرا..

فى جريدة تانية خالص  
عدوة ديکها التانية  
وبرضه بيکتب فيها  
عمود فى كل يوم  
ومتصور مکشر  
حاطط إيده على خده  
قال يعنى حِکَم الدنيا  
محفورة فى كهف أهله  
شایل طواجن سيته  
وجلد وشه مقشر  
قال يعنى خلاص الزهد  
متقنطر قناطير عنده  
علشان الناس تقول  
أصل البعيد مثقف!  
لقيته كاتب مقال  
يلعن أبو الستات  
اللى بترطن لغات  
علشان دى قلة ذوق  
ودعوة للفساد!

هى: C'est très very impossible

هو: لو انا مش راجل عاقل

كنت رميتك من قلبى

واخلّى عيشتك سودة

أخلص منك ذنبى!

هى: Please my love don't tell me

دا مخلوق همجى دنىء  
يستاهل المقاطعة  
وعلقة بالقباقيب!  
أحسن حاجة تعملها  
طوّح مقالته الثانية  
وركر مع ديكها الثانية  
ترجع تانى حبيبي  
ونعوم فوق الزبيب  
هو: وافصل كل كلمة  
على كيف مزاج جنابى؟!  
دى تبقى عيشة كلاهى!!  
هى: دى حاجه normal جداً  
الأمر أصله عادى  
ده كله أكل عيش  
حسب المعلوم والرايعة  
علشان يقدر يتعشى  
بط ووز وكباب  
هو: دا بدال ما تقولى كداب  
ماتقرالوش عامود  
ولا تجيلوش كتاب؟!  
هى: يا حبيبي take it so easy  
أعصابك يا عزيزى  
هو: علشان صاحبنا وغيره  
من طوابير الحرباية  
ودول ما أكثرهم

بطلت كل حاجة  
نفسى تاهت من نفسى  
عشان مش فاهم حاجة  
مادام الدنيا ماشية  
بالمصلحة والشطارة  
إتفرغت جوايا  
لجكم الراجل ابويا  
ونشرة جو الطقس  
وماتشات الرياضة  
هى: وجهة نظرك منقوصة  
بتدعمها اللماضة!  
هو: وياريته يا ستى عايب  
ده كمان ماعجبناش  
حتى الرياضة اتلّطت  
المتعة اختفت انبسطت  
أفتح صفحة جرنان  
ولّا افتح تليفزيون  
ألاقى كائن بيغتنى  
بيقولوا عليه الكابتن  
عمال يلت ويعجن  
بيهرتل أى كلام  
سخام ماركة بكام!  
بيوصف ماتش تانى  
غير اللى شوفته بعينى  
ده انا بفهم أحسن منه

أقله عندى ضمير  
ما بدمرشى الرياضة  
تلاقيه قاعد أليط  
متأسنز على أهالينا  
وهو وحياة دينى  
فسل عديم الضمير  
ما محصل أبو الفصادة  
واللى بيقوله يمين  
يرجع يهده شمال  
بعدين يقول ماقلتش!  
وحياة أنجالى ما قصدتش!!  
أنا مش شايل وشين  
إنتو عنيكو فى القرشين؟؟!!  
ما تقفوليش ع الواحدة  
دى مش أخلاق رياضة!!!  
هى: يا جوزى هدى خُلقك  
كبر مخك وفُكك  
دى حاجة normal جداً  
وكله ع الحساب  
ما تدقش كدة ع الواحدة  
إعتبره طيش شباب  
هو: دا بدال ما تقولى كداب  
ما تقرا لوش عامود  
ولا تجيلوش كتاب؟؟!!  
هى: يا حبيبى take it very easy

أعصابك يا عزيزى  
هو: وحياة أبوكى سيبنى  
أنا قلبى مفلوق خِلقة  
ودمى لوحده فاير  
هى: Ok.. it's the truth  
Oui mon dieu c'est vrai  
But what can we do???!!!!  
يعنى هنعملله إيه؟؟!!  
هنخاصم بقى مقالاته؟؟  
ونواجهه بكل حقيقته؟؟!!  
يعنى نكسف طبيعته؟؟!!!!!!  
أهو ذنبه عند ربه!  
كلامك فيه وجاهة  
هو: واحنا يا عينى غلاية  
بنبلعلهم الزلط  
وكل كلامهم غلط  
آرائهم كلها غلط  
واحنا وراهم فى الساقية  
ضاحكين علينا بإيدينا  
مغميين عنينا  
وراهم كعب داير  
هتفرق إيه بالذمة  
جرنان تاريخ النهاردة  
من طبعة أمس وبكرة؟؟!!  
يا شيخة كدة بلا وكسة

خلينى كاتم وساكت  
لحسن لو اتكلمت  
هتبقى فعلاً كارثة  
مش فاهم أبداً ليه  
ما بنتعلمش الدرس؟!  
فيه قفلة فى الضمير  
ولو اتكلمت لوحدى  
ميت كلب يقولك بس  
ويشاوروا ع المجنون  
الحنبلى المفتون  
وياريت كلامى بفايدة  
الأزمة عويصة غويطة  
لا نافع فيها صريخ  
ولا نافع فيها همس!  
هى: Don't know what to say  
كلامك فيه تصريح  
مع شوية تجريح  
ويحتمل الوجاهة  
فيه ميت جرنان قدامك  
دور على راحتك خالص  
شغل مخك واختار  
دى حاجة عايزة نباهة  
هو: وبكام الميت جرنان؟؟؟  
بتيقششى من فلوسى!!  
دى تبقى عيشة سفاهة

أشقى هـدومى يا ناس؟!  
أنا بشقى واتعب ليه؟؟؟؟  
كل اللى جاى رايح!  
يا دوب على قد الأكل..  
قصدى بواقى الأكل!  
ليه بشقى واتعب ليه؟؟!!  
علشان أشتري جرنان  
يدبحنى ويسم بدنى  
يبيعنى ويقبض تمنى  
دى ناس شغلتهـا الغش  
والعشرة منهم بقريش  
وطول ما فيه ناس شبيهك  
هنضيع وحياة خالتك  
وبس بقى من فضلك  
كفاية مناقشة مملة  
كفاية بهدلة وسخافة  
طب لو فرضنا وافقتك  
وصرفنا كل فلوسنا  
وقرينا الميت جرنان  
وسامحنا الكدابين  
يمكن إحنا الظالمين  
ومصدر السخافة!!!  
طيب فى الآخر يعنى  
هنطلع برضه بإيه؟؟!!!  
دى عيشة تسد النفس



وسلّطة بالكنافة!!  
هى: دا شىء impossible جداً  
وجوازة تقرف جداً  
العيشة من غير ثقافة.....  
هو: زى الناموسة الواقعة  
من فوق شَعْر الزعّافة!  
ماهو أمثالك م الجهلة  
اللى فاتحين ع الرابع  
بكلام مش فاهمينه  
مكانهم الطبيعى  
يتكهنوا هيلة بيلة  
فى قرية البضايح  
ثقافة قال ثقافة!!  
دى تغاهة خيانة مياصة  
يا سلام سلم ثقافة!!  
حافظ كل الكلام دا  
فاكرانى راجل صايح؟!  
وعقلى كله ضايح؟!!  
دى أول صفحة قررتها  
فى مقرر تالّثة رابع...  
هى: Leave me alone please!  
روح اعمل أى حاجة!!  
ولّا ارغى فى التليفون!!!  
لكن ارجع تانى واقولك  
أمرى لله يا ربى

ولو انها ذكرى بيئة  
بلدى أفاظها بذئمة  
لكنها فى الموضوع  
بتنور الحقيقة  
Propably it's the truth  
for us and the youth  
هو: يا مُنَجِّى من المهالك  
يا ستى نبينا عربى  
نفسى أفهم كلامك  
أنا ع الآخر بالعربى  
هى: ممكن تدينى فلوس  
ناقص عشرين جرنان  
وييجى خمسين مجلة  
أنا نازلة تانى وجاية  
هغيب كتير وشوية  
ما انا لسة ماجيتهمش  
رايحة أدور عليهم  
يا إما فى الأكشاك  
يا إما فى المفارق  
أو بين كل المسالك..  
ولو الشمس غابت  
وجه بدالها القمر  
لو مارجعتش تعرف  
إنى سييت التحرير  
وفشلت فى العجوزة

وبلغلف فى الزمالك!  
هو: يا مُنَجِّى من المهالك!!!!  
على رأى حكمة ابويا  
الدنيا من دة على دة  
ساعات نَغْشَة وآلِيطَة  
وساعات حاورينى يا كيكَة  
وفى الحاليتين عايزانا  
نستزوق وندلعها  
نسايسها بالبولوتيكا  
إنزلى لَقِّى على كيفك  
الرزق دا مكتوب  
وكإنى ماقلتش حاجة!  
ولا فاهم أى حاجة!!  
فى دنيا الشيك بيكا  
الله يرحم أبويا  
قبل أمّا يموت بالطبط  
عَدَل دماغه عليّا  
وبص جوا عنيّا  
نظرة عميقة غويطة  
وصانى أحب مراتى  
مازعلشى من نصيبى  
قاللى يا ابنى يا حبيبى  
لكل وليف وليفته  
ويا بخت طرزان بشيتا!

# مش انت فارس أحلامى..

هو: كل البنات بتحلم  
هى: بفارس الأحلام  
هو: تمسك إيدته اليمين  
هى: وف إيدته الثانية تنام  
هو: يعيشوا مع بعض سعدة  
هى: مايطلّوش كلام  
هو: يشربوا من بحر السكر  
هى: يحلّوا بمليساية  
ملفوفة بورد الجنة  
متزوقة بالسوليفان  
هو: يا سلام على الكلام  
هى: ساعات بتبقى حقيقة  
وساعات كتير أوهام  
هو: وتوته توته توته  
هى: حلوة ولا ملتوتة؟؟  
هو: إسم الحدوتة إيه؟  
هى: فارس كل الأحلام  
هو: نقول م الأول تانى..  
هى: لأ إصحى وحياة دقنك  
البت نامت خلاص  
هتاخذها بقى حلوانة  
تعجنها فى ميت سلوانة  
وشوية شوية تغفل

قال يعنى عايز تنام!  
هو: إنتى بتقولى فيها..  
بعد الحدودة الحلوة  
كابس عليا النوم  
وفعلآ عايز انام!  
هى: قوم انجر على المطبخ  
هتلاقى طبقين م العصر  
وليفة سلك مقطوعة  
وبواقى حلة وبرام  
خُدهم قُمين ع الساكت  
بضمير يا ابو الضمير  
ماسمعشى حسك أبدأ  
يعنى ماتحطش منطق  
ولو فتحت بَقَّك  
وغنيت أى غنوة  
من الشريط اياه..  
هخلص تارى منك  
وادوِّك السكينة  
وافوتلك بيتى وامشى  
والجأ لله حبيبى  
ماليش فى الدنيا سواه..  
إلهى وانت جاهى  
تتوب عليا وامشى  
إلهى وانت جاهى  
بطنك تسيب وتمشى  
إلهى تعيش متشرد

تشحت وتقول لله!  
هو: ويهون عليكى بيتنا؟!  
تفوتيه من غير تمن  
تخونيه وتبهديه  
وبالرخيص تبعيه  
حرام عليكى يا حبيبتى  
دا انا شايلك للزمن..  
هى: مطّريق ع اللى فيه!!  
أنا طول اليوم بكافح  
أنا طول اليوم بنازع  
ما بطلتش كلام..  
لو اسمع طرف صوتك  
وحياتك.. وحياة شنيك  
لا قلبها ليلة هباب  
زى عيشتنا الهباب  
وابيتك جعان..  
إنجر على طراطيفك  
إتسحب على الهوا  
وابقى اطفى النور بشويش  
ورّد الباب وراك  
لحد قبل الآخر  
سييه موارد شوية  
ألاّ البنت تصحى  
إفهم قصد الكلام..  
وماتبصش وراك  
وانا رايحة اريح شوية

واياك تصحّى البنت  
أنا ما صدقت تنام..  
هو: حاضر يا روحى حاضر  
أنا هطفى زرار النور  
واسيب الباب موارب  
عشان يدخل نور..  
وهمسك الجلابية  
لحسن تعملّها دوشة  
ولو انه قماش كستور..  
ومش هبّص ورايا  
يا سعدى وكل هنايا  
وهنجر قوام على المطبخ  
أغسل الاطباق وغيره  
واسيّ التلاجة  
وامسح داير ما يدور..  
دى حتى الميّة حلوة  
والدنيا حر نار  
ما هم قالوها زمان  
المية تروى مين؟  
تروى جناب العطشان  
وتطفّى نار حرّان  
يا جماله والحوض غرقان  
والحلة مع البرام  
عايمين على وش الميّة  
يا سلام ع الميّة!  
صحيح الفن نور..

هى: سامعك يا بوز الإخص  
إتلهى على عينك اسفوخس  
هو: دى غنوة حلوة جداً  
للبيه عبد الوهاب  
هى: ما انا عارفة يا سيدنا البيه  
إنها أغنية جميله  
للولو عبد الوهاب  
هو: ما هو الحق عليه  
يغنى فى البانيو ليه؟!  
ويخلّى حياتنا عذاب  
هى: الراجل حر يا سيدى  
إيه حشرك بقى يا حبيبى؟!  
هو: يا ستى خلاص يا ستى..  
يغنى مكان ما يغنى  
يغنى وهو مبلبط  
أوبرة فى التليفون  
إنشالاً يعمل قفلة  
على شدة السيْفون!  
هى: ولما هى بتاعته  
بتلعب ليه فى حاجته؟؟  
بتلخبط فى الكلام  
وتبوظله الألحان  
مانتش مكسوف من شيبته؟!  
هديت كيان الغنوة  
ما تسيب الراجل نايم  
وماتلوشى غيبته



هو: ما انا بدندن فى سرى  
وماحدش سامع حِسِّى  
هى: إمشى من وشى إمشى  
ليه يا ربى تحكم عليا  
أنا وحدى يا خلق هوووو  
أتنبيل أسمع حِسِّك!  
يا راجل اكتم خالص  
غور من وشى الساعة دى  
أنا ميت شيطان راكبنى  
لحسن ابهدلك كرشك!  
مش عايزاك تفتح بُقِّك!!!  
صوتك يا باى شنيع  
جحاشى شىء فطيع  
يقطعنى ويقطع عيشتك!  
هو: ولا والبنت نايمة؟  
هى: ولا والبنت صاحبة  
هو: وانا يعنى مش إسمى راجل..  
ومن حقى أغنى؟!  
هى: يعنى انت ماتبقاش راجل  
غير لما جاعورة البيه  
ترخ على دماغتنا  
وتنبيل تغنى?!  
هو: يا حبيبتي ليه القسيّة؟  
صارحبنى علشان خاطرى  
إيه سر المعاملة ديّا؟!  
هى: مش عاجباك المعاملة?!

دا انا لولا بنتك وسطينا  
ماكنتش شوفت جنابك  
وانت يا دوب زى الفتلة!  
هو: دى معاملة بطالة جداً  
وشىء لم يرضى حد  
هى: ولما تغنى جنابك  
دى حاجه ترضى حد؟!  
مين يسمعنى بسبّخلك  
يفتكر انك مظلوم  
وانك يا عينى عليك  
بتستخبى منى  
جوة دولاب الهدوم  
مع إن العكس صحيح  
إحنا اللى بنجرى منك  
ومعانا كل الجيران  
لحسن تفرقع فينا!  
وابقى حرم المرحوم  
دى عيشة مالهاش آخر  
وانت نايم بتغنى  
وانت صاحى بتغنى  
يا شيخ حرام عليك  
إعتقنى وابعد عنى  
إنشالاً بس يوم!!  
هو: وانتى زعلانة من إيه؟  
منكادة أوى كدة ليه؟؟!!  
يا ستى بغنى لنفسى

وبسليلكو الجيران  
أنا راجل البيت داهو  
وبعمل اللى فى نفسى  
حتى اسألى الجيران  
هى: كلامك ده كان ينفع  
بيجى من ثلاث سنين  
أيام ما كنت تدندن  
ما بينك وما بين ذاتك  
بصوتك اللى عامل  
كما شمشون الجبار  
ماكانش حد سامع  
ماكانش حد دارى  
ربك رحيم غفّار  
مايرضالناش فضيحة  
واسمه حلیم ستار  
هو: يعنى انا أسباب العار؟؟!!  
هى: لحد ما وصلنا يوم  
هو: كان يوم من أفخم يوم..  
هى: كان يوم من أزفت يوم..  
هو: يوم اتعزمنا فيه  
هى: على زفة واحد خايب  
مايتخيرشى عنك  
عايش فى الدنيا عالة  
ومالوش فى الفن نايب  
هو: شوفتيني وانا بحى فرحه  
وطلعت جنب الفرقة

وفقعت كام موال  
ما انا أصلى أحب الشعبى  
ودنى تخصصها شعبى  
مثلى الأعلى متقال  
هى: ودى حاجة تتنسى برضه؟!  
إنت فقعت الموال  
وفجأة قام زلزال!  
أبو العريس خد بعضه  
يطعم فى بلاد برة  
وام العريس اندلقت  
وجابولها طاسة الخضة  
ولاً العروسة يا عيني  
دموعها بقت إسها  
وبياض عنيتها كَتَّيْت  
لَزَقَ زى المشبك  
ونسَل كما الشوال  
روچ شفايفها سِيْل  
وكُحل عنيتها سِيْل  
هما خمس دقايق  
وحالها بقى متيّل  
الله يرحم متقال!  
هو: كل دا تأثير موالى  
يا ستى انا حر فى نفسى  
أنا أعمل ما بدالى  
هى: ما تغور مع نفسك واشبع  
إياكش حتى تولى

بوظّت فرح الناس  
قَرَّتْكَتْ علاقتنا بيهم  
ومغيش أمل نهائى  
فتفوتة فى المية ترجع!  
هو: دى كانت أول مرّة  
أعبر فيها عن ذاتى  
عن مكنون عذاباتى  
عن قعر إحساساتى  
مش طالبة عضل ومجانص..  
كات أول مرّة أغنى  
واجعّر وسط الناس  
دى حاجة سهلة خالص..  
كام درابوكا على كمانجة  
وكلام فى الهوا وأونطة  
بس انت اعلا بالطبلة  
أهم حاجه الطبلة  
وحفله تجر الثانية  
دى حاجه فل خالص..  
هى: يا سيدى الفن دا نعمة  
وف أصله إحساس  
وانت يكفينا الشر  
عندك مرض برانى  
أنيميا فى الإحساس  
هو: ومن ساعتها إيه..  
صوتى آخر تنظيم  
هى: حرام عليك يا شيخ

قصّدك وصلة تثبّت!!!  
هو: ولمّا عملت شريط  
مش دغدغ كل الدنيا؟؟!!  
والقرش نزل يخرّ  
وكان السما يا اخوانا  
بقت بتمطر بمية!  
هى: وبقيت بتغنى علنى  
مفيش ضمير بالمرّة  
الناس جرالها إيه؟!!  
بتسمع منك ليه؟؟؟؟!!!  
فرحانة بيك على إيه؟؟؟؟؟؟!!!!  
العيشة فعلا مرة!  
هو: بجيب فلوس يا ماما  
هى: دى إسمها نطاعة!!  
هو: سميه طرب أصيل  
سميه بكا زنجيل  
سميه غنا المساطيل  
آهو كله فى الطراوة!  
هى: يا راجل راعى ضميرك  
فيه حد يغنى يقول  
الفلة فى الجينية  
لايسة فستان طويل  
بكمّ كرانش آستك  
أصلها من عيلة أصيلة  
مالهاش دعوة بالورد  
الدبلان المفستك؟؟!!!!!!!

هو: أغنية طحن الطحن  
بتورّ فى كل حتى  
بالذات كلمة مفستك  
فى الميكروباص والتاكسى  
لحد موج البحر  
والعيشة كلها طحن  
ومتحزمة بالآستك  
هى: يا ألف خسارة عليك  
من دون كل الرجالة  
نقيت فارس أحلامى  
طلع من خيبتى بلاستيك!!  
هو: بكرة تعترفى بقيمتى  
وبالفلة ام آستك  
البركة فيها هى  
خلت فلوسنا تكثر  
يطرقع فيها الآستك  
هى: وبتك لما تكبر  
أقوللها عنك إيه؟؟!!!!  
أبوكى فسد الناس!!  
شوّه ذوقهم وودانهم  
ألعن من مية نار  
أقوللها عنك إيه؟؟!!!!  
بابى أبو صوت معيزى  
ساب شغلانات الدنيا  
قامت فى دماغه قومة  
وجاب للشعب العار؟؟!!!!

هو: كبرى مخك مشيها  
خلينا نفرح بالبت  
ونجيلها واد يخواويها  
هى: ونطلعه محامى  
أقله يكسب منك  
لما يجيبك ليلاتى  
من أسفلت التخشبية  
هو: والتهمة إيه اسم الله؟؟؟؟  
يا مراتى يا ام العيال؟؟؟؟؟؟؟؟؟؟  
هى: متهوم بتهمتين  
الأولى يا فرحتى بيك  
النصب والاحتيال!!  
والثانية يا خيبتى فيك  
تجريف فن الموال!!!!  
هو: دا انا خليفة متقال  
هى: والتالته بدعى فى سرى  
يا رب عشان الشعب  
يخرسلى أبو العيال!!



## زوجة بالضربة القاضية

هو: أنا يعنى مابقولشى حاجة  
والله ما اقصد حاجة  
أنا بس كنت ببرطم  
بينى وبين نفسى طبعاً  
ويعنى كنت بقول  
ماحدش خالى منها  
هى: من إيه بالطبط يا سيدى؟!  
أحب اسمع برطمتك  
هو: خالى من العيوب  
ماحدش خالى منها  
هو: ولما ماحدش خالى  
قالب دماغى ليه  
بالحواديت والبلاوى؟!  
هو: أنا مش بيّاع حواديت  
ولا ليّا فى البلاوى  
أنا عمري ضاع معاكى  
اتبعت فى كل حتّة  
بقى شوية فرافيت  
ويا دوب فاضل شظايا  
وانا جوزك راجل البيت  
عايش موطّى رقبتى  
ألملم فى الفرافيت!  
هى: يا حبيبى يا مسكين

يا ضعيف بالأوى يا حبيبي  
إنت يا جوزى لثيم  
إيه رأيك تجيب ربابة  
وتغنى فى الموالد  
وتحكى حكاية نفسك  
يا منقوع الطيابة  
يمكن يتبرعوك  
بطقم حلل متشطّب  
واتنين كيلو شوكلاتة  
هو: والله أنا راجل طيب  
وقلبي راخر طيب  
هى: يعنى اعتراضك إيه؟  
بتزن م الصبح ليه؟!  
هو: أنا عمرى ما قلت حاجة  
وبحمد ربنا جداً  
كل اللى يجيبه كويس  
كل المقسوم كويس  
يا ربى لا اعتراض  
يا ربى لا امتعاض  
هى: وبياه يفيد الاعتراض؟؟!  
هو: وماحدش خالى منها  
هى: من إيه بالطبط يا سيدى؟  
هو: خالى من العيوب  
دا انا ماشى بكلم نفسى  
والله لولا العيبة

وتعاطف الناس معايا  
كانوا سُمُونى المَجْذُوب! هى:  
إِخْلَص وهات م الآخر  
روحى خنقت مناخيرى  
إيدى بدأت تاكلنى  
رجلى بدأت تاكلنى  
هو: دا انا اللى قلبى واكلنى  
على روحى وبرستيچى  
يا ستى عيب يا ستى..  
دا انا جوزك زى اخوكى!  
دا إنتى ست تغيظى..  
هى: أنا ابتديت اتنرفز  
صور الشر قدامى  
عمّاله تكبر تتبروز  
وعموماً أنا مش فاضية  
ودة من حسن حظك  
من حسن حظك جداً  
إقلب بقى المحطة  
وبلاش الفيلم ده  
ما ترمى المدعوء ده  
ما تقرفنيش وتغلّس!  
بلا حب وقلة قيمة  
حوّل ع الناحية الثانية  
فيه ماتش مصارعة رهيب  
يا ابو قلب ضعيف ومسوس..

الواد الجتّه ده  
أبو نص لسان ومنخر  
هو وبس هو  
بطلّى ومثلّى الأعلى  
الهلف الشحط ده  
أبو شعر أكرت أصفر  
هو وبس هو  
ما ينغلبشى أبداً  
حركاته عمرها ما تفلس  
هو: دا إيه العنف دا؟؟!!  
إيه الرعب دا؟؟!!  
ونحولّ ليه من أصله؟؟؟؟?  
هو إنتى بدون مؤاخذه  
متأكدة إنك ست؟؟!!  
يعنى فى الأصل أنثى؟؟!!  
ما تخلّينا فى الفيلم  
دى قصة عاطفية  
رقيقة ورومانسية  
الواد بيحب البنت  
وفى الآخر هيعرف  
إنها أخته أو خالته  
ويكسر قلب البنت  
هى: دا إيه المسخرة دى؟؟!!!!  
إيه التفاهة دى؟؟!!  
أجيال زبالة دُلعة!!!

دى لا مؤاخذه يعنى  
أفلام قديمة بدعة  
رجالة ضعيفة خِرعة  
كتكو القرف فى ذوقكو  
والله لولا العشرة  
كنت بإيدى قصيتلك  
كل سلوك الفرامل  
ورميتك مع أفلامك  
فى أقرب أوسخ ترعة!  
هو: ترمى حبيك فى الترة؟؟!!  
هى: أنا قلت أوسخ ترعة!  
بلا فيلم وقلة قيمة  
دى ناس هبلة وعقيمة  
ماطلّعى زرايبنى  
هات المحطة الثانية  
الماتش خلاص هيبدأ  
دا الدور قبل النهائى  
وأنا متأكدة هنفوز  
والدنيا هتضحك لينا..  
إترمى ع الكنبه هناك  
ماسمعشى صوتك نهائى  
الواد ابو شعر أصفر  
الجربان المربرب  
حبيب قلبى الوحيد  
ماينغلبشى أبداً

ما يستسلمشى أبداً  
وكمان بطل فى السيماء..  
دا تخصص قتل الخصم  
ينزل على راس الواد  
اللى بيلعب قدامه  
يقبله كما كورة شراب  
يسويّه بالتراب  
ويفضل بقى يتسلّى  
يشل الكوع يمين  
يلوى الساقين شمال  
بعدين ينطّره على فوق  
يكومه زى القفّة  
ويلزقه ف مكانه  
يتصفّى كما الجوال  
يخر كما البهيمّة..  
وبطلّى بارك فوقيه  
قاعد يفرفر فيه  
لحد ما يبقى عجينة..  
بعدين ينتهز الفرصة  
يسحبه من شعره بعيد  
بعيد عن الحبال  
يجبد زمارة الواد  
واديها لمس كتاف  
يجيب داغه فى ثانية  
يمحى وجوده من الدنيا

يعطل كل مراوحه  
زى الساعة ام كاتينة!  
هو: يا نهار إسود ومنيل..  
إيه يا ستى العنف دا؟؟  
وليه بس الأذية؟؟  
يا حبيبتى ماله الفيلم!!  
طب بس اتفرجى حبة  
بصى شوفى الأنوثة  
يمكن تترقى حبة  
وتحسى باللى فيا!  
ولا ليكى حلفان يا شيخة  
ولا ليكى حلفان عليا..  
أنا شايف البيت زريبة  
وكرامتى فيها مدهوسة  
محطوطة فى سلطانية!  
وحاسس إنى قريب  
هيبجى الدور عليا  
أندبح كما الجاموسة  
وابقى فرجة ميت غمر  
والمرج والحلمية!!  
هى: لو اعرف كدة م الأول  
مش ممكن كنت اتجوز  
يا لطيف منك يا لطيف  
وحتى لو اتجوزت..  
ماخترش واحد زيك

نواعمى قلبه ضعيف  
أنا عايزة راجل وحش  
زى الواد اللى بيلعب  
شرس من جوة عنيف  
مارد جبار مخيف  
تخصص دبح وسلخ  
بعدين ييجى التنضيف  
هو: يا لطيف منك يا لطيف  
يا ستى احنا بنتخانق؟!  
دا فيلم وبروح لحاله  
دا ماتش وبروح لحاله  
خلينا أحسن حبايب  
كفاية العيشه مرة  
لعلمك بقى يا حبيبتى..  
الواد الجته دة  
حبيبك الوحيد  
قريت عنه فى النت  
ويعنى الشر برة  
إن مراته الآرشانة  
أضخم منه ميت مرة  
فى يوم لفندى نسيها  
ماجالهاش هامبورجر  
نزلت عليه الشبشب  
وكل يوم ليلاتى  
تكرشه مطرح ما كان



ترميّله هدومه برّه  
تقيد إيدّه ورجله  
بعيدان أشجار اللبلب  
هى: إدينى عنوانها قوام  
أدى الستات صحيح  
علشان لو كات فى السجن  
أزورها بالتصريح!  
هو: يا نهار إسود ومنيل!  
لأ أنا مش فاهمك أبداً  
بقى فجأه بعنى الواد  
الجّته الشحط المتعب  
خلاص مابقاش حبيبك  
كابتن الأسد المرعب!  
هى: يغور فى كيس زباله  
وانا إيه يهمنى من شكله  
إذا كان فيه أقوى منه؟؟  
هو: وبعنى الواد خلاص  
من أول حتّة علقه؟؟!  
وعلقه عائليه؟؟!!!  
مش مثلاً يعنى فى ماتش  
ولاً مسابقة دولية...؟؟؟؟!!!!  
هى: والنبي يا حبيبي ما بدقق  
هو: فين الوفا والإخلاص  
يا عالم مالهاش مبدأ..  
هى: مبدأ مين يا ابو مبدأ!!

أنا مايهمنيش الواد  
ولا اللي جابه الواد  
أنا بدور ع القوة  
أنا بحب الفتوة  
أعيش معاه طول عمرى  
ولو ع العيش الحاف  
ماينضربشى أبداً  
ماينغلبشى أبداً  
يمرمغ عيشة التانى  
بالقاضية ولمس كتاف  
هو: أعوذ بالله عليكى  
يا خسارة الحلوة عنيكى  
هى: عنيا دى يا بابا  
أرمى منها الضعيف  
اللى بيدخل مزاجى  
أشيله جواها سنين  
واسميه المخيف  
واللى بيقع فى السكة  
يبقى مقامه عندى  
كفتاية حمضانة قديمة  
مدفوسة فى نص رغيف!  
هو: مين اللى قاللك كدة؟؟!  
مين علّمك كل دة؟؟؟!!!  
هى: الدنيا دى يا حبيبي  
عايزة القوى الحرّيف

ماياكلش معاها الطيب  
والبايش والنحيف  
ماتعترفش بيهم  
ماتهوبشى نواحيهم  
اللى ماعندوش القوة  
هو صحيح الفقير  
والثانى دا الإقطاعى  
بيسموه من جواهرهم  
العفريت المخيف!  
هقوللك إيه يا جوزى؟؟!!  
ملك الغابة واحد  
قائد روما واحد  
الغايز دايماً واحد  
والمهزومين كتير  
فاهم يا ابو عقل نحيف  
هو: يا حبيبتى إنتى مراتى  
والمسألة مش مستاهلة  
هى: دا عندك إنت يا جوزى  
يا ابو نفس قنوعة وسهلة  
كلامك دة من الآخر  
خايب مايعجنيش  
نونو مايلزمنيش  
خرافات مثاليات  
غرقانة فى المتهات  
أعذار عالم فاضية

مالهاش مكان فى الغابة  
والدنيا أوحش الغابة  
الغالب فيها واحد  
يضرب بالضربة القاضية  
خليك مركون فى الفيلم!  
خليك ملخوم فى الواد  
مقرر كل فيلم!!  
إتلف أملك معاهم  
دا إنتو عالم واطية  
هو: طب بس سيبى رقبتي  
عضلاتك طبقة نفسي  
وجييتيني لمس كتاف..  
هموت بالضربة القاضية..  
هو انا شوفتيني قمت؟!  
ولّا اتحرّكت أصلاً؟؟!!  
ما انا حوّلت المحطة  
والماتش هيبدأ اهو  
الواد حبيبك اهو  
نازل يهد الأرض  
وبيشرب فنتاس شطة!!  
هى: إبعد عنى دلوقتي  
إيدى بدأت تاكلنى  
رجلى بدأت تاكلنى  
إترمى ع الكنبه هناك  
يا ملاك بنفس راضية

إنت يادوبك فى نظرى  
عسكور من الشطرنج  
مرزوع بتحرس طابية!  
هو: يا عالم حد يشهد..  
فيه حاجة يا ناس كدة؟؟!!  
فيه ست بالشكل دة؟؟!!  
أنا ماشى جوة دايرة  
م التليفزيون للكنبة  
عايش بينهم سواح!!!  
أنا اتجوزت مين؟؟!!  
بنت العوّ السفّاح؟؟  
خليفة ريما ومشكاح؟؟  
يا رب ادينى قوة  
أنفد من بين إيديها  
واضربها مرّة واحدة  
ضربة نهائية قاضية  
انشالاً بحلّة فاضية  
أرفع راسى ولو مرّة  
واموت بعدها مرتاح!!!

## جوازۃ نص عمر

هى: أما دى كانت ليلة  
هو: ليلة من ألف ليلة  
هى: يا سلام على القمر  
هو: يا سلام على السهر  
هى: إحكى يا شهریار  
هو: إحكى يا شهرزاد  
هى: والعمر بدا م الليلة  
هو: والحزن انتهى م الليلة  
إلا صحيح قوليلی..  
يا مرأتى يا كل حیاتى  
يا سكاتى.. يا كلماتى  
بما إننا عرسان  
هى: ولسة فى أول ليلة  
هو: ولسة فى أول ليلة  
بوعدك من كل قلبى  
يا كل أوضة فى قلبى  
مش هنبطل سعادة  
ولا نشبع م الحلاوة  
هخلّى حیاتنا جميلة  
الدنيا فى عینى ليلة  
جديدة لنج نوڤى  
هى: زى الملبن والطوفى  
هو: يا صاحبة السعادة

إلا بصحيح قوليلي..  
وسط الفرح والزينة  
والرقص والزمبليطة  
أنا ماسمعتش بالظبط  
من كتر الغنا والخبط  
صحابتك كانوا بينادوكي  
باسم بعيد مش سامعه  
باسم غريب مش فاهمه  
كلمة جديدة عليّا  
يا روح قلبي وعنيّا  
وصف يخوّف مش فاكره  
هى: بدأنا أول ليلة..  
والليلة بينّها ليلة..  
أنا عارفه نفسي كويس  
مش هنعديّها الليلة!!  
هو: أسمع صوتك يا حبيبتى  
هى: قصدك أصحابى مين؟  
اللى كانوا ع اليمين  
شلة لربّ بنات  
الصايعين الضايعين  
أم باروكات كاروهات  
وعليها كيلو فزلين؟  
أو يمكن قصدك مثلاً  
أصحابى على الشمال  
دول كانوا أسوأ جيرة

وبعيد عن السامعين  
رموشهم فرط عيرة  
ضاربين ضواحي وشوشهم  
فى جردل أوكسچين؟؟  
يمكن لا دول ولا دول  
تقصد كومة البنات  
اللى اتلمت فى النص  
وادوها على واحدة ونص؟؟  
كلوا منى الجو كله  
إلهى يقطع دابرهم  
قولوا معايا آمين!!  
هو: أنا حاسس حد غريب  
دخل الأوضة معايا!!!!!!  
مش انتى خطيبتى حبيبتى  
اللى اتحايلت عليها  
تنطق لو كلمتين  
أو تتبحج ويايا!  
جرى إيه يا حبيبتى مالك؟؟  
إنتى بتتكلمى كدة ليه؟؟  
وبتكلمى عن إيه!!  
دا كلام عيب ينقال؟؟؟؟  
أنا مالى ومال ضايعين؟  
ومال كيلو الفزلين؟  
وجردل أكسوچين؟؟  
هى: ما هم فعلاً واقعين!!



هو: أنا عايز اسأل سؤال..  
هى: أنا اللي عايزه اقوللك  
إياك تتأثر بيهم  
ولا تنخدعشى فيهم  
دا كله بويا منظر  
حليب جواه متعكّر  
لكن الصراحة صراحة  
يعنى فى أصل الأصل  
دى عيال شبيحة عِرة  
وكلاهم مليون فِرة  
قُرْع وحالتهم هَمْ  
والعيشة معاهم غَمْ  
زباين القايمة السوداء  
ليهم ماضى متشحور  
بلاوى ريحتهم وحشة  
جايين طازه من المنور!  
صدق المثل اللي قال  
فتش ع الأصل دور!  
هو: أنا حاسس إن حد  
غريب دخل الأوضة!!!!  
أو عندى نزلة برد  
وودانى بقت مسدودة!!!!!!!  
أنا مش مصدق نفسى  
زوجتى الحلوة الرقيقة  
الورداية البريئة

يطلع منها دا كله  
وكمان فى أول ليله؟!  
أنا عمرى ما شوفت حد  
بيقول على الرموش  
عيرة بتتعد قَرط!!  
دا مصطلح عجيب  
تشبيه بلاغى مريب  
دا انا طول فترة خطوبتنا  
حفيت على ميت دكتور  
يسلّكولى ودانى  
مش سامع أبداً صوتك  
لدرجة أنا فكرت  
أستغنى عن ودانى  
واعمل خرم بشنيور!  
ياما اتحايلت عليكى  
قولى كلمتين على بعض  
إحكى فى أى حاجة  
خَلينا نعرف بعض!  
دا أنا فرحان بجد  
إن انا فعلاً حبيت  
إوعى أكون اتوحت..  
إوعى أكون اتنشلت..  
وضعت واندبّيت؟؟!!  
لأ لأ مش معقول؟!  
دا شىء ولا فى الخيال

مايدخلشى العقول!!!!!!  
آه يا مراتى يا شقية..  
أنا فهمتك دلوقتى..  
كل دا كله هزار!  
لا هو أكيد هزار..  
لا والله ده هزار  
أول مرة يا حبيبتى  
أخذ بالى من دمك  
دا خفيف أكثر م اللازم  
لدرجة الانهيار!  
هى: مين قال كلامى هزار؟!  
دى يا دوب وش الحقيقة  
يا دوب ربع الحقيقة  
أنا عارفة اصحابى كويس  
حافظاهم أحسن منك  
وكل واحدة فيهم  
فى نظرى ماتساو يش  
إلا صباعين ممبار!  
هو: يعنى انتى بتتكلمى جد؟!  
هى: دا جد الجد  
هو: مش عاجبك أى حد؟  
هى: فى داهية كل حد!!  
هو: يا حبيبتى دول أصحابك  
هى: فى داهية كل اصحابى!  
هو: وكثير منهم جيرانك

هى: فى داهية كل جيرانى!!  
هو: مافيهمش حاجة عدلة؟!  
أى حاجه عدلة؟؟!  
هى: دا انا مكارماهم جداً  
الدون سوس القِدْرة!  
هو: لا إله إلا الله  
طيب نحفظ غيبتهم  
طب ماتجيبش سيرتهم  
هى: أكذب واجاملهم يعنى؟؟!!  
أنا كل ضميرى مَرْضَى  
العِرَّة ولاد الرفضى!  
هو: الله يقطع شيطانك  
دا تقريباً هزار  
لأ باين إنه هزار  
أوع الأرجح هزار  
أتمنى يكون هزار  
يانا م الستات دول يانا  
دا انتى طلعتى كوميدىانة!  
ودى علامة صحيحة  
على عيشتنا المريحة  
إن شاء الله مريحة..  
ولو انتى شهرزاد  
أنا برضه شهریار  
هى: إنت سميتَه هزار؟؟؟!  
مين قال كلامى هزار؟؟!!

دى يا دُوب تُمن الحقيقة  
يادوب سُدس الحقيقة  
صحابتى وانا عارفاهم  
وكل واحدة فيهم  
فى نظرى ماتساوِيش  
رنة جرس إنذار!!  
هو: يعنى انتى بتتكلمى جد؟!  
هى: دا جد الجد الجد  
هو: مش طايقة أى حد؟!  
هى: يغور أى حد  
هو: يا ستى دول أصحابك  
هى: يتحرقوا كل اصحابى  
هو: مافيهمش صفات نبيلة؟  
أى صفات نبيلة؟؟  
هى: ياخى كَتَّهُم ستين نيله!  
دا انا مكارماهم جداً  
الدون سوس البليلة!  
هو: لا إله إلا الله  
طيب حرام سُمعتهم!  
طب بس نصون سيرتهم!!  
هى: أكذب وانا فقه يعنى؟؟  
أنا كل ضميرى مَرَضِى  
البيئة ولاد الرفضى!  
هو: يا حبيبتى الليلة ليلتنا  
لسه هنبدأ دُخلتنا

خلاص كفاية هزار!  
هى: لسة مسميه هزار؟!  
خليك سارح فى خيالك  
أنا بتكلم بطبيعتى  
وانت غيبوبة فى البنج  
فاكر ده كله هزار؟!  
هو: الله يقطع شيطانك  
والله أعلم ده هزار  
أو فى الأغلب هزار  
يا رب يكون هزار..  
ودى إشارة صريحة  
على العيشة المريحة  
ولو انتى شهرزاد  
أنا إسمى شهریار  
هى: أنا بقى عدم المؤاخذه  
شايفاك بجد حمار!!  
بقالى ساعة بقوللك  
دا زفت مش هزار!!!  
هو: مش عارف ليه أنا حاسس  
إنى بدأت اتألم!  
مش عارف ليه مش فاهم  
وعاوز ميت مترجم!  
هى: نرجع تانى لمرجعنا..  
هو: آيوه نرجع مرجوعنا..  
ونجيب الموجه تانى

يا ربى كانت ليلة..  
هى: ليلة مش راضية تفوت  
وبايّنها سودة موت  
هو: مش هو دا مرجوعنا؟؟  
إحنا بدأنا الكلام  
عن ليلة من ألف ليلة  
هى: لأ كدا م الأول خالص  
دا إنت بطيء بجد  
وممل لأبعد حد  
يا خويا اعتقنى ف سنتك  
كنت هتسأل سؤال  
إسأل بقى وخلصنى  
عايزة اقلع الفستان!  
كنت بتسأل سؤال..  
هو: أيوه بسأل سؤال..  
إنتى بتعملى كدة ليه؟  
وبتتكلمى كدة ليه؟؟  
فين أيام الخطوبة  
والرقة والعذوبة  
هى: همّا يادوبك يومين  
مسكت لسانى فيهم  
واتحملتك للآخر  
وانت قاعد بتشعر  
فى أيام السعادة  
وانا من جوايا بغلى

ألعن م القهوة السادة  
مش عارفة اعيب فى حد  
ولا عارفة أبهدل حد  
أمى قالتلى أكتم  
على بال ما تعدى الليلة  
وتشيل كل الشيلة  
هو: وتعيى فى حد ليه؟!  
وتبهدلى حد ليه؟؟!!  
ماتخلى العيشة نضيفة  
ناعمة هادية وخفيفة  
هو: يا ابو مخ تخين كاوتش  
دا طبع ماليش فيه يد  
مش ممكن اقعد هادية  
ماعرفش أعيش مبسوفة  
لازم اخترع مصيبة  
واقطع فروة حد  
ودى بطاقتى الشخصية  
أنا مش بلاقى نفسى  
ومابحسش بقيمتى  
غير لما أجرس غيرى  
وأفضح كل اصحابى  
وانكد ع الجيران  
وابيت كل البيت  
همدان فطسان عدمان  
ماعرفش امسك لسانى



ماقدرش أسد ودانى  
الغدر بيجرى فى دمي  
وارثه الطبع ده عن أمى  
بيئتى جر الشكل  
غاوية العيشة النكد  
أجيب فى سيرة الناس  
واشلفط أوى سمعتهم  
ألزق فيهم صفات  
وأفعال مش بتاعتهم  
عشان الحياة تشعشع  
والبنزين يولّع  
واحقق أمجاد أمى!!  
هو: مش عارف ليه أنا حاسس  
إنى بدأت أتألم!  
مش فاهم ليه أنا شايف  
إنى عاوز مترجم؟!  
نرجع مرجوعنا تانى..  
كان عندى سؤال عن إسمك  
قصدي إسم الدلع  
اللى اصحابك قالوه  
ف ودنى وراحوا قُريرة  
وانا يا خسارة ماسمعتش  
م الفرقة والهليلية  
هى: إسم الدلع يا حبيبي  
المشهور جدا فى العيلة

والكل خبّاه عنك  
هو: الإسم الأصلي شييرين..  
هى: واسم الدلع شعليلة!!!  
هو: نص الحوار دا هو  
معشش جوة ودانى  
من يوم ما هد كيانى  
بقاله عشر سنين  
بالأرقام والتاريخ  
بالأيام والليالى..  
قديم وابن قديم  
لكنه على حساباتى  
نوڤى ولنح جديد  
شريط داير فى عقلى  
كأنه حصل الليلة  
عقاب طول عمرى أبدى  
من أول ليلة وليلة..  
يا حظى المؤسف يانى  
يا جوازه نص عمر  
لدرجة إن امبارح  
بقى طبق الأصل الليلة  
لدرجة إن بكرة  
كربونة نضيفة م الليلة  
ماحدش صمد معنا  
لا جيران ولا أى اصحاب  
صوت التليفون انكتم

جرس الباب اتقتل  
صدّوا من كتر الركنة  
وأيام الضباب  
وهو العمر إيه؟؟؟  
غير ليلة من ألف ليلة  
وهو العمر إيه؟؟  
غير ليلة مالهاش آخر  
مع زوجة ديناميت شيطاني  
إسم دلعها شعيلة!!؟

# قولوا معا يا آمين!

هى: واللّٰهُ اشهد بالحق  
ولا اقولشئى غير الحق  
هو: آيوة أنا عايز الحق  
وحاجه تانية لأ  
هى: يا جوزى إنت طيب  
جواك قلبك طيب  
مابتعرفشئى تكره  
مابتعرفشئى تجرح  
عمرك ما قلت حاجة  
إلا واقوللك طيب  
هو: لو كنت عايش روميو  
يبقى الفضل لچولييت  
من يوم جوازنا يا روحى  
والحب مالى البيت  
هى: أنا حالفه اشهد بالحق  
هو: وحاجة تانية لأ  
هى: من أول مرّة شوفتك  
وانا قلبى نازل دَقْ  
كان قبلك عطلان فاضى  
وعايش كدة بالزَقْ  
هو: طب ما انتى كمان جميلة  
متربّية أصيلة  
عمرى ما شوفت منك

حاجة وحشة أو فظيعة  
المركب ماشية وانتى  
دائماً بتقولى طيب  
على قد قلبى الطيب  
هى: يا رب يا حاكم عادل  
يا هنايا بقلبه الطيب  
طيب وانا هكذب ليه؟!  
وافترى فى كلامى ليه؟؟!  
هو: نحمد ربنا على نعمه  
ما احنا عايشين بخير  
هى: طول ما انت يا روحى بخير  
هو: بكرة العيد يا حبيبتى  
يا رب يعيده علينا  
بالهنا وبألف خير  
هى: طول ما انت يا روحى بخير  
والله اشهد بالحق  
هو: ولا حاجة غير الحق  
هى: بقالى سنين معاك  
وكل يوم استكشف  
جواك مليون ميزة  
هو: نحمد ربنا على كرمه  
ويا ترى إيه أجمل ميزة؟  
هى: نَفْسَك حقيقى عزيزة  
تعرف ربنا على حق  
ولا تقبل قرش حرام

ولا تغدر باللى يحبك  
 رى التعبان فى الشَّقْ  
 هو: وإيه كمان وحياتك؟  
 هى: كريم كرم الدنيا  
 دايمًا تجيلى كولونيا  
 ريحتها مانجة لذيدة  
 ما حدش يطلب حاجة  
 وتقولله أبدًا لأ  
 كل ما بنتك تعدى  
 تشيلها وتغنيها  
 تديها كام بريزة  
 هو: دا كان زمان يا عزيزة  
 دلوقتى البنت كبرت  
 إمبارح اديتها بريزة  
 رميتها فى وشى تانى  
 قالت ماتجيبش حاجة  
 بتحتقر البريزة!  
 وإيه كمان وحياتك؟  
 إيه تانى أجمل ميزة؟؟  
 هى: ما كفاية كدا النهاردة  
 بكرة العيد يا حبيبى  
 وانا حالفة اشهد بالحق  
 هو: وحاجة تانية لأ  
 هى: يا رب تعودها بخير  
 كفاية كدة النهاردة

خَلَّى الطابِقِ مُسْتَوْر  
سَيِّبِ الْجَرْحِ مَكْتَوْمِ  
وَالْقَعْدَةَ تَفَوْتَ عَلَى خَيْرِ..  
هُوَ: وَهَخَافُ مِنْ إِيهِ وَلِيهِ؟!  
أَنَا رَاجِلُ مَلْؤِ هُدُومِي  
عَاقِلُ وَمَشِ مَطْيُورِ  
كَرِيمُ بِحَبُوحِ عِ الْآخِرِ  
وَبِفَضْلِ اللَّهِ مُسْتَوْرِ  
إِدِينِي دَفْعَةَ قَوِيَّةِ  
قَوْلِيلِي وَرِيحِينِي..  
وَإِيهِ كِمَانُ وَحَيَاتِكْ؟  
إِيهِ تَانِي عَاجِبِكْ فَيَّا؟؟  
هُى: يَادِي الْوَرُطَةِ الْمُؤْذِيَّةِ!  
أَنَا خَلَّصْتُ اللَّيِّ عِنْدِي  
هُوَ: وَحَلْفَانَاتِ الْحَقِّ؟!  
وَشَهَادَةِ أَقْوَالِ الْحَقِّ؟!!  
هُى: فَكَّرْنِي إِنْتِ يَا رُوحِي..  
هُوَ: نَسِيتِي أَهْمُ حَاجَةٍ!  
نَسِيتِي إِنْنِي مُنْظَمِ  
هُى: أَوْى جَدًّا بِالزِّيَادَةِ  
دِي حَاجَةٍ بِتَجْرِي فِي دَمِي  
يَا رَبِّ مَا تَقْطَعُ عَادَةً  
بُصِّي حَوَالِيكِ يَا رُوحِي  
كُلُّ شَيْءٍ فِي مَكَانِهِ  
مَرْصُوصُ صَحِّ مَوْتِ

كل شىء فى ميعاده  
مضطوب صح موت  
هى: وأبص حواليا ليه؟!  
يعنى هلاقى إيه؟!  
ما انا حافظة البيت بالشبر  
من أول كرسى المطبخ  
لحد دواية الحبر  
هو: بالفرخة والكتكوت  
هى: صحيح وانا أبص ليه?!  
ما هو كل شىء فى مكانه  
وكل شىء فى ميعاده  
مضطوب صح موت  
هو: ونسيتى إنى عاقل  
هى: لأ قصدك عاقل جداً  
هو: وكمان سيد العاقلين  
مرتب هادى جداً  
هى: أكثر م اللازم جداً  
هو: يا رب ابعدنا عنها  
عن دوشة المجانين  
لكل شىء حساب  
هى: ولكل ظرف جواب  
هو: الأطباق فوق بعضها  
هى: الملايات فوق بعضها  
هو: الأوراق فوق بعضها  
هى: دوسيهاك فوق المكتب



محبوسة فى حِزْمَة واحدة  
مش لاقية اللى يواسيها  
هحكى عن إيه وإيه؟؟!  
هو: قولى اللى نفسك فيه  
هى: البرقوق فى التلاجة..  
هو: موزون بالوحداية  
هى: وبلوقراتك السادة..  
هو: معدودة بالفتلاية  
هى: دا غير مواعيد الأكل  
ووقت الجد إمتى  
ووقت اللعب إمتى  
هو: كله مكتوب فى الجدول  
وساعة الصفر معايا  
العيشه بكل نظام  
هى قمة الاحترام  
كله محسوب بالورقة  
بمللى المسطرة  
هى: دى عيشة مملة جداً  
ونظام يجيب ورا!  
هو: مابحبش اللخبطة  
مابحبش كلمة لأ  
ولا باللفظ المسموع  
ولا حتى بالطقطقة  
مابطيقشى أى دوشة  
ولا حاجة مبعتره

هى: مين عايز لخبطة؟!  
مين غاوى شعبطة?!  
مين نفسه يرسم لوحة  
وشوشها مشخبطة?!  
هو: يبقى احنا متفقين..  
هى: لأ لأ مش متفقين!  
أنا عايزة اقوللك كلمة  
بسيطة صغنططة  
الدنيا حلوة جميلة  
ورداية مقطقة  
بنوتة خجولة أصيلة  
بتوكة مخططة  
حلاوتها فى مفاجأتها  
وشوية لخبطة  
علشان ييقالها معنى  
تسمع منا ونسمعها  
حلو النظام جميل  
لكن برضه الحياة  
لازمها ملح وفلفل  
وشوية عفرتة!  
هو: ودى تبقى عيشة دى?!  
نقلب بيتنا حلزونة  
ونخليه هرجلة?!  
نطير زى البالونة  
مالناش أى اتجاه

سارحين كدة فى الخلا؟؟!!  
وفين بقى النظام؟؟!  
دا حتى يبقى حرام  
نسيب الحاجة على كيفها  
مالهاش ظابط ولا رابط؟؟؟؟  
بايدنا ننتف ريشها  
نلاقى الحلة شاطت؟؟!!  
نعيش الدنيا فوضى  
من غير هندسة ونظام؟  
دى تبقى قلة قيمة  
وحياة مجنونة دميمة  
وانا أصلى يا روحى بحبك  
وعايز أسعدك  
وابنيلك أجمل بيت  
لو كنت عايش روميو  
يبقى الفضل لچولييت..  
هى: يا حبيبى إحنا بخير  
طول ما انت يا روحى بخير  
بس انت مش فاهمنى..  
بس انت مش سامعنى..  
أنا مش ضد النظام  
والجدول والاحترام  
مش غاوية هرجلة  
وعيشة السبهلة  
أنا عايزة شوية فوضى

إنشالاً يوم فى الشهر  
نكسر حالة الملل  
نفسى أدور على حاجة  
ميت مرة مالقاهاش  
نفسى اتكلم عن حاجة  
إنت مرتيتهاش  
ولو مرة فى الشهر  
نهرب من الروتين  
والخط المستقيم  
عيشة الحرية حلوة  
وأنا احب المفاجآت  
أستنى ضيف جديد  
أستنى حدث جديد  
دى حاجات تحبى القلب  
وتقرب المسافات  
هو: بس أنا كداهو يا حياتى  
مش ممكن اعيش سعيد  
بمعنى هقولك إيه..  
أنا بعرف انظم يومى  
لإنى حافظ يومى  
ماحدث عارف بكرة  
مخبى لينا إيه؟!  
هى: خلىنا فى النهاردة..  
فى الدنيا بنت الإيه..  
چوليت يا روميو زهقت

م العيشة الباردة طهقت  
ليه غاوى تقيس وتحط  
طرف الورقة ع الورقة  
بالسنّتى والتنتوفة؟!  
ماتسيبهم منعكشين  
شوية صغيرين..  
ليه غاوى الفرش مجوز  
وتقيس نقشة على نقشة  
بالخيّط والسحتوفة؟؟؟  
ماتسيبهم مبعكشين  
حبة صغيرين..  
هو: مش ممكن أبداً يحصل  
أسيب ملاية السرير  
تنزل تشم الأرض!  
هى: ما اهو إحنا هننام عليها  
وهتتفرکش من تانى!!  
ماتسيبها بقى على كيفها  
إنشالاً خطوط الطول  
تدخل فى خطوط العرض  
خلّى الملاية تتدلّ دل  
تجرب ريحة الأرض  
يعنى هيحصل إيه؟؟  
هتزعل منّا مثلاً  
هتلم هدومها وتمشى  
وتهرب ولاّ إيه؟!!

يا حبيبي يا عشرة عمري  
إرحمنا من الروتين  
خانق نفسك وخانقنا  
ربنا يهديك يا روميو  
قولوا معا يا آمين!  
هو: ودى تبقى عيشة دى؟!  
نقلب بيتنا حلزونة  
ونخلّيه هرجلة؟!  
يضيع كما البالونة  
ونسويه مزيلة?!  
نفتحها بقى ع البحرى  
وتروح منا السعادة  
فى دنيا بدون نظام  
وعيشة مُهَلَّهَة?!  
دى تبقى قلة قيمة  
وحياه بدائية لثيمة  
وانا نفسى أسعدك  
وابنيلك أقوى بيت  
البيت من غير نظام  
مايقاش اسمه بيت  
ما هو انا لو عايش روميو  
دا عشان إنتى چولييت..  
هى: يا حبيبي إحنا بخير  
طول ما انت يا روحى بخير  
هو: العيد بكرة يا حبيبتى

يعودها علينا بخير  
هى: بس انت مش سامعنى..  
ومش قادر تفهمنى..  
چولييت زهقت يا حبيبي  
عايزة تعيش حررتها  
بتتك طهقت يا سيدى  
ما تسيبها تعيش طفولتها  
واقترح شوية الباب  
البيت مرتب جداً!  
الدنيا نضيقة جداً!!  
دى حياة مملة جداً!!!  
وعيشة عذاب فى عذاب  
هو: أنا رايع اساوى المكتب  
لحسن طرف الدوسيه  
ملووح مش تحت اخواته  
لازم أروحله هناك  
وافض الاشتباك  
واحاول انقذ حياته  
أظبط حرقه بالطبط  
واصالحه واطيب خاطره  
وارجعه بين زملائه..  
هى: إسمعها منى يا رب  
يا رب بوز اللحاف  
ينزل على صف سنانه  
ويوطى ييوس الأرض

يا رب صف الورق  
يتزحزح من مكانه  
يتدحرج أو يدلدل  
من غير لا قيد ولا شرط  
أنا بَكَرَه الروتين  
واللى بَدَعَ الروتين  
حَبَّة حرية يا رب  
تسعد قلبى الحزين  
شوية فوضى يا رب  
قولوا معايا آمين!



# الله يرحم أبو أديسون

هو: المدام بتاعتي  
السنيرة مراتي  
يا خسارة مش فاهماني  
حَبْطاني مكلبشاني  
مش بتقدر مواهبي  
والإسم بس مراتي  
طول النهار هَرياني  
بسلامتها بتتمهزأ  
بسلامتها بتتريق  
على قيمة اختراعاتي!  
هي: جوزي حبيبي بتاعتي..  
يُحزني جداً اقول  
واعلنها لكل الدنيا  
بكلام دوغري على طول  
إن دماغه يا حلاوة  
فاضية كما الهوا  
زى البلحاية الواقعة  
من غير قشر ونوا..  
قال انا حَبْطاه بسلامته؟!  
حَبْطاه هَدَّة كيانه!!  
ماهو طبعاً لازم اتريق  
على قد مقاس جنانه  
وسماجته ومرستانه!

يا جرح قلبى سنَّكر  
بابك واقفل عليك  
لحسن مالك دوا..  
هو: والإسم بس مراتى  
بسلامتها بتتريق  
على آخر اختراعاتى  
هى: هىء.. هيهيىء.. هيهيىء  
يا راجل دا انت كبيرك  
لو فكرت هتتنطق  
فى شغلانة إضافية  
تقدم كشف هيئة  
لعل وعسى يتعمشوا  
وبرضوا يستوظفوك  
أفندى صبى صراماتى!  
هو: أذى المدام بتاعتى..  
أذى السنيورة مراتى..  
دمى محروق بالجامد  
منها ومن عمايلها  
حرّان مولّع نار  
من جهلها وشخاليلها!  
ماشية طول النهار  
عاملالى دوشة رهيبة  
لابسة حاجات فى إيديها  
وف رقيتها ورجليها  
بتشخلل جامد جداً

مِسْبَةِ زِيْطَةِ مَرِيْبَةٍ  
بِتَمَخْطُرٍ وَتُلْقُ  
زَى الْفُولِ فِى الزَكِيْبَةِ!  
هَى: وَاَنْتِ بَتَتَضَايِقِ لِيْهِ؟  
وَمَحْرُوقِ مَنْ لِيْهِ؟؟!!  
هُوَ: مَشْ عَارِفْ خَالِصْ افْكِرْ  
أَنَا كُلِّ مَا اجِىْ أَرْكُزْ  
وَاقْفَشْ فِى طَرْفِ الْفِكْرَةِ  
وَأَدُقْ بِالمَسْمَارِ  
يَصْدَمْنِى صَوْتُ شَخَالِيْهَا  
بِيَشْوِشِرْ عَلَى إِلْهَامِى  
يَمْسِكْنِى صَدَاعُ جَبَارِ  
أَرْمِى الْقَلَمَ وَالْوَرَقَةَ  
وَاحْرَنْ زَى الْحِمَارِ  
مَشْ عَارِفْ خَالِصْ افْكِرْ..  
طَبْ افْكِرْ إِمْتِى وَفِينِ  
وَأَنَا قَاعِدْ وَحْدِى بِفَقْرٍ!!  
مَنَاخِيْرِى كَبِرَتْ مَرِ الْكُتْمَةِ  
بَقَتْ شَكْلُ الْمَنْقَارِ  
هَى: وَاَنْتِ جَنَابُكَ لَا مَوْأَخِذَةَ  
شَاغَلْ نَفْسُكَ بِأَيِّهِ؟!  
بَتَفَكِّرْ أَصْلًا لِيْهِ؟!!  
هُوَ: مَا هِىَ السَّنِيُورَةُ مَرَاتِى  
يَا خَسَارَةَ مَشْ فَاهْمَانِى..  
مَشْ بَتَقْدَّرْ مَوَاهِبِى

والإسم بس مراتى  
وبسلامتها بتتريق  
على آخر اختراعاتى!  
هى: إسم الله على اختراعاتك..  
تعالالى واقف قدامى  
ما تورينى كراماتك؟؟!  
هو: آه يا شعب مش صبور  
إشهد عليا يا رب  
وغير كدة مش مسئول!  
المخترع يا جماعة..  
المخترع يا ناس..  
بياخله سنين وايام  
ومين يستجرى يقولله  
بتيجى الساعة كام؟!  
وبتمشى الساعة كام؟!!  
هتخترع السنة دى  
ولّا هنستنى كثير؟!!  
إخلص بقى وخلصنا  
العمر بيجرى قوام!!  
أديسون قضى حياته  
فى ميت ألف اختراع  
لا عمره اشتكى ولا نوح  
من السنيورة مراته  
ولا من كالألّو الصداع!  
هى: ويطلع مين سى أديسون

علشان يبقالك قدوة؟!  
عمل ايه المحروس جنبه؟؟  
إيه يعنى لزوم حياته؟؟!  
نقل مصر الجديدة  
رماها فى شارع شبرا!!  
لفق فستان مقطّع  
قلّبه جلابية بكُشّة؟؟!!  
هو: يا هادى يا رب القدرة  
آهى دى المدام بتاعتى!  
آهى دى السنيورة مراتى!!  
يا هانم أديسون ده  
حبيبى ومثلّى الأعلى  
كان مخترع كريم  
مخلوق للعلم عظيم  
مفيش ولا حاجة سابها  
مفيش ولا فكرة عتقها  
وهخبّى عليكى ليه؟!  
ما انتى حبيبتى ومراتى  
أنا ماشى على مصباحه  
فى حياتى واختراعاتى..  
هى: الله يرحم أبو أديسون  
وكل عيلة أديسون  
طيب حاضر يا حبيبى  
هسايرك حتى الآخر  
يا جوزى يا كل نصيبى

من النهاردة ورايح  
مفيش مانع اسميك  
أديسون ابن ام أديسون!  
هو: متشكرين لأدبك  
بجد أخرجتيني  
آهو انا دلوقتي فعلاً  
واقف مبلول محروج  
مش عارف أعمل إيه!  
لازم اجييلك هدية  
واجب والله مفروض..  
هى: من غير هدايا ولا نيلة  
العيشة معاك يا أديسون  
والنعمة مستحيلة!  
قوللى يا أديسون افندى..  
يا ابو وش سيمح وجميل  
عايز سكون وهدوء  
ومتزربن مفلوق  
من دوشة الشخايل؟!  
إنت اخترعت إيه؟  
بتفكر أصلاً ليه؟  
تعرف يا ابن ام أديسون..  
إنت يادوبك بكثيره  
تنشر مذكراتك  
على حبال الغسيل  
توصف فيها اختراعاتك

الوهمانة الهلامية  
وترش عليها ثقلية  
وتبقلل البقاليل  
وماتنساش آخر صفحة  
تجيب سيرة مراتك  
اللى شالت كثير  
ولمّا تموت بسلامتك  
وصّى باقى الرعية  
بينوا فوقك حنفية  
ويعملوك سبيل!  
هو: أدى السنيورة مراتى  
يا خسارة مش فاهمانى  
يا خسارة مش عايزانى  
أنفسلها عن ذاتى..  
واحكى قصة حياتى..  
الاختراعات فى الأصل  
مجموعة من الأحلام  
ساعات بتبقى حقيقة  
وساعات بتكون أوهام  
هى: طيب يا ابو الأحلام  
قوللى يا ابن ام أديسون..  
نفسك رايحة على إيه؟  
شاغل مخك بإيه؟!  
إرغى شويه وصدعنى  
بس انجز يالّا قوام

عشان اخش اتخمد  
وانت كمان تتخمد  
والجيران تنام!  
هو: طالما إنتى سألتينى  
أنا بقى هفتحك قلبى  
مادام هتسمعينى  
هعبرك عن ذاتى  
وباريت تشجعينى  
نفسى فى حاجات كتير..  
حاجات كتير أوى.....  
نفسى يشيلوا السراير  
بتاعة إوض النوم  
واقلبها لهم مرجيحة  
لابسة فستان بالتل  
قماشها ورق الفل  
تاخذنا من إيدينا  
لأ وتطبطب علينا  
وتحكيلنا ليلاى  
حواديت قبل النوم  
تدلعنا يمين  
تهدهدنا شمال  
وننام نومة مريحة  
يمكن نصحى تانى يوم  
نلاقى العيشة حلوة  
زى الصابون ابو ريحة..



هى: دى اختراعات قبيحة!  
يختى على جوزى يختى..  
تعالوا يا ناس شو فوا بختى..  
جوزى حيبى بتاعى  
يُحزنى جداً اقوللك  
أصرخ فى وش الدنيا  
بكلام دوغرى بريحة  
إن دماغه يا حلاوة  
كورة منفوخة ع الجنط  
شبه قشر السبيط  
واحدة مليون طريحة!  
إيه دا اللى سرير مرجيحة  
عايزنا ماتقلّ بشى؟!  
ننام متمسمرين!!  
زنهار يا بطة سطيحة  
ولّا يعلقوا رجلينا  
بالطول متدلّدين  
زى عجول الديحة؟!  
طب إيه رأيك بالمرّة  
ماتلغيلنا الحمام  
ونقضّيه بالجرذل  
وجنبه كام صفيحة؟!!  
هيهىء.. هيهيهىء.. هيهيهىء  
إسم الله على اختراعاتك  
فعلاً جوازة فضيحة!

هو: آدى المدام بتاعتى..  
آدى السنيورة مراتى..  
بسلامتها بتتريق  
على أفكار اختراعاتى!  
هى: دا إنت جوز أنانى!  
وعقلك دا تايوانى!!  
هات الاختراع التانى  
يا رخم يا ابو دم ثقيل!!  
هو: طيب بلاش الأول  
بلاهة الأولانى  
يمكن يعجبك التانى  
واهو لسة الليل طويل  
هى: أنا اللي جيبته لنفسى..  
خد راحتك أوى ع الآخر  
إحكيلى حكاية التانى  
يا ابو وش سيمح وجميل!  
هو: بس يا روحى وحياتك  
خصيمك النبى وأمانة  
كفاية خبط ودوشة  
ولعب بالشخايل!  
هى: بلاهة كل الشخايل..  
سامعاك يا كابتن أديسون  
ورميتلك الشخايل  
بس انجز يالاً قوام  
لحسن أنا خلقي ضاق

وطلعتلى زغاليل!!  
هو: بحلم يا مراتى بايه..  
تفتكرى حطة يا بطة؟  
أغنية حطة يا بطة..  
تفتكرى أولها إيه؟؟  
نقولها سوا مع بعض..  
تعاليلى يا بطة  
هى: وانا مالى هه  
هو: وشيليلى الشنطة..  
هى: وانا مالى هه  
هو: نقف لحد الشنطة  
هى: لسه هنروح على طنطا  
هو: خلىنا لحد الشنطة  
هى: مالك ومال الشنطة؟؟!!  
هو: صعبان عليا العيال  
تلاميذ كل المدارس  
شايلىن شنط دواهى  
بُمبة محشية كوارث  
الواد يطلع مَاتَّب  
والبنت تكره روحها  
دى حاجة تربى العلة  
وتجبلهم هلاوس  
بيشيلوا فيها إيه؟؟!!  
ماليينها أوى كدة ليه!!!!!!  
يا ستى بلاهة تعليم

وتنحرق المدارس..  
هى: وانت محموء عشان ايه؟؟؟؟  
هو البيت فيه عيال؟!  
ولّا ريحة العيال؟؟!!  
ولّا انت فاكر أصلاً  
إنى بسلامتها مراتك  
زعلانة ع العيال؟؟!!  
همّا فين العيال؟؟!!!!!!  
هو: بكره هنجيب عيال  
يملوا علينا البيت  
ويهرونا طلبات..  
هى: هيجوا ازاي وإمتى  
وانت دماغك يا حلاوة  
مشغولة بالاختراعات!!!!  
هو: ماتخّلينا فى الشنطة..  
هى: آه والله على رأيك  
خلينا فى أم الشنطة  
بشرنى يا ابن ام أديسون..  
ناوى تخلى العيال  
يشيلوا بدالها قفة؟!  
ولّا هتسخطها فتلة  
وتبقى ريشة هُفّة؟؟!  
هو: نفسى أخليها تغنى..  
هى: مين دى اللى عايزها تغنى!!  
هو: الشنطة عايزها تغنى

أرْكَبُهَا اسْطَوَانَةً  
عَلَيْهَا شَادِيَةٌ وَنَجَاةٌ  
وَكُوكْتِيلٌ مِنْ فِيرُوزٍ  
وَدُنِ الْعِيَالِ هَتَنْصَفُ  
رُوحُ الْعِيَالِ هَتَنْصَفُ  
هَيَحْبُوا يَشِيلُوا الشَّنْطَةَ  
هَيَحْسُوا فِيهَا كَنْوُزٌ..  
وَيَبْقُوا جِيلٌ مَحْظُوظٌ  
شَنْطَتُهُمْ تَبْقَى حَيَاتُهُمْ  
مَشَاعِرُهُمْ هَتَلَاغِيهَا  
هَيُرُوُوا عَطَشَهُمْ بِيهَا  
زَى الْحَرَّانِ مَا يَجْرَى  
عَ الشَّفِشَقِ أَبُو بَزْبُوزِ!  
هَى: إِخْلَصْ وَانْجِزْ شَوِيَّةَ  
يَا أَبُو مَنَاخِيرِ قَدْ الْكُوزِ!  
هُوَ: مِنْ فَوْقِ قَلْنَا اسْطَوَانَةً  
وَتَحْتَ هَحْطِ لُوحَيْنِ  
بَقْبَقَابَيْنِ عَجَلْ..  
يَاخُدُوا الْعِيَالِ وَيَطِيرُوا  
يَسِيرُوا الْأَرْضَ شَوِيَّةَ  
وَيُرُوحُوا أَبْدَعَ صُحْبَةٍ  
يَتَمَشُّوْا عَ السَّحَابِ  
بَلْطَافَةٍ وَبِخَجَلْ..  
يَرْقُصُوا الْحَصَانَ  
يَنَادُوا عَ الْكُرَّوَانِ

ويلعبوا مع فرافيرو  
الواد يفرح بروحه  
ويفرد كل طوله  
يفتح حضنه للدنيا  
على قبقاب العَجَل  
والبنت هتضحك ضحكة  
وتحب نفسها أكثر  
وهتأخده معاها تذكّار  
لما يجيلها العَدَل!  
هى: شوف والنبي الهَلّ!!!  
يختى على جوزى يختى..  
تعالوا يا ناس شوفوا بختى..  
جوزى حبيبى بتاعى  
يُؤلمنى جداً أقول  
واحكى لكل الدنيا  
بكلام دوغرى على طول  
إن دماغه يا حلاوة  
شنطة قفلها منزوع  
وعشان تكمل إياقتها  
وتليق بالروباكيا  
سوستتها طارت طيارة  
سابت جلدّها مقطوع!  
أفكارها متهورة  
حالتها متدهورة  
بتلطّش ليه ماعرفش

زى الطير الملسوع!!  
يا باشمهندس أديسون  
ياللى انت خليفة أديسون  
إيه دا اللى الشنطة تغنى؟!!!  
عايز العيال الأزعة  
يروحو على مدارسهم  
بيغنوا مبسوطين؟!  
طب والناظر والآلة  
نسيهم كدة عاطلين؟!  
بيجوا يشخطوا فى العيل  
يلاقوهم مبتسمين؟!!  
يبقى التعليم هيخرب  
صف الأمخاخ هيضرب  
ولما العيشة تحلى  
الناظر ابن الناظر  
الهيئة الكشّرى الوحش  
هينكّ بقى على مين؟!!  
والست الآلة يا روحى  
اللى وراها الطبخ  
دا غير كوم الغسيل  
هتفّش زعلها ف مين؟!!!  
طب إيه رأيك بالمرّة..  
مايخطوا أسئلة سهلة  
والأزعة يشموا نفّسهم  
ويطلعوا بنى آدمين!!

هـيىء.. هـيـهـيىء.. هـيـهـيىء  
إِسم الله على اختراعاتك..  
فعلاً جوازة طين!!!  
هو: آدى المدام بتاعتى..  
آدى السنيورة مراتى..  
يا خسارة مش فاهمانى  
كَبْسَانِي هَزَّة كِيَانِي  
مش بتقدّر مواهبي  
مش عارفة تحب جنانى  
هـى: يالآ اتخمد يا أديسون  
وارمى الأوهام ورا ضهرك  
الفجر خلاص بيشقشق  
الله يلعن أبو أديسون!  
هو: بالإسم بس مراتى  
طول النهار هَرَيَانِي  
بسلامتها بتتمهزأ  
بسلامتها بتتريق  
على قيمة اختراعاتى  
بكرة هتعرفى قيمتى  
بكرة تفتكرى سيرتى  
وتقولى صحيح يا ناس  
الله يرحم أبو أديسون..



# ورطة من غير أمل!

هو: الناس بتشتكى  
من ستاتها فى حاجة  
مقبولة تُحتمل  
إلا الشكوى بتاعتى  
مالهاش حل خالص  
عنوانها سهل واضح  
ورطة من غير أمل!  
هى: مش مكسوف تقول  
جوازك منى ورطة؟!  
ورطة عشان ايه وليه?!  
يا ابو بدلة بدون كرافاتة  
إيش حال لو كانش جنبك  
جوز عادى جداً خالص  
من غير علامة وشرطة  
مش تحمد ربك يعنى  
وتبوس إيدك لتنين  
إن انا ساكتالك صابرة  
يا خيبة حلمى فيك  
أنا كنت فاكراك أمله  
هتغلب بيها ع الدنيا  
وهجيب فيها جون  
أتاريك طلعت شوطة  
ضعيفة فوق العارضة!

هو: أَلِمَ الناس اشْهَدَهَا  
على أحوال المدام؟!  
أعزم سكان الشارع  
واحكيلهم على مأساتي  
وادورُ اضرب في الدنيا  
على طريقة فان دام؟!!!  
كرهتيني في العربي  
وابو اللي بدع العربي  
حياتي معاكي يا هانم  
لا محل من الإعراب  
ممنوع عليها الصرف  
راحت في خبرين كان  
من دون كل القواعد  
مابتعرفيش تشوفي  
غير شكل واحد بس  
علامة الاستفهام!!!  
هى: يا سلام على كدة يا سلام..  
طب وانا هعمللك إيه؟  
والدنيا تسوى إيه  
من غير ما اسأل واطقّس  
واخلق لكل حاجة  
علامة استفهام؟!  
هو: يا سلام على كدة يا سلام!  
يا ستى.. يا حبيبتى..  
ما تعيشى زى الناس

وكفاية أسئلة  
ويارينته سؤال مفيد  
دا كل سؤال واخوه  
أنقح من اللى جابوه!  
الرحمة أبوس إيديكى  
أنا نفسى أعيش مرتاح  
طموحى أعيش فى هدوء  
مش طالبة مشكلة!  
كفاية أسئلة!!  
هى: أنا بعمل مشكلة؟!  
طيب لو كنت شاطر  
تجاوبنى ع اللى ف بالى  
وتحل المعضلة..  
هو: ويايرتها أسئلة سهلة  
إلا كئيبة وغتية  
مستفزة كبيسة  
تهمة ومابتنحّش  
عقدة ومابتنفكّش  
ألعن من بير أسرار  
تبسيمة الموناليزا!  
هى: إنت اللى جبت السيرة  
دا مفيش حاجة فى حياتى  
فالقانى مجننانى  
قد ابتسامة الست  
المرحومة موناليزا!

هو: مالك ومال مونا ليزا؟!  
الله يرحم أسلافها  
دى كانت ست عظيمة  
هى: إربط عندك من فضلك  
إستنانى شوية  
الهانم المبتسمة  
وشها مفلوق اتنين  
مقسوم ع الونجين  
فيه نص حزاينى مبهدل  
ونص فرايحي مصهلل  
الست بتخزي العين!  
أروح يمين بصالى..  
أروح شمال بصالى..  
أهرب منها على فين؟!  
هو: لو تعبأكى بلاش  
خلاص ماتبصلهاش  
إبعدى عنها واقتصرى  
أحسن ماتعبريهاش..  
هى: وليه هى ماتتلمش؟!  
ذات الوش المتوحش  
أم ضب مفشفش  
ووش قديم مكرمش  
طب ليه ماتكونش صريحة  
وتقول بتبص لمين  
أم شفايف بتكشكش?!!

هو: موناليزا الحلوة الناعمة  
ما بتتلمّش بتكشكش؟!  
يا شيخة حرام عليكى  
حطى حصوة فى عنيكى  
دى حتى روحها جميلة  
صوتها رقيق بيوشوش  
عنيها موجة بريئة  
وقلبها حلو مدندش..  
هى: يمين بالله ثلاثة  
ما هنام إلا لما اعرف  
الهانم السهتانة  
البكسة العدمانة  
مرگزة أوى على مين؟؟  
دى عنيها لتنين بصاصة  
عاملة نفسها بتفكر  
وهى عنيها يا ساتر  
تندب فيها رصاصة!  
هو: يا ستى واحنا مالنا!!!  
ما تسبّل أو تتقندل..  
خلّينا عايشين فى حالنا!  
يعنى خلصت مشاكلنا  
ومغيش شاغل دماغتنا  
غير البنت الموناليزا!!!!!!  
بُصّى حواليكى كويس  
العيشة علينا صعبة

مش ناقصة أسئلة قرعة  
وكفاية اللي بيجرالنا!  
هى: آه والله ليك حق  
بجد صحيح ليك حق  
لكنك ماقلتليش..  
وبرضه ماجاوبتنيش..  
البنت دى موناليزا  
لابسالى هدوم كحيتى  
وقاعدة كدة سُّكيتى  
دى تطلع بنت مين؟  
يعنى من عيلة مين؟  
أبوها صنعتة إيه؟؟  
أخوها شهادته إيه؟؟؟؟  
وهى نفسها يعنى..  
يا هل ترى هانم بايرة  
ولّا مدام ولّا إيه؟؟؟؟؟؟  
هو: يا ستى دا بيكاسو نفسه  
اللى رزعه ورسمها  
ما يعرف أى حاجة  
م اللى بتقولى عليه!  
أنا لسة جاي م الشغل  
عندى مشاكل كتير  
عايز احكيلك عليها  
أخد مشورتك فيها  
إرمى الأسئلة ورا ضهرك

أنا عندى سر خطير  
لازم اقوللك عليه..  
هى: آه والله ليك حق  
بجد صحيح ليك حق  
لكنك ماقتلتيش..  
برضك ماجاوبتنيش..  
الراجل اللى رسمها  
هو: اللى بيمضى بيكاسو  
هى: إشمعننى اختارها هى؟  
مين اللى دُلَّه عليها؟؟  
مين اللى عتَّره فيها؟؟؟  
يا ترى كات صدفة مثلاً!  
بيدور فى الدليل  
بيغير فى الأسامى  
أول ما قرا موناليزا  
شَهَقْ جامد خَدَّ نَفْسُهُ!  
ولّا كان ماشى مرّة  
قامت عربيته عطلت  
قدام بيت السنيورة  
وكل عَجَلُهُ فَسُّوا!  
هو: والله ما عندى إجابة  
روحى اسألى بيكاسو!  
هى: قام قاللك اسلّى وقتى  
على بال ما ينفخوهم  
يا واد ارسملك لوحة

بدل العَطَلَة يا بيكاسو..  
هو: يا ستى واحنا مالنا؟!!!!!!  
عربية ولا كاريّة؟!!  
دا راجل عنده شعرة  
يعنى فنان كبير  
بالعربى عنده هفّة!  
تلاقيه كان دائماً يمشى  
بلوحة فاضية فى إيده  
شابكها فى الجاكيّة..  
هى: ومعاها كام باليّة  
هو: باليّة ولا كاريّة..  
يا ستى واحنا مالنا؟!!!!  
إيه بس اللى بيحشرنا؟!  
نقول تانى من الأول..  
خلّينا عايشين فى حالنا  
يعنى خلصت مشاكلنا  
ومغيش شاغل دماغنا  
غير شعراية بيكاسو؟!  
وبسمة الموناليزا؟!  
وباليّة ولا كاريّة؟؟؟!  
يا حبيبتي بُصّى كويس..  
بُصّى حواليكى كويس..  
يا هانم.. يا حَرَمْنَا  
العيشة جداً صعبة  
مش ناقصة أسئلة فارغة



وكفاية اللى بيجرالنا!  
هى: دى حاجات محيرانى  
عاملالى لخبطة  
هو: لا وحياتك يا هانم  
دى دماغك اللى ماسحة  
مش حاسة بحاجة خالص  
عايشة بتتسللى بس  
ومضيعة وقتى معاكى  
فى كلام فارغ من نوعك  
وتفاهة وسفسطة!  
هو: كنت عايزنى تحكىلى  
موضوع أبصر إيه..؟؟!!  
هى: ما بقالى ساعتين واصل  
وجاى هلكان م الشغل  
عندى مشاكل كتير  
موضوع بجد خطير  
عايز اخذ رأيك فيه  
إرمى الأسئلة ورا ضهرك  
دا بيكاسو نفسه يا ستى  
اللى اتنيل رسمها  
مايعرف حاجه أبداً  
م اللى بتقولى عليه!  
يا مراتى.. يا حبيبتى..  
أنا عندى سر خطير  
لازم أقوللك عليه!!

هى: آه والله ليك حق  
بجد صحيح ليك حق  
مش عارفة ليه ليّام  
بتفوت من إيدنا قوام؟!  
هو: يا سلام على كدة يا سلام  
يا بنتى.. يا حبيبتى  
ما تعيشى زى الناس  
وكفاية أسئلة  
شوفى بيتك شوية  
حسّى بجوزك شوية  
مش ناقص مشكلة!  
مش طابق أسئلة!  
فى الشغل خمسين سؤال  
فى الشارع ميتين سؤال  
فى الأتوبيس ألف سؤال  
وكل سؤال واخوه  
ماعنديش ليه جواب  
دا ناقص تسألينى  
إفتح بقك ورينى  
عندك كام سينّة وناب؟!  
حرام عليكى يا شيخة..  
ويا ريته سؤال مفيد  
دا كل سؤال واخوه  
أنقح من اللى جابوه  
الرحمة أبوس رجليكى

أنا نفسى أعيش مرتاح  
عايز أعيش فى هدوء  
مش لازم اموت مفلوق  
مش طالبة أسئلة!  
مش ناقصة مشكلة!!  
يا ستى مغيث جواب  
يا ريتنى اعرف جواب  
كنت اشترت حياتى  
من العيشة الهباب  
هى: أنا بعمل مشكلة؟؟؟؟؟؟  
طيب لو كنت شاطر  
تجاوبنى ع اللى ف بالى  
وتحل المعضلة!  
الناس فى القرن التاسع  
إزاي بيروحوا أشغالهم  
ويطبطوا مواعيدهم  
من غير مترو الأنفاق؟  
طيب وغير دا كله..  
فين سكيّنة الجوابات..  
يا ترى كان ليها وجود  
وقت الحمام الزاجل  
قبل اختراع البوستة  
وشوالات الجوابات؟؟  
وفين ممكن نلاقى  
مكان كوكب عطارد

ع السلم فوق البَسطة  
ولّا فى شارع الكيت كات؟؟؟  
ويا هل ترى شعر راسنا  
عارفين عدده بالظبط  
ولّا كله بالبَرَكة  
والتعلب فات فات؟؟؟؟  
هو: أبوكى السفامات  
ويا ترى جوازتى منك  
كات ساعة نحس فعلاً  
ولّا حصلتلى البركة  
وأخذت مقلب سُقّع  
وشربته من سكات؟؟!!  
هى: مش مكسوف تقول  
جوازتى ساعة نحس؟!  
مقلب عشان ايه وليه؟؟!  
إيش حال لو كانش جنبك  
متجوزنى عن حب  
وعشنا أحلى قصة  
يحكوا عنها ويتحاكوا  
يتعلموا منها الحب؟!  
هو: أكيد احنا اتحسدنا  
كل كلامنا جدل  
كل سكاتنا ملل  
وحياتنا كدة من ذاتها  
بقت خناقة طويلة

كلها جرجر شكل..  
هى: آيوة أكيد اتحسدنا  
أنا متأكدة من جوة  
هى البنت الموناليزا  
لازم عاملالنا عمل!!  
هو: الناس بتشتكى  
من ستاتها فى حاجة  
مبلوعة تُحتمل  
إلا الشكوى بتاعتى  
مالهاش حل خالص  
عريضة من غير إمضا  
مليانة سفسطة لِمضة  
عنوانها سهل واضح  
ورطة من غير أمل!

# بواقى أمير الغرام

هى: أحلى حاجة فى حياتى  
حدوتة قبل النوم  
أجمل ذكرى فى طفولتى  
دائماً فى آخر اليوم  
لما مامتى تيجينى  
تقعد جنبى تغطينى  
تحكيلى حكاية مثيرة  
طبعاً نهايتها سعيدة  
وتبوسنى بين عنياً  
تدوّقنى الحنية  
تلاعبنى آدى البيضة  
لحد ما اروح فى النوم  
وتنادى ع الملايكة  
تلمهم حوالياً  
ياخدولنا صورة كبيرة  
وتوصيهم علياً  
تبدأ تحكى الحدوتة  
كله يربّع إيديه  
كله يهز ف رجليه  
والليل يطول ع الآخر  
يدى أوامر للشمس  
ممنوع تصحى عنياً  
ونجومه تيجى تجرى

تسيب وراها أشغالها  
تعمل دايرة على قلبى  
وتستأذن من مامتى  
تسمع معانا شوية..  
هو: طبعاً طفولة بريئة  
مش ممكن أبدأ تسمع  
حدوتة نكد مخيفة  
زى أمير الانتقام!  
هى: مامتى حبيبتى حياتى  
كان كل حلم حياتها  
إزاي تسعد أوقاتى  
كانت فى كل يوم  
تحكىلى مغامرة جديدة  
عن البطل الهُمام  
إسمه أمير الغرام  
هو: طبعاً دا مش حقيقى  
قصص الحواديت خيال  
هى: ماهى برضه أمى حبيبتى  
طول عمرها بتأكدلى  
دا كله خيال فى خيال  
هو: طبعاً ومش حقيقة  
هى: لكن حظى المنحوس  
الله يسامحه مع مامتى  
عملولى مفاجأة كبيرة  
شالوهالى فى المكنسة..

من بختى أنا المتعوس  
ييجى البطل الهُمام  
واسمه أمير الغرام  
فى قُرعتى ونصيبي  
والاقى المعجزة  
متشاله هناك على إسمى  
من جوا المُكنسة!!  
هو: فاكراها المُكنسة؟؟؟  
الحلوة المُلفتة؟؟؟  
كات قاعدة فى المحل  
واقفة فى حالها ع الأرض  
حاجة شدتنى ليها..  
واخترت أشتريها  
وانتى اخترتى تجيبها  
هى: نحل الأزمة ازاى؟؟!!  
هو: هناهو بالطبط يا روحى  
حصلتلى المعجزة..  
ربنا ألهمنى الحل  
خدتكو إنتو الاتنين  
شروة تملأ العين  
زوجة بالمُكنسة  
هى: جوزى البطل الهُمام  
زوحى أمير الغرام  
دا لوحده حكايته حكاية  
بيحب المغامرات



بيعز المفامرات  
هو: كل يوم بحكاية  
وكل ساعة برواية  
هى: وياريتها بتحصل فعلاً!!  
إلا الافندى حبيبي  
مياس جداً جداً  
خيالى جداً جداً  
كل مواهبه حكاية  
حكاى عن مشاريعه  
وازاى على راسه تاج  
بصفته ملك الوقت..  
بعدين أنا اكتشفت  
إن الباشا عواطللى  
فاضى فى كل وقت  
حكاية بدون نهاية!!  
جوزى أمير الغرام  
أمير الانتقام  
مياس نتاش بشكل  
ماركة أبو لمعه الأصلى  
يفضل يحكى للصبح  
عن أمجاده المُهابة!  
وازاى بيعبى الشمس  
لاخواته فى البزاة  
من يوم ما جاب الداية!!  
ويفضل يحكى ويحكى

وانا قاعدة معاه للصبح  
سميعة بالإكراه  
زوجته ومش طايقاه  
أنا بدعى عليه فى سرى  
وفاكرنى قال بدعيه  
على رأى ستى قالتها  
لكل شىء نهاية!!  
يخرج من الحدوة  
علشان يدخل حدوة  
وياريتها بتحصل فعلاً!  
هموت منه وانا قاعدة  
بدن لوحدى بكاكى  
لحد صلاة الفجر  
بعضض فى الملاية!!!  
دا حتى الديك بتاعنا  
طهق من عيشته معانا  
اتسرسب ليله فى نهاره  
اتلخبط فى التوقيت  
وخلص بطل يكاكى  
مابقاش نافع يا ضنايا!!!!  
ولا هو واخذ باله  
يخلص من الحدوة  
علشان يدخل حدوة  
ومين يجرو يقاطعه  
ويقولله بس كفاية؟!

مين مستغنى عن عمره  
ويقاطع ابن الرغاية؟!!!  
هو: قبل الجواز وعدتك  
بيتنا هيبقى تحفة  
فُيلا عظيمة بجنية  
فيها حمام سباحة  
فيها شركة سياحة  
كهارب.. موتوسيكلات  
مرايات.. أوتومبيلات  
فى الصيف آخر تراوة  
ونسمة مهففة  
فى الشتا حر ويلهلب  
عيشة مُلك ودفا  
فيلتنا ألغين أوضة  
داير ما يدور جنية!  
ممنوع الفرجة الآن  
بعد الجواز يا حبيبتى  
فيه لسة تشطيات  
على أطراف الجنية!!  
هى: ماجاش فى بالى أبداً  
إن أمير الغرام  
كدّاب نصّب عليّا  
خلص الفرح وخلصنا  
روحنا البيت فى الضلّة  
وبعد أول ليلة

طلع النهار وفتح  
وكات أنيل صباحية!  
الباشا ابو لمعه الأصلي  
جانبى على جدور رقبتى  
المياس الغشّار  
الرخم ابن المؤذية!!  
الغيلة أم جنينة..  
طلعت يا روحى عليه  
جنينة الأريكية؟!  
وحمام السباحة..  
اللى فتنّى بمحاسنه  
أثاره مجارى ضاربة  
متحاوطة ببركة مية!!  
هو: وشركة السياحة؟  
مش فيه شركة سياحة؟؟  
هى: دا كشك عم عبده  
كاتب أهلاً وسهلاً  
بكل البلطجية!  
هو: دا جزاتى بعملك قيمة  
ما بين كل جيرانى؟؟  
يا ستى ماتدقيش  
كإنا رحنا السيما  
والفيلم طلع تايوانى!  
هى: كهارب.. موتوسيكلات؟؟!!  
قال كهارب قال..؟؟!!

هو: مالها بقى الكهارب؟!  
هى: إياك تقول كهارب..  
لمبة عامود يتيمة  
واخده نبلة ف مناخيرها  
وبترعش م الشرار  
زى عيون التعالب!  
هو: طب إيه رأيك يا حبيبتي  
سيبى اللى فات مات  
هى: دا انا اللى قلبى واجعنى  
من حسرة روحى على روحى  
ومن عقلى اللى داب!!  
هو: طيب ماتنكريش..  
لقيتى الموتوسيكلات..  
هى: موتوسيكلاته بحبوحة  
دا إسم الشهرة طبعاً  
وفى شهادة ميلادها  
عَجَلات عم حلمبوحة  
الأسطى مايف عَجَلَة  
بسرينة الموتوسيكلات  
والخطوة تاتا تاتا!  
وياريتة عَجَل باتنين  
إلا من بختى الأسود  
كل العَجَلات بتلاتة  
قوم العيال تديها  
صريخ وخبط ورزع

وانا اصوّت بالتلاتة!  
هو: دا جزاتى بعملك قيمة  
فى وسط كل اصحابنا  
يا ستى ماتدقيش  
كإنا فى الأتوبيس  
زوغنا من التذاكر  
قوم الكمسارى طوّقنا!  
هى: برضه لسة بتتفشخر؟!  
برضه لساك بتكذب؟!  
هو: لأ دا انتى زى القطط  
تاكل تاكل وتنكر!  
وطابور الأتومبيلات..  
مش دا اللى وعدتك بيه؟!  
طابور بشرف ورور  
أهو متلقّح قدامك  
على كل شكل ولون  
ومتزّين بالترتر..  
هى: تصدق لأ بجد..  
جنابك نصاب يهبل!!  
ماتقولشى أوتومبيلات..  
قصّدك عربية الفول  
ووراها عربية فول  
وأمامها عربية فول  
وماينهم عربية فول  
مجموعة عربيات

مرصوصه حَتَّة رَصَّة  
مركونة بحرفنة  
والناس طوابير أمم  
نازلين ع الزيت الحار  
بيحبشوا البهارات!!  
هو: طب سينا من كل ده..  
بلاش كل ده..  
أنا وعدتك بإيه؟؟!!  
بنسمة ترد الروح  
حقنة سوبر هوا  
وحاجة إكسيرا  
ربيع مالوش دوا..  
هى: يا عينى ع الهوا..  
هو: ولفحة الهوا  
هى: مطرح مفتوح ع البحرى  
صواريخ الهوا بتفرهد  
تنغز فى الجسم وتجرى  
لفحانا قبلى بحرى  
واحنا وراها نتشرد  
هو: طيب وياقى البيت؟!  
قصدى بقية القيلة؟!!  
هى: ماتحسرنيش ع البيت!  
واللى شايفاه فى البيت!!  
يا حيط كله خروم  
والسقف كله غيوم

حتى الحمام المقرف  
طلع راخر مسدود  
من غير دُش خالص  
هو: مش لازم الحمام!!  
هى: على رأيك بلاش حموم!  
ما انا عندى فكرة أحسن..  
ماتيجى نعيش سبور  
ع الناشف كدة سلبوتة  
ونوفر الهدوم!!!!  
هو: وافرضى جيبنا الهدوم..  
منين نجيب دواليب  
تستوعب الهدوم!!  
هى: أشق هدومى يا ناس!!  
طب فين هى الهدوم?  
وفين هى الدواليب??  
وفين إوض البيت??  
دا انت كلك على بعضك  
كائن شيطانى محروم!!  
هو: طيب ماتنكريش  
إن احنا فى عز البرد  
مالناش دعوة بالطقس  
واللى بيحصل فى الطقس  
عايشين عيشة آلاجة!  
الناس برّة بتكتك  
واحنا يا عينى علينا



فى حر ودفا بنوهوج  
سايعين كما الشوكولاتة!!  
هى: البركة فيك يا حبيبى  
وفى بتاع البطاطا!!  
طول النهار يهوى  
وببخ الهَبُو علينا  
مع قشر البطاطا  
هو: ومعها خيرات كمان..  
هى: وحياتك صحيح نسيت  
توايع البطاطا  
هو: قصدك أسراب الرايش  
هى: ولسعة الشظايا!!  
هو: وماله يا كل حياتى  
بنكفر عن الخطايا!!  
هى: ودا مصدر السخونية  
هو: والعيشة المستوية!!  
هو: داير ما يدور جنينة..  
هى: جنينة الأزيكية  
هو: هنتبطر ع النعمة  
دا حتى يبقى حرام؟!  
هى: فعلاً والله حرام  
هو: بعدين ماتنكريش  
إنى بطل حواديتك  
واسمى أمير الغرام!  
هى: آه يا حظى المنحوس يانا

الله يسامحه مع مامتى  
لتنين اتفقوا عليّا  
يكسروا مناخيرى وقامتى  
جوزى الفشار ماطلعشى  
إسمه أمير الغرام!  
ولا أمير الانتقام!!  
باين الحدوتة اتسرقت  
باين الحدوتة اتحرقت  
وجوزونى عميانى  
بواقى أمير الغرام!

# مراتى ملاك الرحمة!!

هو: يقولوا على حواء  
لو كل الدنيا هلاك  
هى ملاك الرحمة!  
لو الحروب والعة  
هى بتطفى النار  
وتسيبها يادوبك فحمة!  
وانا مراتى حياتى  
إثنين ملاك فى بعض..  
واحدة جواها واحدة  
مبرومين فى بعض..  
يعنى ملاك بالدويل  
وحالتها حالة صعبة!!  
فى البيت اسمها حواء  
والشغلانة ممرضة  
فى النادر لماً تضحك  
وفى الغالب مُقبضة  
بوزها شبرين على طول  
حواجبينها مُبغضة  
بصراحة جابتلى فتاء  
الدون بنت المتعبة!!!  
هى: ليه بس يا نور العين؟!  
هتروح من ربك فين؟؟!  
مش عاجباك بنت حواء!!!

واقفلى ليه ع الواحدة؟؟!!  
إلهى تشيلك نوّة  
تهرى فى جلدك تتسلّى!  
هو: أهو دا نموذج حواء  
اللى جايلى الفتاء!!  
أنا عايز أسأل سؤال..  
هموت واسأل سؤال..  
يا عاشقة سيرة اللحمّة..  
يا طاردة ملاك الرحمة..  
إنتى بتعاملى الناس  
العيانين بتوعك  
كدة زى ما بتعاملينى؟!  
هى: ومالها معاملتى ليك  
ياللى بهمك كاسينى  
يا ناكر خيرى فيك  
ومسوّد لون سنينى؟؟!!  
هو: بس هنتفق الأول  
هى: على إيه يا ابن المجانينى!!  
هو: هتدينى الأمان  
وكلامنا باللسان  
ممنوع منعاً باتاً  
إستخدام الحزام!  
هى: إسفوخس عليك يا حبيبى!  
حقيقى اسفوخس عليك!!  
دا انت سكر حياتى

عين جملی وكل خشافی  
إنت مَرَكِب حیاتى  
قُلْع الدنيا ومجدافى  
هو: غنى علياً ما انا أصلى  
داقق عصافير م الأصلی  
بأمانة إيدك الحلوة  
معلّمه فوق كنافى!!  
هى: إسألنى بقى وخلصنى  
ورایا شغل هناك  
ما انا عارفك متقصدى  
غاوى تنتع قلبى معاك  
هو: إنتى بتعاملی الناس..  
هى: العیانیین بتوعى..  
هو: كدة زى ما بتعاملینى؟؟  
على طول سايبانى جعان  
مربوط زى الحيوان  
فى الشتاء والصيف بتكتك  
ودايماً قاعد حافى؟؟  
ولاً انتى برّة البيت  
واخداهم فحت ردم  
وعاملالهم فتوة  
على طول مطرقعالهم  
بالشيشب الزحافى!!؟؟  
هى: العیانیین من دول  
أصناف مليانة سَقالة

الواحد فيهم ييجى  
مَهْرَى زى البقلاوة  
يتنحج يتمسكنلى  
وهو أبو الندالة  
يبلّط فى السرير  
وتشتغل الغسالة  
نعلقه المحاليل  
ويعيش علينا عوالة  
العيانين من دول  
عالم رمّة حثالة  
حبس انفرادى أبدى  
من غير إفراج وكفالة  
سيبهم متلقّحين  
يتنقّعوا فى الآيالة  
جزاءهم الوحيد  
قلة أدب وسفالة  
يستاهلوا اللى بيجراهم  
مواطنيين زبالة!!  
هو: والله دا شىء خطير  
فعلاً بتشقوا كثير..  
لكن يا حبيبتى بقول  
مش يمكن فيهم يعنى  
مرضى مؤدبين؟  
ولاد ناس طيبين؟؟  
عياهم مش هيطوّل

جاين متربيين؟؟  
مش جمل خناق وزحمة  
مش كدة يا ملاك الرحمة!!  
هى: وعامللى فيها مفتح؟!  
وحياة أبوك تتلقح!!  
هو: سيبى الحزام من إيدك  
إنتى اديتى الأمان!  
وافتكري إنى حبيبك  
وجوزك من زمان!!  
هى: إتفو عليك يا حبيبي  
حقيقى اتفو عليك  
دا انت دوايا وحبوبى  
بالطو بدقا بيه  
حقنة عمرى ومحبوبى  
يا بختى باللى انا فيه!!  
هو: غنى عليا ما انا أصلى  
داقق عصافير م الأصلى  
بأمارة زرقان جسمى  
مش سايبه خرم فيه!  
هى: ماتاكلش منى دماغى  
وسيينى فى اللى انا فيه  
حد طلب منهم يعيوا؟؟!  
آهو دا اللى فالحين فيه!!  
هو: وهو العيا بمزاجهم!!  
ما كفاية اللى بيجرالهم

هى: اللى مش عاجبه يروح  
ولا يعيا ولا يطوح  
الباب اهو قد الداھية  
اللى يفوت ما يفوت  
ولو مش عاجب أهله  
يخلصنا ويموت!!  
هو: مراتى دى كل حياتى  
إثنين ملاك فى بعض  
واحدة فوقها واحدة  
متشاكلين فى بعض  
يعنى ملاك بالدوبل  
وحالتها حالة صعب  
هى: أجسام ضاربة بجنون  
مرضى يجيبوا العلة  
تخصص أكل دهون  
سمنة ومورتاديل  
وغلبننا نفهم فيهم  
غلبننا نقول رچيم  
خفوا على الأكل شوية  
بالراحة يا فجعانين  
لكن تقول لمين؟!  
دول مرضى تلفانين  
كروش ومخ تخين!  
هو: أعوذ بالله على طبعك  
دا كلام يجيب الضغط



يُهينُ البنَى آدمين  
دى معاملة تجيب إمساك  
وتضعف عدد النبض  
تنفع مع البهيم!  
وهو فين الأكل؟!  
يا شيخة دول ناس غلابة  
الدنيا طايحة فيهم  
بالأيام والسنين  
هى: وعامللى فيها مفتح؟!  
وحياة أمك تتلقح!!  
هو: إرمى الحزام من إيدك  
دى مناقشة ديموقراطية  
ولو ما عجيش كلامى  
كفايه عليا بونية  
دا أنا جوزك حبيبك  
خدامك من زمان  
خليكى فاكرة وحياتك  
إنتى اديتى الأمان!  
هى: إخص عليك يا حبيبي!  
حقيقى اتفوخس عليك!!  
هو: غنى عليا ما انا أصلى  
داقق عصافير م الأصلى  
بأمارة كعب الجزمة  
اللى معلّم على ضهرى  
وهو العيا بمزاجهم؟!

ما كفاية اللى بيجرالهم  
هى: عارف العيان من دول..  
بيجى منمنم مسلوع  
يهاتى بصوت مسرّسع  
يا دوب جلدة على عضم  
يقرّنا بتحليل بول  
وغازات وعُسر هضم  
والسما تبدأ تندّع  
ولمّا البرّكّه تكمل  
والمستخبي يظهر  
طول النهار طلبات  
ويشجينا آهات  
قسّم يا سيدي ولعلع  
ولمّا يحل الليل  
وجنابه لسة عايش  
متبّت أوى فى الدنيا  
يتشنج بقى ويبدّع  
هو: يا ملاكى يمكن فيهم  
مساكين وتعبانين  
محتاجين رعاية  
وقرص أسبرين  
كلمتين حنيّة  
م القلب كويسين  
هى: عارف العيان من دول..  
لو طلتهم بإيدّيّا

أعبيّ لهم فى أزايز  
كرات النفطالين!  
آخ لو يسيبونى عليهم  
أدوّب الاقراص  
فى شوية توكسافين  
هو: وهو العيا بمزاجهم؟  
ما كفاية اللى بيجرالهم؟؟  
هى: اللى مش عاجبه يروح  
ولا يعيا ولا يطوّح  
الباب قد الفسحة  
اللى يفوت ما يفوت!  
ولو مش عاجب أهله  
يخلصنا ويموت!!  
هو: مراتى دى كل حياتى  
أورطة ملايكة فى بعض  
متلزيقن فى بعض  
مجموعة فوق مجموعة  
بصراحة وكل صراحة  
الأصل أصله يحكم  
العيلة سكّه وجربوعة!  
هى: يا مين يدينى رقتهم  
يا مين يباسيلى دماغتهم  
بدعى عليهم من قلبى  
يا رب خُدهم بدرى!  
يا ناس حرام عليكو

فُطَّعَ العيا وسنينه  
الشغل كثير عليّا  
خلاص بقى مش طايقاه!!  
هو: خلاص خلاص يا حزينه  
هتلمّى الناس علينا  
دا انتى تركيبة غريبة  
كتلة قسوة كئيبة  
هى: الله يسامحك يا سيدى..  
ماهو إنت برضه حبيبي..  
هو: بجد أخلتيني!  
بجد قطعتيني!!  
أيوه كداهو يا حياتى  
والله إتغو عليهم..  
والله إسفوخس عليهم..  
العبانين الإيحة  
يا روحى معصينك  
أهاليهم مجننينك  
إرمى يا روحى ورا ضهرك  
ولا لينا دعوة بيهم..  
إحنا هناهو فى البيت  
اقعدى خالص على راحتك  
من فضلك.. لو سمحتى..  
تنسى الممرضة  
والخُلقة المُقبضة  
إعتبرى بيتنا سفينة

واحنا ركاب وحيننا  
قربى يا حبيبتى جنبى  
يا ملاكى يا نبع سعدى  
خلينا نفصى لبعضينا  
نروى الشوق اللى مالينا  
إنسى الحزام والشيشب  
والشغلانة الحزينة  
قربى يا حبيبتى جنبى  
إدينى بوسة على خدى  
وحشتنى ريحة الدنيا  
يا وردة فى كل مينا  
هى: قوم اغسل بুক قبله  
عطسه فى سبرتو وقطرة  
ولو مالقتشى مطهر  
إدعك إيدبك فى بصله  
ماهيش ناقصة جراثيم  
ما كفاية العيانين  
عايشين وميتين  
إنت متبح كدا ليه؟؟  
قوم فز الحالة خيرة!  
هى: يقولوا على حواء  
لو كل الدنيا هلاك  
هى ملاك الرحمة!  
وأنا مراتى حياتى  
هى سبب مماتى

فى البيت اسمها حواء  
والشغلانة ممرضة  
فى النادر لما تحس  
زوجة متشردة  
ممسوحة المعالم  
أنوثتها مغلضة  
زغرتها نار جهنم  
حواجبها مربكة  
يا مراتى.. يا كل حياتى  
أنا طالب الحكم الذاتى  
صبرى خلص وياكى  
والفتء زاد معاكى  
الدون بنت المتعبة!!



## رقم الصفحات

## محتويات الكتاب

٣	كلمة
٥	أنا كنت بقولك إيه...
١٠	تصبحى على خير يا حبيبتى
١٦	يا بوليس...
٢٤	بصحيح اللى اختشوا ماتوا...
٣٥	وحياة ربنا دا حرام
٤٤	وعلياً من دا بإيه؟!!
٥٦	حسبى الله ونعم الوكيل
٧٠	مايصحش كدة!!
٨٣	مطرح ما يسرى..
٩٧	جوزك وملك إيديكى
١١١	يا بتاع العسلية
١٢٢	ويا ريته كان جربان!!
١٣٤	مراتى فنانة
١٤٥	بكام كيلو العواطف؟!!
١٥٨	بالشوكة والسكينة
١٧٠	تحفة آخر زمن!
١٨٢	جلّ من لا يسهو
١٩٤	لمّا بييجى بكرة!
٢٠٦	أطول طفل فى العالم!!!
٢٢٤	جوزى ملك السرحان
٢٣٦	روميو زعيم الآباش!



٢٥٢	يا بخت طرزان بشيتا!!
٢٧٥	مش انت فارس أحلامى..
٢٨٨	زوجة بالضربة القاضية
٣٠١	جوازة نُص عمر
٣١٥	قولوا معايا آمين!
٣٢٨	الله يرحم أبو أديسون
٣٤٤	ورطة من غير أمل!
٣٥٧	بواقى أمير الغرام
٣٧٠	مراتى ملاك الرحمة!!

## د. نهاد إبراهيم

مواليد ١/ ١/ ١٩٧١ - القاهرة - مصر

ناقدة مسرحية وسينمائية وأدبية حرة.. شاعرة.. قصاصة..  
مترجمة

حاصلة على ليسانس ألسن قسم اللغة الألمانية/الإيطالية -  
جامعة عين شمس - ١٩٩٢

حاصلة على دبلوم الدراسات العليا للنقد الفنى - تقدير امتياز -  
المعهد العالى للنقد الفنى - أكاديمية الفنون - ١٩٩٦

حاصلة على درجة الماجستير فى النقد الأدبى " شخصية  
شهرزاد فى الأدب المصرى المعاصر " - تقدير امتياز - المعهد  
العالى للنقد الفنى - أكاديمية الفنون - ٢٠٠١

حاصلة على درجة الدكتوراه فى النقد الأدبى "أسطورة فاوست  
بين مارلو وجوته والحكيم وبكتير وفتحى رضوان - دراسة تحليلية  
مقارنة " - مع مرتبة الشرف - المعهد العالى للنقد الفنى -  
أكاديمية الفنون - ٢٠٠٦

لها العديد من المقالات والدراسات النقدية المتخصصة فى  
الصحف والمجلات المصرية والعربية

عضو لجنة مشاهدة واختيار الأفلام بمهرجانات القاهرة  
والإسكندرية والإسماعيلية السينمائية الدولية

شاركت فى ترجمة وتحرير كتالوجات مهرجانات القاهرة  
والإسكندرية والإسماعيلية وسينما الطفل السينمائية الدولية

شاركت فى إدارة ندوات محلية ودولية بالمهرجانات المختلفة  
والمجلس الأعلى للثقافة ومكتبة الإسكندرية

شاركت كعضو لجنة تحكيم النقاد بمهرجان الإسماعيلية الدولى  
للأفلام التسجيلية والقصيرة/ممثلة لجمعية نقاد السينما  
المصريين - ٢٠٠٢

مثلت مصر فى لجنة تحكيم النقاد الدولية بمهرجان لوكارنو  
السينمائى الدولى / ممثلة للاتحاد الدولى للنقاد/FIPRESCI -  
٢٠٠٣

## عضو فى

- \* جمعية نقاد السينما المصريين "E.F.C.A" التابعة للاتحاد  
الدولى لنقاد السينما "FIPRESCI"
- \* جمعية كتاب ونقاد السينما المصريين
- \* اتحاد كتاب مصر

## صدر لها

- \* كتاب **"دراما بلا حدود"** عن السيناريست المصرى عبد الحى  
أديب- إصدارات المهرجان القومى للسينما المصرية - ٢٠٠٠
- \* ديوان شعر عامية **"كلام أغانى...!!؟"** - دار النيل - ٢٠٠٤
- \* ديوان شعر عامية **"شكلى مش زى الصورة"** - إصدارات  
مركز الحضارة العربية - ٢٠٠٥
- \* كتاب **"شهرزاد فى الأدب المصرى المعاصر"** - إصدارات  
الهيئة العامة لقصور الثقافة - سلسلة كتابات نقدية - ٢٠٠٥
- \* تحرير وتقديم كتاب **"عناكب فى المصيدة/ ثلاث روايات  
روسية"** - المشروع القومى للترجمة - إصدارات المجلس  
الأعلى للثقافة - ٢٠٠٥
- \* تحرير وتقديم الرواية الروسية **"موزاييك الحب والموت"** -  
المشروع القومى للترجمة - إصدارات المجلس الأعلى للثقافة -  
٢٠٠٦
- \* تحرير وتقديم **"كراسة مصر/ روايتان روسيتان"** - المشروع  
القومى للترجمة - إصدارات المجلس الأعلى للثقافة - ٢٠٠٦

\* كتاب **"توفيق الحكيم من المسرح إلى السينما"** إصدارات  
الهيئة العامة لقصور الثقافة - سلسلة آفاق السينما - رقم ٤٩ -  
٢٠٠٦

\* ديوان شعر عاميه **"إتفرج يا سلام"** - إصدارات الهيئة المصرية  
العامة للكتاب - ٢٠٠٧

\* كتاب **"أسطورة فاوست بين مارلو وجوته والحكيم  
وباكثير وفتحى رضوان"** - إصدارات المجلس الأعلى للثقافة -  
٢٠٠٩

\* ترجمة وتقديم كتاب **"المخرجون - كلايت أول مرة"** -  
إصدارات المركز القومى للترجمة - ١٥٩٦ - ٢٠١٠

\* ديوان شعر عاميه **"فى بيتنا شجر التوت"** - ٢٠١٢

\* المجموعة القصصية **"الكونت دى مونت شفيقه"** - ٢٠١٢

\* ديوان شعر عامية **"كل كلام الأغاني"** - إصدارات مركز  
الحضارة العربية - ٢٠١٤

\* ديوان شعر عامية **"يقولوا عليا حمار!!!"** - إصدارات مركز  
الحضارة العربية - ٢٠١٤

\* ترجمة كتاب **"تحت مقص الرقيب"** - إصدارات المركز القومى  
للترجمة - رقم ٢٠٣٨ - ٢٠١٤

\* كتاب **"قراءات نقدية فى العروض المسرحية"** - إصدارات  
مركز الحضارة العربية - ٢٠١٤

\* كتاب **"سينما حول العالم"** - إصدارات دار العلوم للنشر  
والتوزيع - ٢٠١٥

\* كتاب **"دراسات سينمائية متنوعة"** - إصدارات دار العلوم  
للتنشر والتوزيع - ٢٠١٥

# فى بداياتها استمرت تكتب شهورا طويلة مقالات نقدية  
سينمائية بمجلة الكواكب المصرية بإمضاء "الأنسة كاف"

## جذبت بعض الإصدارات انتباه قمم الجامعات الأمريكية  
الراقية لتحفظ بها فى مكتباتها. تتضمن قائمة هذه  
الجامعات المرموقة:

هارفارد - ييل - أوهايو - برينستون - ستانفورد -  
كاليفورنيا، بيركلى - كاليفورنيا ، لوس أنجلوس -  
كولومبيا - أوهايو - تكساس أوستن - إنديانا  
إلى جانب الجامعة الأمريكية بالقاهرة - جامعة بامبرج  
بألمانيا

### جوائز

\* فازت المجموعة القصصية **"الكونت دى مونت شفيقه"** بجائزة  
أفضل مجموعة قصصية ٢٠١٢/٢٠١٣ ضمن جوائز اتحاد كتاب مصر  
البريد الإلكتروني: [nihadibrahim30@yahoo.com](mailto:nihadibrahim30@yahoo.com)



هو: طول عمرى أنا من صغرى  
عاش كدا فى الأحلام  
والحلم اذا كان نوع مغرى  
تلاقيه بيعدّى قوام  
أحب اعيش فى حالى  
مروّق مرتاح بالي  
إنشالا الدنيا تولّع  
ما تولّع طب وانا مالى  
بصراحة أكثر رومانسى  
حنين أوى وخيالى  
فرحان بالدنيا بحالها  
وكإنها خاتم ملكى  
وف يوم من دون ليّام  
الدنيا بقت مش ملكى  
ودا كله عارفين إمتى  
لما اتجوزت خطيبتي!

رسم الغلاف : بيم بوريل ديل لاسو (رام أنبانى)



ناقدة مسرحية وسينمائية وأديبة حرة .. شاعرة ..  
قصاصة ومترجمة ، حاصلة على الدكتوراة فى النقد  
الأدبي ، لها العديد من المقالات والدراسات النقدية  
المتخصصة فى الصحف والمجالات المصرية والعربية



9789773804572

دار  
العلوم  
للنشر والتوزيع

